


Hethadenee
waunauyaunee vadan
Luke Vanenāna



The Gospel According to Luke in the Arapaho Language of the
United States of America

Hethadenee waunauyaunee vadan Luke Vanenāna
The Gospel According to Luke in the Arapaho Language of the United States of America

Public Domain

Language: Arapaho

Translation by: Michael White Hawk and John Roberts

2015-05-06

PDF generated using Haiola and XeLaTeX on 16 Sep 2023 from source files dated 31 Aug 2023
49903679-7190-57d9-b73a-1c2da4854577

Contents

Luke	1
----------------	---

Hethadenee waunauyaunee vadan Luke Vanenāna

¹ Hanau waunauthathee hadnedanuu hejadenenau hadjenanuu hauthase vavese hauthedau hena hayauhuhau nanāe hājavaānethauwuthajauthaunin, ²Hasevenānauau nanāa hehethee jasesee vasesā hāenuu nau nejaanuu hanadedaunau; ³ Hasethajaunau hethadee hee nananenau jea, vavesethaugudenau vahee hayauhuhau hehetheejasesee hadnewauthaunauwunathane nedānee, javaānethadee Theauthenus, ⁴ Hadeaenauwu hethauwu hena hayauhuhau nesechauhauthehane. ⁵ Hena hese Herod, naja Judea, jasaa vevethahehe Zacharias haseede, hadauchunanede Abia: nau henene hedaunāhene Arauneau, nau heneseedaunin Elisabeth. ⁶ Nau haenesauuthāhenauau hathaāhenith Hejavaneauthu, thaunaugudethee vahee nanavaavedaunau nau hauchuwudaunau Vahadāde dejauthauwuvade. ⁷ Nau hehauwunesaunenauau, hanau henee hehauwunesaune Elisabeth; nau wauwu haenesauu vaehahenenauau. ⁸ Nau hethauwu, henee daunausuvadanaude hathaāhenith Hejavaneauthu hāenauauchaude, ⁹ Nesedaunethe vevethahehehau, nesedaude hadnejaāde yehauthe hevadannauauwunene Vahadāhenith. ¹⁰ Nau haunauude henanedanede haevevethahedaune jathee nauauchuu jaa. ¹¹ Nau haenauhauva hautheaune Vahadāde haetheaugune hejavese jaanaa. ¹² Nau hāenauhauwaude Zacharias, haejanethajau, nau nāthajau haeedasaa. ¹³ Hau nuu hautheaune, jevanāthajau hathāhuk, Zacharias: havevethahede nanedauwuhuu; nau hadasea Elisabeth hadjaneseawaude hāau, nau Jaun hadeseau. ¹⁴ Nau nananin hadaunauwuthajau nau hadeneethajau; nau hadnewauthathee neethajauthee hāejanese. ¹⁵ Hanau haudvasāthaa hathaāhenith Vahadāhenith, nau haudnehauwuvane daudause dadajevenenaje, wauāthe neauthunaje; nau haudnechauchaunaude Hevadanaunauwunene Hejavaneauthu, haa hehethee hāejanese. ¹⁶ Nau haudnewauthaa dāeyaunenede Israel hadjaechuwauyāaunaude hese Vahadāhenith Henesaunaunenau. ¹⁷ Nau haudnedauwaunaude naugu Vadanauwauthauwu nau neesenaudāhenith Elias hadjaechuwauyāauau vadauhau henesaunaunenau hese dāeyaunauau nau nejenedauvathee gauguuthajaudenau hadauethadee; hadnesaanude henanedanede hesanaa hese Vahadāhenith. ¹⁸ Nau Zacharias naudedusaene nuu? wauwu vanaehahenenau nau nadasea wauwu vadavehahenede, hathauhuk hautheaune. ¹⁹ Nau hautheaune hanaāauchuhanadethāde, Nananenau Gabriel henee theaugudaunauau hathaāhede Hejavaneauthu; nau janeautheavānu haudnāedaunathana, nau hadnauhauthehathana nuu neethajau waunauyauau. ²⁰ Nau, naune, nananin haudnejanadene nau haudnehauwunee, haunaude hese nuu hayauhuhau nauauchaugu hethauwu, hanau nananin daujethauwaudauwu nadanadede, nuu hadnethauwunauauchuu nauauchaugaune. ²¹ Nau henanedanede haedauyauhauvanauau Zacharias, nau haegaugauanadauwu henee dauguthetheaugude vadannauauwu. ²² Nau hāejenauāhede, haejeneanadetha: nau haeenauwu daunauhauthāde vadannauauwu: haevathasauwuna nau haejanade. ²³ Nau hethauwu, henee, chauchaunu hese hāesevadanedaude haeyehau hese nehayau hedauauwu. ²⁴ Nau hee hena hese henene Elisabeth hanaāenesaunenith, nau haegauduse nehayau hayauthaunenethe hesese hee, hanaāenehede, ²⁵ Hesau Vahadāde naasehānu hese hāedaugauhauvānu hadgudanaunauwunānu nāedayāhede henanedaa. ²⁶ Nau nanedauchaunauwaude hesese hautheaun Gabriel haejeauthewau hehethee Hejavaneauthu hese hedan Gananee haseenau Nazareth, ²⁷ Hesāhedāeyaun haeenenehauwaune henanin Joseph haenaneeseenith, hehethee hedauauwu David; nau hesāhedāeyaun Mare

haenaaseede. ²⁸ Nau hautheaun haedasaa, nau hanaāenehethāde, Haunauwuthajau, nananin vechauthane, Vahadāde hanedaudaunāne: hauwunaunane hesānaa. ²⁹ Nau hāenauhauwaude, haejanethajaude hedanadedauin, nau haegaugauanade daun hadnesenaunenechuhude nuu hadnesauau. ³⁰ Nau hautheaun, Jevanāthajau, hathāhuk, Mare: hanau nananin vechauthāne Hejavaneauthau. ³¹ Nau, naune, nananin hadnensesaunin, nau hadneahene, nau JESUS hadeseau. ³² Hadvasāthaa, nau Vāa Hejavaa hadethauva: nau Vahadāde Hejavaneauthau hadvenaude naja theaugudau henesaunaune David: ³³ Nau hadnajawaudauau hededanin Jacob jethauujenee; nau henajanede hadnehauwuthauuvadaunaune. ³⁴ Hanaāenehethaude Mare nuu hautheaune, Haddusenesau nuu hanau nāhauwāenaunau henane? ³⁵ Nau hautheaun hanaāauchuhananadethāde, Hejavaneauthau Hevadanauwauthauwu hadnedasāne: nau naunauthauau Hejavaa haddugauyāaunāne; henaheee jea henee Naunaudāde hadnensesaunewaude Heau Hejavaneauthau hadnethade. ³⁶ Nau, naune, have Elisabeth, jea wauwu henesaunede hadneahede wauwu dauvadavehahenede: nau nuu nanedaudauchunethe hesese wauwu hehauwunesaune neethade. ³⁷ Hanau Hejavaneauthau vahee nenedede hayauhuhau. ³⁸ Nau naune, Vahadāde daununānau hahagu Mare, hadnaasauau nuu hasenehene, nau hautheaun hanaāenauthāde. ³⁹ Nau Mare hanaāethauwauthede hena hese, nau hanaāehaude jauaudanenauauwuu nauhauhaunee hesee hedan Juda; ⁴⁰ Nau hanaejedāde hedauauwunene Zacharias, nau haenaunenechautha Elisabeth. ⁴¹ Nau hethauwuu, henee, Elisabeth hāenedauwauthaude daunaunenechuhunith Mare, dāeyaunaa haenauauwujā hethauwaudauau; nau Elisabeth haechauchaunaude Vadanauwauthauwu: ⁴² Nau haevasanade, nau hanaāenehede, Hauwunaunane hesānaa, nau hauwunaunade dāeyaunaa hethauwaudauau. ⁴³ Nau naudauhuthedasaa nuu, henee henaune Navahadāhewaunāde hadnedasānau? ⁴⁴ Hanau, naune, chauchaunu hanadedaunau haunaunenechauhude hāenedauwaudauwau naunaudaunuu, dāeyaunaa naunauauwujahede naunaudauau heee haunauwuthajaude. ⁴⁵ Nau hauwunaunade hesā henee hethauwuthajaude: hanau hena hayauhuhau hadnethauwunaasauau neethāedauwunade hehethee Vahadāhenith. ⁴⁶ Nau Mare hanaāenehede, Navadathuwu hauwaunehāde Vahadāhenith, ⁴⁷ Nau navadathuwu neethajaudaunaude Hejavaneauthu Nānayahāde. ⁴⁸ Hanau nedaugauhauwaude hadavenuhuhau hedaununaunau: hanau, naune, hewaunehaa heejasesee vahee henaededaunau hauwunaunade hadnethana. ⁴⁹ Hanau hena Naunaudāde vanasaunee hayauhuhau hasehānau; nau vadanaunee henesee. ⁵⁰ Nau nauwunaunade henee headaunādaunau henajāthee henaedede nau nausunee henaedede. ⁵¹ Nenuhauthethāde hedāahede hejadena; neneāsauaunaude hesāethajauhuhau hedāhene. ⁵² Nejananaude naunaudāhenethe hehethee hetheaugudaunene, nau nejejenanaude hadavenuhuhau. ⁵³ Negaudauhaude hasenahehau nauguu hethadenee; nau nethauyādahehehau negudanaude jessaa. ⁵⁴ Nenedahewaude heau Israel, nedauyewuwude hedauwuyau; ⁵⁵ Neesenehethaude havasevāene, Abraham nau hedāeyaunewau jethauujenee. ⁵⁶ Nau Mare haenedauguva hanāenethe hesese heee, nau hanaāejaehaude nehayau hedauauwuu. ⁵⁷ Wauhā Elisabeth hanaāevadauauwau hadneejanesāde; nau hanaāeahede. ⁵⁸ Nau henedaudevādaunau nau henethesaunau haenedauwauthaa hasauwunaunāde Vahadāhenith haenauhauthehaa vanasaunee hauwunaunadede, nau haenetheneethajauvaa. ⁵⁹ Nau hethauwuu, henee hāenasaudauchunese haejenausanauau hadgauguusenith dāeyaunauau; nau haedethanauau Zacharias, thauguu henesedaunin henesaunaune. ⁶⁰ Nau henaune hegau, hāheyaugaune, Jaun hadnethade, ⁶¹ Nau hathauhaugaunee hehauwuseenauau hādauānauau nuu neseede, ⁶² Nau haevathasauwunanauau henesaunaunin, haadeneseenethe. ⁶³ Nau haenaude dasewauthaunauha, nau haewauthaunauhā, Jaun haseede, hahagu. Nau haunauude haegaugauuthajaudene, ⁶⁴ Nau haegaunadenanauau, nau henethaune

haegauchauunauaune, nau hanaāanadede, nau haevaveenethedauna Hejavaneathu. ⁶⁵ Nau nāthajaude haeedasā haunauude henee hathāeauchaunauthee: nau vahee nuu nehedaunau haegaugauudedade jedauwuu hathāauau jauaudanenauauwuu Judea. ⁶⁶ Nau yahee hathāenedauvade haejenanauwu hedahenauau, haudduthā naa dāeyaunaa, hahagaunee? Nau hejadenene Vahadānith haenedaudaunaa. ⁶⁷ Nau henesaunaune Zacharias haechauchaunaudene Vadanauwauthauwu, nau haeaeayānautheda, ⁶⁸ Vaveenethedaunaa Vahadāde Hejavaneauthau Israel; hanau haenauujāda nau daujauaudaunaudauau hedenanedane, ⁶⁹ Nau thauwaudanaude henenese hadnenayauhānauau jedauwuu hedauauwunene hedaununaune David; ⁷⁰ Dau nausunanedede hedenaa Hevadanaeyāhewau neenaedenethe hājeenaedenauau: ⁷¹ Henee hadnenanedanenauau hehethe haujauthavene, nau hehethee hejadenaa vahee hāthāsānavādaunene; ⁷² Hethauwuu hauwunaunadede nesayānāedauwunaude havasevāene, nau hadnedauyewuwude Hevadanenesedauwau; ⁷³ Deneauwauhude yesee havasevāene Abraham, ⁷⁴ Henee hadvenānauau, jenāthajaude hehethee hejadenene haujauthavene hadnenayauhānauau hadnevevethedaunaunauau. ⁷⁵ Nauguu vadanaunee nau chuwwu hathaāhede, vahee hesee hadenaededaunene. ⁷⁶ Nau nananin, dāeyaunaa, haeyāhe Hejavaa haudnethane: hanau nananin hadnedauwaudauwu Vahadāde hadnesaanudene hevaunaa; ⁷⁷ Hadvāde haeyaude hadnenanedanedaunee hededane hadjaegudanauwunaude hewauchudaunenenaunau, ⁷⁸ Hehethee havathee hauwunaunadede Hāsaunaunene; nanaa Naugusaje hehethee hejavaa hadnenauujādaunānauau, ⁷⁹ Hadvenaude hesee hathāetheaugunethe hadauveeyaunee nau hadaudugauyāsaa gaujauaudahede, hadnedauwaudauau hauauthene hesee hadaudādauyaunee. ⁸⁰ Nau dāeyaunaa haeseau, nau hevadathuwu haedāeaune, nau haenaadaude hadaunechaudanee haunauude hesee hadneenauhauthethāde Israel.

2

¹ Nau hethauwuu hena hese hauchuwude haeneāsanau hehethee Caesar Augustus henee vahee henanedanede hadnayāadee. ² (Nau nuu nayāadede haenedauwunese deauchuwunanenede Cyrenius Syria.) ³ Nau vahee haeauāchaudene hadnayāadee haunauude hanesāde hesee nehayau hededan. ⁴ Nau Joseph jea haeyehau hehethee Gananee, hehethee hedan Nazareth, jedauwuu Judea, jedauwuu hededan David Bethlehem neseee, (hanau naadahagu hedauauwunene nau nedānee David,) ⁵ Hadnethenayāade naguu Mareheau heauthehewauthādaune hadnewaune wauwu haehāthane hee henesaune. ⁶ Nau hethauwuu, henee hajesenausunanedauthee, hese haevadaunau hadneejanesāde. ⁷ Nau hanaāejanesāde henedauwusaune heau, nau haeajetha, nau haesevana hewauchuhauchave nedau vethehenethe; hanau haeneau vethehedaunauauwuu. ⁸ Nau hena vavade vedauauwuu haudānajauāhehauau haeaudenauau, haeaunaunehanaunau haeanauyauhauvanauau hedajauanenaunau vegau. ⁹ Nau, wauhā, Vahadāde hedautheaune haeedasā, nau havathee haeseenaunasāunauau Vahadānith; nau haevasenāthajaunauau. ¹⁰ Nau hautheaun jevanāthajauau hathāhaugaunee: hanau, naune, nauuchaudaunathana hethadee waunauyauau havathee neethajaude, nanaa hee vahee henanedanede. ¹¹ Hee nananena janese nuu desenee hededan David Henayauthāhe, nananede Chris Vahadāde. ¹² Nau nuu hadneaunauwuna; Nananena hadveehauna dāeyaunaa hanajehede, saese hewauchuhauchave nedauvethethee. ¹³ Nau nauhaunee hena haewauthanaunau hejavaa hautheaunauau nauguu naa hautheau haevaveenethedaunanaunau Hejavaneauthu, nau hasenehehaugaunee, ¹⁴ Havathee hauwunede hesee Hejavaneauthu hejavaa, nau dasee vedauauwuu nanethaunee, hethadee hathanavana henanedanede. ¹⁵ Nau hethauwuu, hautheaunauau haejaenauthā hese hejavaa, Wauhā hadehaunau Bethlehem, hanathadagaunee nuu

haudānajauāhehauau, nau nauhaudauwuu nuu hayewhu javeauau, nanaa Vahadāde hāēdauwunādaunene. ¹⁶ Nau haenauchuhanaususanaau, nau haeveehanauau Mare nau Joseph, nau dāeyaunauau haesaeseene hewauchuhauchauwauwuu henee nedauvethehenethe hewauchuhauchāve. ¹⁷ Nau hāenauhauwauthee, haenēauthedanauau nuu hathauthedaunāhethee hee dāeyaunauau. ¹⁸ Nau vahee hathāenedauvade haegaugauanadauwu henee hayauhuhau nuu hathauthedaunāthee haudānajauāhehau. ¹⁹ Nau Mare haeunaunede vahee nuu hayauhuhau, nau haegaugauanade hedahaa. ²⁰ Nau haudānajauāhehauau haejaesanauau, haevaveenethedaunanauau nau haevaveenethedaunanauau Hejavaneauthu hee vahee hanathadauvathee nau hathauhauthāthee, neethāedauwunāhethee. ²¹ Nau hāenasaudaichunesee hadneegauguusede dāeyaunaa heneeseede Jesus, haseadagu nuu haseede haenaneeseāde hautheaunau haunauau deejethāsee. ²² Nau hese hāewaudeauchaude hasaunee hedauchuwude Moses hāevaduaunee, haeyehauthanauau hese Dadaunedan hadjenanauwunauthee Vahadāhenith; ²³ (Hathauthaunauhunee hauchuwudaunaa Vahadāde, Dajee haunauahee henee nedauwusau vadade hadnethade hese Vahadāhenith:) ²⁴ Nau hadnausāyaudenee neesenehedaunee hauchuwudaunaa Vahadāde, Hanesethee vedāenauau, wauāthe hanesethee neauthuvedāesaunauau. ²⁵ Nau, naune, hena henane haenedau Dādaunedan, Simeon haenaneeseede; nau naa henane haechuvā nau haethauwuthajau, haejauwuwude hadneneethajauthee Israel: nau Vadanauwauthauwu haethāsade. ²⁶ Nau haeeauthedaunaa Vadanauwauthauwu, henee hadjenauhaudauau gaujauaudahede, haunaude hadnauhauwaude Vahadāhenith Chris. ²⁷ Nau haejeheenuusa Vadanauwauthauwu jedauwuu Vadannauwuu: nau hāene henehā Hejavaeneauthusau jedanāde hadnesehāde thauguu hasauau hauchuwude, ²⁸ Hanaējavethenauanaude hejadena, nau haevaveenethedauna Hejavaneauthu nau hanaānehede, ²⁹ Vahadāhene, hewaunehaa nanehāejenanaude hauwauwaunave hadnaudauau nanethauaunee, hasauau hadanadede: ³⁰ Hee nasesā naunauhauwauau havāde Henayauthāhe, ³¹ Naa nananin hadnesaanudene hathaāhedaunee vahee henanedanede; ³² Hese hadneesenee Hathāauau henanedanede, nau havathee hadnanedanede Israel. ³³ Nau Joseph nau henaune haegaugauanadauwu hena hayauhuhau hanasenehethavathe. ³⁴ Nau Simeon haevethasa, nau haeāedauwuna Mareheau henaune, Naune, Naa dāeyaunaa hanejenanade hadneaunenauaudenenee nau hadneejaegauhadenenee hauwuhuu Israel; nau hanau nauhauthethau hadnevathevade; ³⁵ (Haa, gaugachu hadneegauchuguhune nehayau havadathuvaa jea;) henee gaugauuthajaudenau hauwuhuu vadauhau hadneauthasuu. ³⁶ Nau hena haenesā Anna, haeyāhe, hedaunau Phanuel, hanaadāde Aser: haewauthanenau hejajenewau, nau haenethenaedeva hechu nesaudauchu jajene hehethee neeseede; ³⁷ Nau haenevesāne hee nasaudausauau yānenee jajene, nananede haejethauunaude vadannauwuu, hau haenesedauna Hejavaeneauthu nauguu naugauyaude nau vevethahede dajāee nau hese. ³⁸ Nau haejejedā hee haevaveene jea Vahadāhenith, nau haeheauthedauna vahee nethāejauwuwudethee jauaudaunauthadede jedauwuu Dādaunedan. ³⁹ Nau hāesedauthee vahee hayauhuhau hasauau hauchuwude Vahadāde, haejaesanauau hese Gananee, hadahethee hedan Nazareth. ⁴⁰ Nau dāeyaunaa haeseau, nau haedāeaune hevadathuwu, haechauchaunaude haeyaude: nau Hejavaneauthu vadaude haethāsade. ⁴¹ Nau wauhā henehā haehaunenau hese Dādaunedan hadauchuvelanenee vasevadanese Hadavechauthadede. ⁴² Nau denesenenee hejajenewau, haehaunauau hese Dādaunedan hanau nesedaunenee vasevadanese. ⁴³ Nau hese hāevaduaunee, hāejāesathee, dāeyaunaa Hejavaneauthusau haenasedaunaa Dādaunedan; nau Joseph nau henaune haejaenauwu. ⁴⁴ Hau henanedaa haenahuvā hathanauwauhaugaunee, nau haejanaugudaunee; hanaāenaudehauthee henedauānene nau henedaehāhene. ⁴⁵ Nau hāejevehauthee, haejaesanauau hese Dādaunedan,

daunaudehauthee. ⁴⁶ Nau hethauwuu hāenasese hanaāeveehauthee jedauwuu vadannauauwuu, haetheaugune nahethāe hauthedahehau, haejaatheha, nau haenaunaudeadauna. ⁴⁷ Nau vahee hathāenedauwauthāthee haegaugauanadauwu hedaeyaunene nau hedauchuhanehedaunene. ⁴⁸ Nau hāenauhauwauthee, haegaugauanavanauau: nau henaune, Nā, nauduhanesehāane? hathāhuk, naune hāsaunau nau nananenau nenaudehane nejeneethajaunee. ⁴⁹ Nau hathauhuk, nauduhenaudehena? gauhajaene nauchāe wauwu hanedaudauwau Nāsaunau henesethaude? ⁵⁰ Nau haejaenauwu hasenehethāthee. ⁵¹ Nau hanaāenethaunaude, nau haenauusanauau Nazareth, nau haeethauwaudaunā: hau henaune haeunaunedene vahee nuu nehedaunau hedahaa. ⁵² Nau Hejavaneathusau haeneenaneane hedaeyau nau hajedāde nau vechauthaude Hejavaneauthu nau henanedanede.

3

¹ Wauhā yauthaunenee jajene wauwu neeenajanede Tiberius Caesar, Pontius Pinade nausunajawaudauau Judea, nau Herod nanajawaudauau Gananee, nau henauhauwauau Theneb nanajawaudauau Iturea nau vedauauwuu Trachonitis, nau Lysanias naja Abilene, ² Annas nau Caiaphas vevethahenajanauau, Hejavaneauthu nanadede haedasaa Jaun heau Zacharias nauaunee. ³ Nau haedade vahee vedauauwuu hanathaudanee Jordan, haeauthaude dusaahede haudneaugauthuu gaugauuthajaudenau hadneegudanee wauchudaudenau; ⁴ Naathauthaunauhuu wauthaunauhanaa hedanadede Esaias haeyāhe, Jasaye haevasenehe nauaunee, Hesaunuu hathaāhede Vahadāhede, nesedee hevau chwuwuu. ⁵ Hadauchugauaudayauau hadnechauchanaa, nau hadauchāe hauane nau jauaudane hadjananee, nau jajāvāe hadchuvanee, nau hadauhauauyauau bau* hadneyauthauau; ⁶ Nau vahee henanedanede hadnauhaudauau Hejavaneauthu hedenayauthaunene. ⁷ Haenaāenehethaude waunauthanee henanedanede henee hedaadaunau haddusaanaude, Hau hedenaededaunenau seseyānauau, hanaa hāedauwunādaunenau haddaugauhudauwuna nauthee hasenaunaude hadnauusanauau? ⁸ Hethadee nesedee hadeheanaunee hadnaugauthuu haugaugauuthajaudenenau jevaauthenehee hadahenauau, hāsaunaunene Abraham: hanau nāedauwunathana, Hejavaneauthu neene nesehaude nuu hauunaugānau Abraham hedāeyaunewau. ⁹ Nau wauhā jea hauunauchu janenane hethājee hauhaudee: vahee hauhaudee jeneeauhuk vevenaundenau haddauwauhude, nau hadneewaudeadaunee. ¹⁰ Nau henanedanau haenaudeadaunaa, hauddusedaune? hathāhuk. ¹¹ Hanaāedauwunaude, Daun nanesevechudaunade, jvena daun janevechudaunenith; nau daun hevethenede jenaasedaude, hahagu. ¹² Wauhā hanaāenuusathee hauāyāhehauau haddusaahethee, Hechauhauthethāhe hauddusedaune, hathāhuk, ¹³ Nau hathāhaugaunee, javaauthaunaudaunāthe henee nethautheavane. ¹⁴ Nau vanenanenau hanaasedaunethe, hanaasenehethāde, Nau haddusedaune, hathāhuk? Nau javaauthasenehaa henaneda, hathāhaugaunee, javaauthenanedauneeva henaneda, nau hadnanethauaunahedava haunaudaunadenenau. ¹⁵ Nau henanedanau hathanavāhuk, nau vahee henanedanede haegaugauanavaa hedāhenenau Jaun wauau Chris haenane, nau wauāthe hajee; ¹⁶ Jaun hanaāauchuhanehethaude, hathauhuk vahee, Hadneedusaanathana hee naje; hau hanesāde javaānaudāde javaāhenau jaunaude hewauhugu hewauaunaa nāhauwuneaugunavane, hadneedusaanāna hee Hejavaneauthu Vadanauwauthauwu hee heseda. ¹⁷ Henaunasāhau nanewauunauau, nau hadgaunauhauau heyauthu nedauthauayāde, nau hadnauānauau wauchuunethauauhanau nedauthānauau jenayaunau; hau jenethauayaunau

* **3:5** “Bau” probably should be “vau” (meaning “way” or “road”), in line with the rest of the text, since the letter “b” appears nowhere else except in foreign names.

hadvadauchauauu hesedaa nedaujesaudaunahee. ¹⁸ Nau waunauthanee hanasejāesaunee hayauhuhau hanathauthedaunaude henanedanau. ¹⁹ Hau Herod naja haeaunaunewau heee Herodias henauhauwauau Thenebeau henenene, nau vahee hathāewausaunee hanasedaude Herod, ²⁰ Haewauhaunene nuu vahee henee dauaugauhude Jauneau duguhunauuwuu. ²¹ Wauhā hāevahesedusaahedaunee henanedanede, hethauwuu henee Hejavaneauthusau haenethedusaā, nau haevevetha, hejavaa hanaāegaunanenee, ²² Nau Hejavaneauthuvadanauwauthauwu haejejanauhusane hedanayaunaa hedanayau haenaasaunee waude vedāene nau hanadede haejenauusa hehethee hejavaa, hasenehehuk, Nananene vechauthauau Nāa, nananene vaveenethedaunathane. ²³ Nau Hejavaneauthusau nehayau wauwu wauau hanasauau jajeneva, hanane (hathanavade) heau Joseph, nananenith heau Heli, ²⁴ Nananenith heau Matthat, nananenith heau Levi, nananenith heau Melchi, nananenith heau Janna, nananenith heau Joseph, ²⁵ Nananenith heau Mattathias, nananenith heau Amos, nananenith heau Naum, nananenith heau Esli, nananenith heau Nagge, ²⁶ Nananenith heau Maath, nananenith heau Mattathias, nananenith heau Semei, nananenith heau Joseph, nananenith heau Juda, ²⁷ Nananenith heau Jonanna, nananenith heau Rhesa, nananenith heau Zorobabel, nananenith heau Salathiel, nananenith heau Neri, ²⁸ Nananenith heau Melchi, nananenith heau Addi, nananenith heau Cosam, nananenith heau Elmodam, nananenith heau Er, ²⁹ Nananenith heau Jose, nananenith heau Eliezer, nananenith heau Jorim, nananenith heau Matthat, nananenith heau Levi, ³⁰ Nananenith heau Simeon, nananenith heau Juda, nananenith heau Joseph, nananenith heau Jonan, nananenith heau Eliakim, ³¹ Nananenith heau Melea, nananenith heau Menan, nananenith heau Matthatha, nananenith heau Nathan, nananenith heau David, ³² Nananenith heau Jesse, nananenith heau Obed, nananenith heau Booz, nananenith heau Salmon, nananenith heau Naason, ³³ Nananenith heau Aminadab, nananenith heau Aram, nananenith heau Esrom, nananenith heau Phares, nananenith heau Juda, ³⁴ Nananenith heau Jacob, nananenith heau Isaac, nananenith heau Abraham, nananenith heau Thara, nananenith heau Nachor, ³⁵ Nananenith heau Saruch, nananenith heau Ragau, nananenith heau Phalec, nananenith heau Heber, nananenith heau Sala, ³⁶ Nananenith heau Cainan, nananenith heau Arphaxad, nananenith heau Sem, nananenith heau Noe, nananenith heau Lamech, ³⁷ Nananenith heau Mathusala, nananenith heau Enoch, nananenith heau Jared, nananenith heau Maleleel, nananenith heau Cainan, ³⁸ Nananenith heau Enos, nananenith heau Seth, nananenith heau Adam, nananenith heau Hejavaneauthau.

4

¹ Nau Hejavaneauthusau wauwu haechauchaunaude Vadanauwauthauwu haejeehedesa hehethee Jordan, nau haeyehauthaa Vadanauwauthauwu nauaunee, ² Yāyauau hese hananeedauchunese haenayāthehaa Haujaune, nau hena hese haeheejevethē: nau hāevathenese, haenaāasenade waunee. ³ Nau Haujaune hathāhuk, hith nananene Haāthauwuāvaa Hejavaneauthau hāedauwunene naa hauunauga hadejauaujaunenede. ⁴ Nau Hejavaneauthusau haeauchuhanehe hathauhuk, Wauthaunauhuu henane hehauwuunaede jauaujaunau jasaa, hau heee haunauude hedanadedanene Hejavaneauthu. ⁵ Nau Haujaune haenauauhuchauhaa hauanee hadaujauudanenee, nau haenauhauthehaa vahee najanede hathāauuvaa henanedanede chauchaunu. ⁶ Nau vahee nuu najawaude hadvenathane, nau hauwaunede, hathāhuk Haujaun: hanau henee nananenau devenanau; nau daun navadauvenau hadevenauau. ⁷ Hith nananene henaheee hevevethedaunenagu, vahee hadnehanāhene. ⁸ Nau Hejavaneauthusaun hanaāauchuhananadethāde nau

hathāhuk, Hedehau naugauvaa, Haujau haugau hathauthaunauhuu, Nananene hade-
 vevethedaunaude Vahadāde Hāsaunau, nau hanesāde haudnevevethedaunaude. ⁹ Nau
 hanaāehauthāde Dādaunedan, nau haejenanaa naunauchuu vadannauauwuu, nau hith
 Haāthauwuāvaa Hejavaneauthau hauwujanauau hede hehethee, hathāhuk: ¹⁰ Haugau
 hathauthaunauhuu, Hadāedauwunaude hedauthaunau haddunānaune: ¹¹ Nau
 hejadenenau hadejedunānaune, havaaugugausene headaa dasee hauunaugāe.
¹² Nau Hejavaneauthusaun hanaāauchuhananadethāde nau hathāhuk, Hasenehee,
 Nananene jevanayāthehene Vahadāde Hāsaunau. ¹³ Nau hāevathenayāthedaude vahee,
 hanaāejathāde haujau najee, ¹⁴ Nau Hejavaneauthusau hanaāejaenaudāhede
 Vadanauwauthauwu haduu Gananee: nau hanaāauthedaunenede hanaāeneāsanaune
 vahee hathāauau Gananee nauanee. ¹⁵ Nau haechauhauthaha vevethahenauauwuu,
 nau vahee haevaveeneha. ¹⁶ Nau haenauusa Nazareth, needaunauchauhade: nau
 dajauaunee nesedaude haeyehau vevethahenauauwuu vadanese, nau haetheaugu
 dasauhaudauau wauthaunauha. ¹⁷ Nau haevenau hewauthaunauhanene haeyāhew
 Esaias. Nau hāegaunanauau wauthaunauha, haeveede hadauwauthaunauhune,
¹⁸ Vahadāde Hedauwauthauwu nanadeaunānau, hanau dehedusaanānau javeda
 hadnauthedaunu hethadenee waunauyaunee hadavenuhunethee: hanejevāde
 haudnenayauhu naudauwuthajauthee, hadnauthedanau haudjaejenanathee
 wauwaunauau, nau hadnejanauhauthāthee nanenauguthee, haud-jaejenanathee*
 hasenethaunauau, ¹⁹ Haudnauthedaudauwau hethadee jaunaunauau jaje
 Vahadāde. ²⁰ Nau haeauavane wauthaunauha nau haejaevana vevethahew,
 nau hanaāejanaugude. Nau vasesā vahee hathāanedauthee vevethahenauauwuu
 haenāuhauvanauau. ²¹ Nau hanaāejasesenehethaude, nuu desenee nuu hathauthau-
 nauhuu hethauvaa haunaudaununenau. ²² Nau vahee haesegaugauudedeaunene,
 nau haegaugauanadauwu hethadenee hedanadedeaunene hethāenehethaunene.
 Nau gaunuu jee heau Joseph? hahagaunee, ²³ Nau hanaāenehethaude, Nananena
 hadethauwunehesena nuu heeejegausudede, Naudaunehāhe, nehanenayauhade:
 henee nanāthadauwaunee nanāseadaunee Capernaum nanehasedaunee nechau
 hede nehayau havedauauwuvaa. ²⁴ Nau hathauhuk hethauwuu nehethathana,
 Hegau haeyāhe hehauwuvechauthau nehayau hevedauauwuvaa. ²⁵ Hau
 hadauthedaunathava hethauwuu, waunauthathee henevesānauau neanedauthee
 Israel, hesee deanedaude Elias, hejavaa denausunaugauhuu nasau jajene nau
 nedaucha hesese, devasauau hasenaude denanadesanauau vedauauwuu;
²⁶ Hau hehauwunesāhene hejevādaunene Elias, vavade Sarepta, hedan Sidon, hesā
 nananede henevesā. ²⁷ Nau newauthathee naugaugauwuhuhauau neanedauthee
 Israel deanedaude Eliseus haeyāhe; nau hehauwunesā henayauhade vavade Naaman
 Syrian. ²⁸ Nau vahee hathāethauguthee vevethahenauauwuu, hāenedauwauduu nuu
 hayauhuhau, haechauchaunadenenau hasenaunaude, ²⁹ Nau haegauhānauau,
 nau haenunanatheguthanauau hedan, nau haehauthanauau hauchauguu
 jauaudanee haduunee hededanenau needaunesehenee neaudnedauauwuguthathee
 hauthedaunaānee. ³⁰ Hau haejavechautha hehethee nahethāe, haejathāau, ³¹ Nau
 haenauusa Capernaum, hedan Gananee, nau haeauthedauna vadanesenenee,
³² Nau haegaugauanadauwunenau hasechauhauthahaude hedanadedeaunau,
 hanau hedanadedeaunau haenauthaunenau. ³³ Nau vevethahenauauwuu henane
 haenedau hevadathuwu haewauchāhene haujaun, nau haevasanade, ³⁴ Jenehāa;
 hathāhuk, haudduseha nananene Jesus Nazareth? gauhāejau haudnauauhāane?
 Haenaunathane hadāhene; Vadanauau Hejavaneauthau. ³⁵ Nau Hejavaneauthusau
 haeneuva, dādaunauuu, hathauhuk, nau jenauchune. Nau haujau hāegauneseau

* **4:18** There is a midline hyphen in “haud-jaejenanathee” which doesn’t appear in same word earlier in the verse. There are no other midline hyphens in this text at all, and this hyphen is probably without significance.

nahethāe hanaāejenauthaude nau haejaseneha. ³⁶ Nau vahee haegaugauanavaa, nau haeanadethadenenau jae, nuu hayew hanadede; hathāhuk, hethauwuu nauguu haenauthenehetha haenesedauwauna wauchāhenethe haujaunau, nau hanaāejenauāhethee. ³⁷ Hanaāauthedaunenede nanadee jasesee gauānee vedauauwuu, ³⁸ Nau haegauhā haenauā vevethahenauauwuu, nau haejedā Simon hedauauwuu. Nau Simon henene henaunene haenauauwauvāhene; nau haeautheawaunauthasanauau. ³⁹ Nau haetheaugudauna, nau haeneude hasauwauvahede; nau haenauthaa: nau nauhauhaunee haegauhā nau haedauyauhauvanauau. ⁴⁰ Wauhā hesese hānaesade vahee hathāenethenauthee hasauwauvahehehau hanasejaechauwauvāhenethe haenauuchaudanau; nau haedajevasana nau haenayauha. ⁴¹ Nau haujaunauau nauguu haevanauusanauau haewauthanauau, haeneānadenauau, nau haenehenauau, Nananene Chris Heau Hejavaneauthau. Nau haeneneuva haejechuwauanadeha: dauhaenauwunethe dau Chris denede. ⁴² Nau hāesenenee, hanaāejathāaude hesee hadaunechaudanee, nau henanedanau haenaudehaa, nau haedasaa, nau haedauduvaa, haudjenauthaude. ⁴³ Nau hanaāēdauwunaude, haudnauthedaudauwau najanede Hejavaneauthau gauchuhunee hedanau nauguu: haugaunaasejejenananau. ⁴⁴ Nau haeautheda vevethahenauauwuu Gananee.

5

¹ Nau hethauwuu, henanedanede haeneenavadaunedauwaudauwu hedanadedanene Hejavaneauthu, haetheaugu sasethauwu neajee Gennesaret, ² Nau haenauhaude hanesanenee thewaunau haetheaugunenau sasethauwu neajee: hau naunauyāhehauau haeyauhaudesanauau, nau haeanahesadenauau henauyaundenenau. ³ Nau haejedā jasia hethewaunene, Simon, nau haenehetha hadwauauwuhude vanehaa hehethee vachuwauauwuu vedauauwuu. Nau haejanaugu, nau haechauhautheha henanedanau hehethee thewaunaa. ⁴ Wauhā hāevadauthedade, hanaāenehethaude Simon, wauauwuhude hadaudavee, nau henaunau haunauyaude hadjathāne. ⁵ Nau Simon hanaāauchuhananadethaude, Hechauhauthethāhe, naunaugaunenesethānauau, nau nāhauwuthauujathāva: hau hegaugauanauau hadnaaenauwaudenau nauyaude haugau hasenehene. ⁶ Nau hāesedauthee nuu haewauthanenau hejathaunenau, nau haethauwunauaune henauyaundenenau. ⁷ Nau haeadethanauau henedaehahenau danachaugunethe jasia thewaunaa, haudjaunethe, nau haudnedāhevāthee. Nau haenauusanenau, nau haechauchaunaundenauau hanesanenee thewaunau hanaāenauwuuu. ⁸ Hāenauhaudauau Simon Peda, haechauāgujanaugu hejaedayānene Hejavaneauthusaun, nauchu, hathāhuk; haugauhauhauganenau, Hau Vahadāhene. ⁹ Haejenaunethajau, nau vahee hethāenethaunādanau daunauanauthee nauwu hejathaunenau. ¹⁰ Nau nauguu James, nau Jaun, heauhau Zebedee, henedaehauhau Simon. Nau Hejavaneauthusaun hanaāēdauwunaude Simon, Jevanāthajau, hewaunehaa hee nananene haudnesedanaude henanenauau. ¹¹ Nau hāenauuchaudethee hethewaunenau vedauauwuu, hanaāenauduu vahee, nau hanaāenethauguhauthee. ¹² Nau hethauwuu, hānedaude jasia hedan, naune henane haechauchaunaude naunaujaunee haugauwude; hāenauhauwaude Hejavaneauthusaun haeuāneseve, nau haeautheava, Vahadāhene, vathehānenagu hadeneeyaundanene hathauhuk. ¹³ Nau haeyethauha, nau haevasana, vanatethānau: heyaudāhe, hathaukuk. Nau nauhauhaunee naunaujaunee haugauwude haenauthaa. ¹⁴ Nau haenesedauwaunā haudjāedauwunaunith henanedane: hau najesa hadnauhauthehau hadanayau vevethahevāhe, nau hadvā dauhenayauhane, Mosase neesedauvade, haudneāenuu. ¹⁵ Hau haeneenauthedaunene neānee: nau havathee haewautha henanedanede haeuānauuchaudene daujewaunejaathededaunee, nau haudnenayauhāthee hedaauwauvahedaunenau. ¹⁶ Nau haejathāu hesee nauaunee, nau haevevetha.

17 Nau hethauwuu jasaa hese, hajesechauhauthethāde, Nesethajauhuhauau nau hechauhaudauwuhuhauau nanavaavede haetheaugunauau hejava, haejeehedesanauau hadauchāe hauwauhauauwudan Gananee, nau Judea, nau Dādaunedan: nau naunaudāde Vahadāde haetheaugu hadnenayauhaude. 18 Nau, naune, henanenauau haenauchauhanauau henanene hee hedauwune haeesevāhene nau haenayāthejedananauau, nau hadjenanauwunauthēe hathaājēnith, 19 Nau hāejeveedethee haudnethejedanauthēe hanau dauwauthaa henanedanede, hanaāenauauhusathee dasee hauauwuu, nau haejanauhaujānanauau, hehethee dasee hejavaa hauauwuu nauguu hedauwune nahethāe hathaājēnith Hejavaneauthusaun. 20 Nau hāenauhaudauwunith hedethauwuthajaudenenau, hanaāēdauwunaude, Henane, hauwauchudaude gaunudanauwunane. 21 Nau wauthaunauhāhehauau Nau Nesethajauhuhauau hanaāejasesegaugauuthajauthēe, Hanaa naa hananadede nehedaduhude Hejavaneauthu? hathāhuk. Hanaa haudgudanauau wauchudaude, vavade Hejavaneauthau, naanesāde? 22 Hau hāenauwunith Hejavaneauthusaun hegaugauuthajaudenenau, Haudusethajauva hadahenauau? hathāhaugaunee, 23 Hayew gauchauaa, nehehāgu, Hauwauchudaude gaunudanauwunana; nau wauāthe gauhā nau javesa heheagu? 24 Hau hadaenauwu henee Heau henane naunaudāde dasee hathāauauvadee negudanauau wauchudaude, (naasenehethauhaugu neasauwauvahedauwunith hesevahede) Hāedauwunathane, Gauhā, nau hedanau hauddau nau najesa nananene haudauauwuu. 25 Nau nauhauhaunee haethauwauthe hathaājēnithē nau haedane heaugusenadenau nau hanaāejathāaude hedauauwuu haevaveenethedauna Hejavaneauthu. 26 Nau vahee haegaugauuthajaudene nau haevaveenethedaunanauau Hejavaneauthu, nau haechauchaunaudenauau nāthajaude, Naunaudauhauthānauau nuu desene, hāheagu. 27 Nau hāevathedaude haejathāu nau haenauhauva hauāyāhe Levi hanaaseenith, haetheaugune nedauudanauau hauāyaunau, nau jethauguhu hathauhuk. 28 Nau haevanauthā, haegauhā, nau haethauguha. 29 Nau Levi haevasevethheha nehayau hedauauwuu, nau haewauthanauau hauāyāhehauau nau hauthauau haenedauguvā. 30 Hau wauthaunauhāhehau nau Nesethajauhuhauau haeaunevā hethauguhādaunau, naudu haenethevethewawauna nau haenedaveyāwauna hauāyāhehauau nau wauchudauhuhauau, hathāhaugaunee? 31 Nau Hejavaneauthusaun hanaāauchuhananadethāthee, hathāedāenaedethee hehauwuvatēhā naudaunehāhew; hau hathāasauwauvahethee. 32 Nāhauwujenauusa haudnadethu hethahethee hau wauchudauhuhauau hadnaugaudanenee hegaugauuthajaudenenau. 33 Nau hathāhuk naudu hethauguhādaunau Jaun denauaunenauyānethē, nau devevethahethee, nau naasedauthēe hethauguhādaunenau Nesethajauhuhauau; hau hanethenaunauau havethehethēe nau havaveyāthee? 34 Nau hathāhaugaunee, Gauhājēneenesehauva dāeyaunauauau nedauenenedaunee hauauwuu naugauyaude hajesanedaunaunāthee waunenenehew? 35 Hau hese haudnauaichuu, haudneedanauwunana waunenenehe, nau hee hadnaāenaugauyāthee hena hese. 36 Nau hanaāanadethaude jea jegausauhānee; Henane hehauwu jenane waunauyaunee neauthayew hadaugauthāyaunee, hith hesedauhuk, nau hadauwayaunee needaudenauuu, nau jasaa needanee hadau wayaunee hehauwuneauchauna gauthāyaunee. 37 Nau hegau henane hehauwujenane waunauyaunee vasevenenaje gauthānēnevajaunaa; nau wauāthe wayaugu vasevenenaje haddaudeauau nevajaunau, nau hadgusenauauau, nau nevajaunau haddenanaunauuu. 38 Hau waunauyauau vasevenenaje hadedaunee hadauwayauau nevajau, nau nanesauuthadee. 39 Nau hegau henane hesevanaagu gauthānevasevenenaje nauhauhaunee haevathehaa waunauyaunee; hanau gauthāyauau hethadee, hathauhuk.

6

1 Nau hethauwuu naneseauwauau vadanese, haechedesa jenayaunaa; nau

hethauguhādaunau haegaugauunauwu wauchuunethauauhanau, nau haevethenauau, haegauneegudenauau hejadenenau. ² Nau hauthauauau Nesethajauhuhau, Naudu hanesedauna waujaa nanavanau nesedaude vadanesee hathauhaugaunee? ³ Nau Hejavaneauthusau hanaāauchuhananadethaude, Gauhājethaunauhaude nuu hasauau David neesedaude, nehayau deasenade, nau neethāenethaunāde. ⁴ Neesejedāde Hejavaneauthu hedauauwunene, nau needanauau nau nevethee nauhauthethājauaujau, nau haevena heethāenethaunaunau; waujaa nanavanau veyāgu hau jasaa vevethahevahehauau? ⁵ Nau hanaāēdauwunāthee, Heau henane nanethadāde vadanesee. ⁶ Nau hethauwuu jea jasaa vadanesee haejedā vevethahenauauwuu nau haeautheda: nau henane haenedau hejavese hejadena haeesevane, ⁷ Nau wauthaunauhāhehau nau Nesethajauhuhau haeauauyauhauvaa, wauau haadenenayauthā vadanesee; hadnejauaudaunauthee dauhanājauwauaunauthee. ⁸ Hau haeauauwuu hegaugauuthajaudenenau nau hanaāanadethaude henanene hesevenasanith, Gauhā nau yethaagu nahethāe. Nau haegauhā nau haeyethaagu. ⁹ Hejavaneauthusau hanaāēdauwunaude, haudnaudedauanathana nananena hanesadee; Gaujenanavanau vadanesee hethadāgu hasedaunee, nau wauāthe wauchudauneagu? henayauhāgu henaedede, nau wauāthe nanaunehāgu? ¹⁰ Nau hanaāenaunauānede vahee, hanaāēdauwunaude henanene, Segauha hajade. Nau hanaasedaude: nau hejade haenayauhune jasaa hasaunee. ¹¹ Nau haeechauchaunaudenauau hasenaunaude: nau hanaāaunauchuwuhadethee daun haudnesehauthee Hejavaneauthusaun. ¹² Hethauwuu hena hese, haeehau hauanee haudnevevethahede, nau haunaude naugaunee haevevethedauna Hejavaneauthu. ¹³ Nau hāesenee, hanaāadethaude hethauguhādaunau; nau haedana vadadauchunesenee, hanaāeneseaude vadauhanauau. ¹⁴ Simoneau (jea haeaugauthea Peda haseauhuk), nau Andwheau henauhauwauau, James nau Jaun, Thenib, nau Bathaunaumew, ¹⁵ Matthew, nau Taumis, James heau Atheas, nau Simon Zenantes haseadagu, ¹⁶ Nau Judas James henauhauwauau, nau Judas Iskariot,* hanane jea neheaudaunade Hejavaneauthusaun. ¹⁷ Nau haejenauunethauna nau haetheaugunauau hethauauwuu, nau hadauchunanenethe hethauguhādaunau, nau haevasenauthenanedau henanedanede hehethee vahee Judea nau Dādaunedan, nau hehethee sathauwuu hadajee Tyre nau Sidon hethāejenauujaathēhādaunau, nau haudnenayauhāthee hedaauwauvahedaunenau; ¹⁸ Nau hathāenaunauthauwauvahethee wauchāhenethe haujaunau: nau haenayauhaunauau, ¹⁹ Nau haunaude hadaucha haevedauvanau hanau daunudesanaunee hevadaude nau haevahenayauha. ²⁰ Nau hanaāenāuhauwaude hethauguhādaunau, Hauwunaunana nananena hadavenuhunena; hanau nananena najanede Hejavaneauthu, hathauhuk. ²¹ Hauwunaunana nananena hathāasenana hewaunehaa: hanau nananena hadnegaudana. Hauwunaunana nananena hathāevewauhuna hewaunehaa, hanau nananena hadnauchaunena. ²² Hauwunaunana nananena, henaneda hasānavānā, nau jaasauaunānā, nau naunaunauthevānā, nau hausāgudenauthe haneseedaunenau hadauwusaunee, haugau Henane Heāhene heee. ²³ Haunauwuthajauau henee hesee heee, nau jajanauauau heee haunauwuthajauau: hanau, naune, hanavanasauau hadaugautheavadenenau hejavaa: hanau naneesedaulyaugaune henesaunaunenau naneesehauhaugaunee haeyāhehau. ²⁴ Hau naunauthauau hadnauauchaudaune hathāeveaunauaune; haugau hanesedanauwuna hauwauthenaedede. ²⁵ Naunauthauau hadnauauchaudauna hathāegaudana; haudnasenana. Naunauthauau hadnauauchaudauna hathāauchaunena hewaunehaa, hadnaudauwuthajauana nau hadvewauhuna. ²⁶ Naunauthauau hadnauauchaudauna, daunhāene vahee henaneda

* **6:16** “Iskariot” is spelt with a “k” here but in 22:3 with a “c”. Biblical names in this text generally but not always follow the spelling of the King James Version (KJV).

hāethadenee hasenehethānā, hanau henesaunaunenau naneesehauyaugaune jayaudauwaeyāhehau. ²⁷ Hau hadāedauwunathava nananena hathāenedauvana, Vechauthaa nananena haujauthavenau, heneehaa hasānavādaunenau, ²⁸ Hauwunaunaa hāwauwauchuvādaunenau, nau hevevethasaa hāwauwauchuhādaunenau nananena. ²⁹ Nau henee haudauauvāde hajāeaunaa nau naugautha venene; nau hedanauaugu nananene hauddu jevaedanau jea naudauguvechude jevaethaa. ³⁰ Hevenaa daun henaneda hānedauwunādaunenau nananene; nau jeva jaenedauwunaa hedanauwunānagu daun hanetheyaunenau. ³¹ Daun hasevathehānaune henaneda hesehānenagu, nechau jenaasehaude. ³² Hith nananena vechauthaunagu daun havechauthādaunenau nananena, haddusevaveeneva nananena? haugau wauwauchudauhuhauau nechau nevechauthaunee hethāevechauthādaunenau. ³³ Nau hith nananena hethadāgu hasehaunā daun hāneneehādaunenau, haddusevaveeneva nananena? hanau naneesedaugaunee wauwauchudauhuhauau. ³⁴ Nau hith nananena hehaunagu daun hāneejauaunaudaunādaunenau, haddusevaveeneva? hanau wauwauchudauhuhauau nechau neehauhaugaunee wauwauchudauhuhau, hadnejanaasesedanuu. ³⁵ Hau vechauthaa nananena haujauthavenau, nau hethadeha hasedauna, nau hehānagu, jevajavathehāe; nau nananena haudaugautheavadenenau hadvasauau, nau nananena hadnaēdēyaunenena Javaājauuthee: nau nenenehaude nethāejevaveenenethe nau hauhauganau. ³⁶ Hedauwuyaunee nananena, nananena Hāsaunaunenau jea hasedauwuyaunede. ³⁷ Jevaauchuwuu, nau nananene hadnaajauchuwuhane: nau jevaduguthāe nau nananena hadnehauwuduguhuva: hejaegudanauwuyāe nau hadnejaegudanauwunane nananene: ³⁸ Vāe, nau hadnevenana nananene, vavesethajauauthāe, dāayāe, nau dāesathāe, nau haunauwauauthāe, hauchauva, henane hadvenāna. Nechau hadnaasethajauaunāna hasethajauauthānā hadnanesethajauaunana. ³⁹ Nau hanaānadethaude haejejegausuhu, Gaunanenauguhu jenenauājetha nanenauguhu? Gauhaudjenesauujanesenauau gauhanaa? ⁴⁰ Thauguthāhe hehauwujavaāhe hechauhauthehādaune: hau haunauude hanesāde daun haunauudaunāde hathāhenith hechauhauthehādaune. ⁴¹ Nau naudu hanauhaudauwu nananene hahavaa hejaheede hesesāe, hau haājevesehau havadauhaude hathāsewau hasesāe? ⁴² Wauāthe hauddusenehethau nananene hahavaa, Jāedaā, hadaugauhauwunathe hajaheede hasesāe, hau daujenauhauwaude havadauhaude hathāsewau nehayau hasesāe? Nananene jayaudauwunaedehe, nedauau haugauhune havadauhaude hathāsewau nehayau hasesāe, nau hadenaāeneauvane hadenaāeneaugauhauwu jaheede hethāsathau hahavaa hesesāe. ⁴³ Hanau hauhaude hethahagu hehauwuseaude wausaunee vevenaundenau; nau wauāthe wauchahagu hauhaude hehauwuseaude hethadenee vevenaundenau. ⁴⁴ Hanau hadauchude hauhaude neaenaunede hanasaunee hevevenaundenau. Hanau hauchahevesee henanenauau hehauwunaadauhauānuu hauuyauchuwunau nau dauchuwusee hehauwunaadauguunee dadajevenau. ⁴⁵ Henane hethāde hehethēe hethadenee heda nenauchaude hethadenee; hau wauchāhede henane wausaunee heda nenauchaude wausaunee: hanau waunauthaa hehethēe hedahaa hede nanadenaunee. ⁴⁶ Nau naudu, Vahadāhene, Vahadāhene, haesena, hau nejesedauna hayauhuhau hasenehethathana? ⁴⁷ Daun nādasāde nau nedaunānagu hasenehenaunauau, nau hesedauhuk, haudnauhauthehathana haudnethāde: ⁴⁸ Henanene henee nenesedenethe hauauwu naathāde, nau henee nejayauchauhuu, nau naneenauau hauauwuu dasee hauunaugāe: nau nauunauuu naje neje naunauthuu jaathāsāe henee hauauwuu, nau hehauwunauauvathāau: hanau daunāaudaa hauunaugāe. ⁴⁹ Hau jaathedehe, nau janenaasedauthe, naathāde henanenau henee nedasauauvānethe vedauauwuu; nau neje jaathāsāe naunauthuu, nau nauhaunaunee naunenauauau; nau thauwusāe henee hauauwuu nevasauau.

7

1 Wauhā hāevathanadede vahee hanasenehede daujajaathehade henanedanede, haejedā Capernaum. 2 Nau jasaa vanenenaja hewauwaune haevechautha haeaugauwune, nau haeyānajane. 3 Nau hāenedauwauthaude Hejavaneauthusaun, haeautheava vachaugananenau Jews, haeadetha hadjaunith nau hadnenayauhaunith hewauwaune. 4 Nau hāedauchauthee Hejavaneauthusaun, haeautheauwaunauthasanauau haugaunaanee, hanau hethāde naa henane naa haudneenesedaude, hathauhaugaanee: 5 Hanau vechaudauau nadedanenau, nau nenesedaunānauau vevethahenauauwuu. 6 Hee Hejavaneauthusaun hanaāejasesenethaunāde. Nau hāeouchauau hauauwu, vanenenaja haejedauaunanenau henedaehauhau, Vahadāhene, jevawauchuthajau Nananene: haugau wauchāhenau hadjedāne naudauauwuu, hathauhuk: 7 Nanaa nāejewauchanavadede dauudasathane: hau vavade nehedaun hanadede, nau naudautheau hadeenanedanede. 8 Hanau nananenau nanethenanenau naunaudāhenau, nanethenu vanenanenauau, nau naāēdauwunauau hanesāde yehau nau naāejathāaude; nau jasaa, Nahāje, hathauau nau jaunaude; nau naudautheau, Nesede, hathauau, nau nanesedaude. 9 Hejavaneauthusaun hāenedauwaudauau nuu hayauhuhau, haegaugauanava, nau haenauthegauthaagu, nau hanaāēdauwunaude henanedanau hethāethauguhādaunau, Hadāedauwunathava, Haunauau nāhauwuveehau vasee hethauwuthajuhu (naa hathāde henane), hegau, hehauwuu haduu Israel. 10 Nau henee hathāautheavathee, hāejaenuusathee hauauwuu, haeveehanauau wauwaune haenanedanene henee neasauwauvāhenith. 11 Nau hethauwuu jasaa hese, hanaāehaude hedan Nain haseenauryāgu; nau haewauthanenau hethauguhādaunau henethaunādaunau, nau hauwauhuu henanedanede. 12 Wauhā hāayānausade hejavaaa dajanaunaa hedan, naune, naa najaa henane naunudanade, jasāsau henaune, nau haenevesānene: nau haewauthane henanedanede hehethee hedan haenethaunaa. 13 Nau hāenauhauwaude Vahadāde haeauwunauna, Najenaudāve, hathauhuk. 14 Nau haedasa nau haevasane nauaunechauthau: nau hethāenauaunechauhādaunau haedādauyauginenau. Haunaua, hāedauwunathane, Thauwauthe, hathauhuk. 15 Nau henee nenajaa haethauwaudaagu, nau haenaāejasesanadede, nau hanaāevenaude henaunene. 16 Nau nāthajaude haedasā vahee: nau haevaveenethedaunanauau Hejavaneauthu, Havathee haeyāhe hanejauaude hadedanene; nau, Hejavaneauthau haenauujādauna henesaunau, hahagaanee. 17 Nau nuu dauauthedaunenede haenanadesanaune vahee Judea, nau nanadee gauānee vedauauwuu. 18 Nau hethauguhādaunau Jaun haeauthedaunaa vahee nuu hayauhuhau. 19 Nau Jaun haeadetha hanesenethe hethauguhādaunau haeyethautheava Hejavaneauthusaun, Gauhanane henee waudaudjaude? nau wauāthe gauhadnaudenauhauwau jasaa? 20 Hāedauchauthee henanenauau, Jaun Dusaayāhe janādauthēavānauau Nananene, hathauhaugaanee, hanaāenaudedauthee, Gauhanane henee waudaudjaude? nau wauāthe gauhadnaudenauhauwau jasaa. 21 Nau vavade hāaouchauau haenayauha haewauthanenau vavavāuhuhau nau havathee haugauwude, nau wauchāhenith haujaun; nau haewauthanenau nanenauguhuhau haevana nauhauthau. 22 Hejavaneauthusaun hanaāēdauwunāthee, Najajathāauau, nau hadāedauwunauva Jaun hathāhaugaanee, hayewhu hanathauhauthāna nau hathadauvana; hasejaenauhauthāde nanenauguhu, jeneejavesāhe daujavesade, naunaujaanee hedaugauwudaunenau dauuyaudahethee, hayājadāhe daunedauvade, gaujauaudahehe daujaethauwauthede, hadavenuhu hethadenee waunauyaanee dauauthedaunade. 23 Nau hauwunaunade daun najewauchuthajaudaunāde. 24 Nau hāejathāaunethe Jaun hedautheaunau, hanaāejasesanadedauau henanedanede hasenaedenethe Jauneau, Hayew nananena haewaunenauhauthaunenau nauaunee? gaugauguyāse daunauuvasee? 25 Hau hayew nananena hāewaunenauhauthaunenau?

Gauhenane hedāchaunau hejajehaunenau hedāchaunau? Naune, nethāeneenuhuthee, nau neneenaedethee thanāsee nenauchuwunethe hedauauwunenenu. ²⁶ Hau hayew hāewaunenauhauthaunenau? Gauhaeyāhe? Haa, hadāedauwunathava nananena, nau javaāsee haeyāhehau. ²⁷ Naa nananene, wauthaunese, Naune, hadjejenanauau Naudautheau hathaaguna, hadnesedaunāna hauvaunenau sayānee Nananena. ²⁸ Hanau nāedauwunathana, hadedanenu nethāenesaunevāna hesānauau hehauwujavaāse haeyāhe hathāde Jaun Dusaayāhe: hau hena haugajehede hanedauhuk henajanedanene Hejavaneauthu javaāhehuk. ²⁹ Nau vahee henanedanede hathāenedaunāde, nau hauāyāhehauau, hanaāechuwauthethajaudaunauthee Hejavaneauthu, haenethedusaanā dusaayāhew Jauneau. ³⁰ Hau Nesethajauhuhauau nau nanavaavehehau yese nehayau haeausagudenauau hevathehādaunene Hejavaneauthu, haejenethedusaanā (Jauneau). ³¹ Nau Vahadāde hahagu, Hayew naudneedajenehethau henanedanede nuu henaedede? nau haethahenauthe? ³² Waude dāeyaunauauau hathahethee theaugunauthe haudaunanauauwuu, nau danadethadethee, nau nanāhethee, Nevadauhana, hau nananena nejevadana; naudauwuthajaudauwunana nananena, hau nejevewauhuna. ³³ Hanau denausade Jaun Dusaayāhe dejevethee jauaujaunau nau dejevanaa vasevenenaje; nau nananena nanethenaude haujaun, nethauna. ³⁴ Heau henane daunausade dauvethede nau dauvanaa; Nauhauvaa naa henane naudaudāhe, nau vasevenenajevanehe, henedaehauhau hauāyāhehau nau wauwauchudauhuhau, nethauna. ³⁵ Hau haeyaude chaunuwuthajaudaunaude vahee hedāeyaunewau. ³⁶ Nau hanesāde Nesethajuhu haeadetha haudjewaunenethevethēhevāde, nau haeyehau haejedā Nesethajuhu hedauauwunene, nau haejanaugu hadvethede. ³⁷ Nau, naune, hesā hedan, haeauhaugane, hāaenaunaude Hejavaneauthusaun daujanaugunith hadvethēhenith Nesethajuhu hedauauwunene, haejāchaude jāāvasaa chauayau, ³⁸ Nau haetheaugu hegauwune heauthene haevewau, nau hanaāejasesahesadede heauthene hee hedejee nau haehēhenauwu hee henethaanene, nau haenedane heauthene, nau haechauane hee chauayau. ³⁹ Wauhā Nesethajuhu hāadethaude hāenauhauwaude, haejaevenanadethade, Naa Henane, haeyāheyaugu, hanaenaunaude daunhadāhenith nau daunhathāhenith nuu hesāne hevasanādaune: hanau wauwauchuduhu, hahagu. ⁴⁰ Nau Hejavaneauthusau hanaāēdauwunaude, Simon, haudnāedauwunathane nananene. Nau hanaāenehethaude, Hechauhauthethāhe, nanehe. ⁴¹ Hena jasaa sayānedanauwuyau haenesenenau hesayānedanauwunādaunau: hanesāhenith yauthaunevadadausauau vāejethā, nau jasaa yauthauyauau. ⁴² Nau hāeyauhuunee haunaudauhudaunene, haenathauaunegudanauwuna nesauuu Jeāedauwune, hanaane hevehauthādaune javaānee? ⁴³ Simon hanaāējaāedauwunaude, Nauchāe nananenith heneehējavaāgudanauwunaune. Nau hanaāēdauwunaude, Nananene neaenauwu. ⁴⁴ Nau hanaāeyethaagude hesāne, nau hanaāēdauwunaude Simoneau, Gauhaunauhauwau nananene naa hesā? Nananenau nejedānau haudauauwuu, nananene hāehauwuvene naje hee nauaudau: hau neheahesadede nauaudau hee hedejee, nau neheahenauau henethaa. ⁴⁵ Nananene hāehauwunedane hau naa hesā hāenauusanaunauau hehauwuthaujenenedane nauaudau. ⁴⁶ Naudauguhua nauuu javeda nananene hajechausānene hau naa hesā nechauanauau nauaudau hee chauayau. ⁴⁷ Naa hāedauwunathane nananene hewauchudaudenau waunauthanee gaunudanauwunade; hanau dauvehauthāde javaānee hau daun vanehaa gaunudanauwunade vavade hasevehauthāde vanehaa. ⁴⁸ Nau hanaāēdauwunaude hesāne, nananene hauwauchudaudenau jaegudanauwunane. ⁴⁹ Nau hethāenedauguvādaunau dauvethēhethē hanaāejasesanadethee hegaugauuthajaudenenauau hanaa naa negudanauwau wauchudaudenau jea? ⁵⁰ Nau hanaāēdauwunaude hesāne, Nananene hadethauwaudaude henayauhāne nananene;

najesa hadnauwauthenesane.

8

1 Nau hethauwuu waunee haejathāau nanadee hadauchanenee hedan nau hajaseehedan, dauaunauthedade nau daunaunauhauthethāde neethajaude waunauyaunee hasaunee henajanedanene Hejavaneauthu: nau vadadauchunesenee haenethaunaa, 2 Nau jasaa hesānauau, haenayauhau dewauchāhenethe haujaunau nau vavavāauhuhauau, Mare haseadagu Magdalene, naunudanavathe nesaudauchu wauchāhenethe haujaunau, 3 Nau Joanna henene Chuza Herod hadāhevāhe, nau Susanna, nau haewauthanauau hauthauauau, hevenādaunau hethāenetheyaunenenau. 4 Nau hāeneenawauthaa henanedanede dauauāchaudenee, nau haedasaa hehethee nanadee hedane, hanaāeanadede jegausauhānee: 5 Jenayāhe haewauneneāgude hejenayaunau: hauthauau haejajanesanau vaunaa; nau haeauguhudaunene, nau neahehauau hejavaa haeaudauvanauau. 6 Nau hauthauau haedasegaugauusanau hauunagāe; nau chauchaunu hāevesuu, haenadadanau, hanau daujenajenee. 7 Nau hauthauau haejajanesanau hegauau dauchuuwusee; nau dauchuuwuse haenauguveseaunau, nau haeajedaunanā. 8 Nau hauthauau haegaugauusanau dasee hadauuthadee vedauauwuu, nau haeveseaunau, nau haeneeaunau vadadausauau jenayaude. Nau hāenehedauau nuu hayauhuhau, haevasenehe, Daun henaudaununede, nanedanedaudevade. 9 Nau hethauguhādaunau haenaudedanaa, duthanau nuu jegausudede, hathāhuk? 10 Nau hahagu, Nananena vanenana haudnaenauwuna jaeyaunau henajanede Hejavaneauthu: hau hauthauauau janegausauhuthee; hadnenauhauthāthee havajenauhaudauwu, nedauvahehauau havajaenauwu. 11 Wauhā, heyew hasauau jegausudede: Jenayaunau hedenehede Hejavaneauthu. 12 Henee vaunaa nanathee nenedauvathee; hanaāenauusade haujau, nau nedanauwunāthee hanadede hedahenauau, naseduhuu hethauwuthajauau, nau hadenanedanena. 13 Henee hauunaugāe nanathee, nenedauvanauthe nesedanuu hanadedaunau nauguu haunauwuthajaude; nau nuu hehauwuthājenenauau, vanehaa nethauwauduu, nau nauauchaudaunauthe vasehadede naneenaunegauhuthee. 14 Nau henee nejajanesāe thauhauthauchauyauau dauchuuwusee nanathee, hanesenedauvanauthe, naneejathāauthee, nau neenadejethathee hee haunaunethaude nau nethauyādahede nau haunauwudaude, hee nuu henaedede, nau hehauwunauuchaudenauau vevenaundenau hadauuyauthaunee. 15 Hau henee hadauuthadenee vedauauwuu nanathee, hethauvahethee nau hethadenee hedahenau nenedauwauduu hanadedaunau, naunaunedethee, nau nenauuchaudethee vevenaundenau hee jenauwauaunee. 16 Hegau henane, hāesedeauchauuu nauauuthayau, hehauwaugau hee vasenau, nau wauāthe hehauwujenane thānee hauvaa; hau nethānauau nauauuthayau neetheaugunee daun janedāde hadenauhaudauau nauauuthayāgu. 17 Hayewhu hehauwuyauthesa, haudjauthasenesee; wauāthe hayewhu hehauwuyau hadjaenaunee nau hadnejaunauau hauthasauau. 18 Haunauyauhaudauwuu hanathadauvanā: daun nanethenaude, nananede haudnevenade; nau daunjanenethenaude, nananede haudnedanauwunade daun henetheyaunau. 19 Hanaāedasāde henaune nau henethesaunau, nau haejenedasaa hee dauneethenedaunenee. 20 Nau haeāedauwunaa jachau hathāhuk, Hānau nau hāthesaunauau theauguthee jathee, vanadaunauhauvānaune. 21 Nau hanaāauchuhananadede nau hanaāēdauwunaude, Nānau nau nāthesaunauau nuu nanathee nenedauwauduu hedanadedaunene Hejavaneauthu, nau naasedauthee. 22 Wauhā hethauwuu jasaa hese, haejedā thewaunaa nauguu hethauguhādaunau: nau hanaāēdauwunaude, hadeyehaunau hauchaunau neajee: nau hanaāejathethuauthee. 23 Hau hajecheuauthee haenaugau: nau hanaāenauasaa neajee haenaudasa; nau haechauchaunane naje, nau haenedaudauwugaujauadahede.

24 Nau hanaāedauchauthee, nau haeauwaudananaau, Hechauhauthethāhe, Hechauhauthethāe,* gaujauaudāhenauau, hathauhaugaunee Hanaāethauwauthede, nau hanaāeneudauau hasāse nau dasenaunanaunee naje: nau hanaāedaunauuu, nau hanaāedādauyauau. 25 Nau hanaāenehethaude, daude hadethauwaudadenenau? Nau haenāthajaunauau haejenaunethajaunauau, Dauhuthenane naa, hanathadagaunee; haauchuwudede hasāse nau naje, nau hanaāethauwaudaunāde. 26 Nau hanaāenuusathee vedauauwuu Gadarenes, hauchaunau Gananee. 27 Nau hāeyehaude vedauauwuu, hena haenuchaunaa jathee hedan jachau henanene, haenethena haujaun dajechauau, nau haevedauauchauna, haejenaede hauauwuu, hau nedauthānavathe gaujauaudahehehau. 28 Hāenauhauwaude Hejavaneauthusaun haevasanade, nau haechaagujanaugudauna, nau hanaāevasanadethaude, Hauddusehathe, Hejavaneauthusaun, Nananene Heau Hejavaneauthau javaājauuthee? Nenedauwunathane Nananene jevanaunauchauthehe. 29 (Hanau haenesedauwauna wauchāhenith haujaun hadjenauahenith hehethee henanene. Hanau nauaunee dauhusedanāde: nau naunaunehade neduguhude heee vāejethāduguthaunau nau nesaunajethaunau; nau haegaugauchauagude heeduguhudaunau, nau haejathethasauaunaa haujaun hesee nauaunee.) 30 Nau Hejavaneauthusaun haenaudedanaa, Haudusee? hathāhuk, Nau hanaāēdauwunaude, Waunauthade: hanau dewauthanethe haujaunau hethāchaudaunādaunau. 31 Nau haenedauwunanauau hadjenesedauwaunathee hadjeyehauthee hethauvaa. 32 Nau hena haewauthanaauau neauthuwauchu nevethethee hauanee: nau haenedauwunanauau hadjenanāthee wauhaunee. Nau haejenana. 33 Hanaāenauahethee haujaunauau hehethee henanene, nau haewauhaunesanaauau neauthuwauchuu: nau vahee neauthuwauchu haejathegauhunauau neenanee janahuu yese neajee, nau haevanadeavenauau. 34 Hāene henee nachauwauthee daunauhauuu hasedaunenene, haedaugauhunauau, nau haejathāaunauau nau haeauthedanauau hedan nau vedauauwuu. 35 Hanaāeyehaudenee hadnauhauwuu daun hasedaunene; nau haedauchau Hejavaneauthusaun, nau haeveehau henane, heneenenauthāde haujaunau, haetheaugu heauthene Hejavaneauthusaun, haedāchaunene, nau haechuwuthajaune: nau haenāthajaudene. 36 Henee nenauhauwauthee haeauthedanauau neesenayauhade nenethenaude haujaunau. 37 Hadauchaa hathāauauvaa Gadarenes gauānee haejathethajenāhenauau; hanau dauusāhede: nau hanaāeyehaude nauauhuu jethe thewanaa, nau hanaāējaesade. 38 Wauhā henane nenauthāde haujaunau haenehethaa hadnenethaunāde: hau Hejavaneauthusaun haejathethajenāhe, hathauhuk, 39 Jaeyehau haudauauwuu, nau hadnauhauthethā hathāenavasauau hayewhu Hejavaneauthau hasehāne nananene. Nau hanaāejathāde, nau haeautheda nanadee hathāaunee hedan hathāenavasaunee hayewhu Hejavaneauthusaun hasehāde. 40 Nau hethauwuu hāejaenauusade Hejavaneauthusaun, henanedanede haeneethajaudanaa: hanau haevadauyauhauwau. 41 Nau, naune, haejenaussa henane Jairus haseagu, nau hadāhevāhe vevethahenauauwuu: nau haeuāneseve Hejavaneauthusaun heauthene, nau haedetha hadjewaunejedānith hedauauwuu: 42 Hanau haenesāhene hedaunau wauau hanesenee jajenevāhe, nau haeayānajane. Hau hajesesade henanedanede haevauhaunaa. 43 Nau hesā haeevathaude nesenee jajene heee, haevathede haunauude hevāejethāwau heee naudaunehāhehau, hau haejenayauhau, 44 Haedasa hegauwune, nau haevasane naunauchuu heduwune: nau chauchaunu haejenevathaude. 45 Nau Hejavaneauthusaun hanaa navasanāde hahagu? Hāevahethedauwaudenee, Peda, nau hathāenethaunāde, Hechauhauthethāhe, henanedanede vauhaunane nau naneethenane, nau hanaa navasanāde, nesehene? hathauhaugaunee. 46 Nau Hejavaneauthusaun, hanaadee

* 8:24 Possible missing “h” in “Hechauhauthethā(h)e” (“Master”).

vasanānu, hahagu: haenauwau daujasesenauauau vadaude hehethee nananenau, hahagu. ⁴⁷ Nau hāenauhaudauau naa hesā daujeyauthesee haejeyehau haeahenauau, nau hanaāechauāgujanau gudaunaude, haeauthedauna hauthasee vahee henanedanede hathavasanaude, nau hasenayauhāde chauchaunu. ⁴⁸ Nau hanaāēdauwunaude, Nauddau, nanehāuwauthenaedene: nananene hadethauwuthajaude henayauhāne nananene; najesa haunauwuthajau. ⁴⁹ Hajesanadede, hena haejau hanesāde hehethee hadāhevahew vevethahenauauwuu, haeāedauwuna, Haudauna najaa; jevajenaunevene Hechauhauthethāhe. ⁵⁰ Hau hāenedaunāde Hejavaneauthusaun, haenaāēdauwunāde, jevanāthajau: hethauwuthajau vavade, nau haudnenayauhade, hathāhuk. ⁵¹ Nau hāejedāde hauauwuu, henanedane haejevadaujedāne, vavade Peda, nau James, nau Jaun, nau henesaunaune nau henaune hesāhedāeyaune. ⁵² Nau vahee haevewauhudaune, nau haeaudauwuthajauhā: hau hanaāenehede, Jevavewauhuu; hehauwunaja, nauthe naugauhude. ⁵³ Nau haeauthanauau haevachunaunanauau, dauaenaunauthesee daunajanethe. ⁵⁴ Nau haevanudana, nau hanaāedanaude hejadenene, nau hanaāanadethaude, Hesāhee, thauwauthe, hathauhuk. ⁵⁵ Nau hevadathuwu haejaedasaa, nau haethauwauthe chauchaunu nau hanaāenehede hadnauchauvavathe. ⁵⁶ Nau henehā haegaudauwuthajaunenau: hau haeāedauwuna hadjāedauvanethe henanedaa hasedaude.

9

¹ Hanaāadethaude vadadauchu nesenee hethauguhādaunau hauānee, nau haejaanauwuna naudahede nau hadvaheneedauthesee nanadee vahee haujaunaa, nau hadnenayaudethee haugauwude. ² Nau haejenana hadnauthedaudauwunethe henajanedanene Hejavaneauthu, nau hadnenayauhaunethe hasauwauvahehehau. ³ Nau hanaāēdauwunaude, Jevaedanauwuu hayewhu hee hajavechaudenenu, daudause haugaudahunau, daudause newaugusajaānauthau, daudause jauaujau, daudause vāejethā; daudause jevanesauguvechudaunaa. ⁴ Nau daun hauauwuu hadaujedānā jenaadauna, nau jenaathejathāauna. ⁵ Nau daun hajethauhauvādaunenau, hāenauahenā hena hedane, hadegauyāējaheva naudauuyāgu hadneaenaunathee. ⁶ Nau hanaāejathāauthesee, nau haehedesanauau hauauwudan, haeauthedaudauwuu hethadenee waunauyaunee, nau haevahenayauthānauau nanadee. ⁷ Wauhā Herod naja haenedauva vahee hanasedaudenenee hee: nau haejaene, hanau haenaasenehedanene gauuu, henee Jaun jaegauhāde hehethee denajaa; ⁸ Nau gauuu, henee Elias naunauhauthethāde hedanayau: nau hauthauauau, hanesāde dajechauau haeyāhehauau jaegauhāde. ⁹ Nau Herod haenehe, Jaun nedavaāsauau: hau hanaa naa, nanedauwauthau? Nau haevadaunauhauva. ¹⁰ Nau vadauhanauau, hāejaenuusathee, haevahauthedaunaa hanasedaunethe. Nau hanaāedanaude, nau hanaāejathāauthesee hevenanee hese hadaunechaudanee hathauau hedan Bethsaida haseāgu. ¹¹ Nau henanedanede hāaenuu, hanaāethauguhauthee: nau haeesedana, nau haeauthedauna hasaunee henajanedanene Hejavaneauthu, nau haenayauha hathāevadaunayauhathee. ¹² Nau hāayānaesade, hanaāejenuusathee nesenee, nau hanaāenehethāde, Nanehāejathāaudenee henanedanede, hadeehaudenee hauauwudan nau vedauauwuu nauanee, nau hadenethee, nau hadejasedauthesee vethewau: daunechaudaa hadaunauau. ¹³ Hau, Venaa nananena hadevethedane, hathauhuk. Nau hanaāēdauwunauthesee, Hau nanethenauwunauau hehauwujavaānee hayauthaunāe jauaujaunau nau hanesethee nauwu; hanāyehaunee nau haunaudau-nauhuu vethewau hee vahee nuu henanedanede. ¹⁴ Hanau wauau haeyauthaune vasevadadausauau henanenauau hanaadauchuthee. Nau hanaāēdauwunaude hethauguhādaunau, Janauguhā yauyauthauyauaugunauha. ¹⁵ Nau hanaasedauthesee, nau haevajanauguhanauau. ¹⁶ Hanaāedanauau hayauthaunanenee jauaujaunau

nau hanesenethe nauwu, nau hanaāējenāauguaude hejavaa, haevevethasa, nau haenaāējeanaauau, nau hanaāēvenaude thauguthāhehau haudjenanauwunethe hathaājedaunenee henanedanede. ¹⁷ Nau haevethehedaune, nau haevahegaudaudene; nau haeauānenau jeyauwaunau hathāenathaudāe nesenee hanaadauchāe hanechauchaunāe nenethaudanee. ¹⁸ Nau hethauwuu, haenesenane, dauvevethahede, Hethauguhādaunau haenethaunaa: nau hanaāēnaudedanaude, Hanaa nenehede henaneda daunanenau? hathauhuk; ¹⁹ Hanaāauchuhananadethauthee, Dusaayā Jaun; hauhauthauauau nethee Elias; nau jasae nethee hanesāde dajechauau haeyāhehauau jaegauhāde. ²⁰ Hanaāenehethaude, hau hanaa nenehede nananena daunanenau? Peda hanaāauchuhanāedauwunaude, Chris Hejavaneauthau. ²¹ Nau haeneenadauduvā, nau haenesedauwaunā hadjāedauwunaunethe henanedanau henee; ²² Heau henane hadnasenede wauthanee heee hayewhu, nau hadnausāguthāde vachaugānanenau nau naja vevethahevahehauau nau wauthaunauhāhehauau, nau hadnaade, nau hadjaegauhāsanade nasese, hanathauhuk. ²³ Nau hanaāēvahāedauwunaude, Hith henaneda jethauguhānaugu nanehanaunauchauthehadede, nau jeedane henaugauchu hayauwusenenee, nau najeethauguhaa. ²⁴ Daun haunaugaunayaude hedenaedede hadnanadede: hau daun hanadede hedenaedede heee nadanayau, nananede hadnenayauhadede. ²⁵ Hauddusedau henane, vahesedanauaugu hathāauauvadenee, nau hanahadagu, nauwauāthe hausāguthadagu? ²⁶ Daun naudauthedaunāde nau nadanadedauau, nananenith Heau Henane haudnaudauthedaunaunith, hāenauusathe nehayau hadauvasāthanith, nau Henesaunaune hadauvasāthanith, nau vadanee hauthaunauau hadauvasāthanethe. ²⁷ Hau hadethauwauthedaunathava hauthauauau theauguthee hede, haudnehauwuvajadauwu gaujauaudahede, haunaude haudnauhauuu henajanedauene Hejavaneauthu. ²⁸ Nau hethauwuu wauau hanasaudauchuse hāesenehede, Hanaāedanaude Peda nau Jauneau nau Jameseau, nau hanaāēnauauihusathee hauanee hadnevevethahethee. ²⁹ Nau hajesevevethahede haenauasāaune hedauchaveau haenathadene, nau hedāchaunau haenaujaunenau nau haenaunauaugausauaunenau. ³⁰ Nau naune haenadethaa hanesenethe henanenau, haenanenenau Mosaseau nau Eliaseau; ³¹ Daunauhauthethāde hedanayau haenausāaune, nau haeauthedaude haudgaujauaudāde hadvathechauchaunaude hehethee Dādaunedan. ³² Hau Peda nau hethāenethaunādaunau haenauwaunanenau: nau hāauwaudauunethe, haenauhaudauwunenau haenauasāaude, nau hanesenethe henanenau haenethauguvaa. ³³ Nau hethauwuu, hāenauthāde, Peda hanaāanadethaude Hejavaneauthusaun, Hechauhauthethāhe, hethadee hasanedaunee hede: nau hadenesedauna hanasāe nenaunau; hanesadee Nananene, nau hanesadenee Mosese, nau hanesadenee Elias; haejaene daunhasenehede. ³⁴ Hajesanedede, haejenauusanau henaunauade, nau haeduguaunā: nau haenāthajaunaunauau daujedāthee henaunauadee. ³⁵ Nau haejeanadedauone hehethee henaunauadee, Naa nananede Navechauthau Nāa: nedaunaa, hāheagu. ³⁶ Nau hāesanadedauone, Hejavaneauthusaun haenesenane. Nau haeyaudenauau, nau haejāedauwunanaunauau henanedane hena hesee neanāthauhauuu. ³⁷ Nau hethauwuu, dauauthesenenee, hāejejanauhusathee hehethee jauaudanee, haegauāhenenau henanedanau hejajedauaunādaunenau. ³⁸ Nau, naune, henane hehethee henanedaa haevasanade, Hechauhauthethāhe, nenedauwunathane Nananene, daugauhauwune nāa: vavadenaanesāde nadāeyauneve, hathauhuk. ³⁹ Nau, naune, haujaun hedanāde, nau chauchaunu haedauyānade; nau haethauwuguthaa haevevechauchaunaude jeda, nau haeasenehaa haejechuwauthenauthaa. ⁴⁰ Nau nananenau neauthewu hāthauguhādaunauau hadnausāguthauthee; nau nejeneedauthee. ⁴¹ Nau Hejavaneauthusaun hanaāauchuhananadethaude, Hau hāhauwuthauwuthajau nau daujechuwauthenaedene, haudedauhujesenedauguvathe, nau haddauhujesenethauguvathe? Jāsene nananene hāa hede. ⁴² Nau hajesejaude,

haujaun haeauNEGUTHAA, nau haethauwuguthaa. Nau Hejavaneauthusau haeneneuva wauchāhenith haujaun, nau haenayauha dāeyaunauau, nau haejaevena henesaunaunene. ⁴³ Nau haevagaugauanadauwu hasevasenaudāhenith Hejavaneauthu, Hau hajesegaugauanaduu haunauude vahee hayauhuhau Hejavaneauthusaun hanasedaunith, Haeāedauwuna hethauguhādaunau, ⁴⁴ Chuwauthee nuu hanadedaunau jedānauha haunaudaununenau; hanau heau henane hadvenavathe hejadenene henanenau. ⁴⁵ Hau haejaenauwu nuu hasenehenith, nau haeyaudaunaunauau, haejaenauwu: nau haeedaunaudedanaunauau hasenehenith. ⁴⁶ Hanaāegaugauuedaunee, hanaadee haudvasāthaa. ⁴⁷ Nau Hejavaneauthusaun, haeenauwu hanasethaujauthee hedahenauau, haedana dāeyaunauau, nau haeauyejanauguna, ⁴⁸ Nau hanaāēdauwunaude daun hanesedanaude nuu dāeyaunauau naneseedaunaa hadnesedanānau: nau daun nāsedanāde haudnesedanaude nājejenanādaune; daun javaānadavenuhunede haunauude nananena vahee nananede hadnaasevasāthaa. ⁴⁹ Nau Jaun hanaāauchuhanāedauwunaude, Hechauhauthethāhe, neenauhauwaunauau hanesāde nenuguthaude haujaunau hee haneseede; nau needauduwaunauau, hanau dauhujenethaunānauau. ⁵⁰ Nau Hejavaneauthusaun hanaāēdauwunāde, Jevadauduvaa hāhauwasānavāne nanesevānauau. ⁵¹ Nau hethauwuu, hāenauauchaunee hadneejejanauhudanāde, haechuwuyethāne hadnehaude Dādaunedan, ⁵² Nau haeautheava sayānee: nau hanaāejathāaunethe, nau hāejedāthee hajasee hauauwudan Samaritans, hadnesaanudaunāde. ⁵³ Nau haejesedanaa, hanau dauyethāāsade Dādaunedan. ⁵⁴ Nau hāene hethauguhādaunau James nau Jaun daunauhauwunethe nuu, hanaāenehenethe, Vahadāhene, gaujevadaunedauwaune heseda hadjejanauhusanauau hehethē hejavaa, nau hadnevadauchauthee, neesedaude Elias? ⁵⁵ Hau hanaāeyethāādauusade, nau haeneneuva, Nananena hāhauwaenava daun vadathau nananena hadahena, hathauhuk. ⁵⁶ Hanau Heau henane hehauwuujau hadnenauaudede henanedanau hedenaededaunenenu, hau hadnenayauhaude. Nau hanaāeyehauthee jasia hajasee hauauwudan. ⁵⁷ Nau hethauwuu, hajesethaugudethee vau, jachau henanene hathāhuk, Vahadāhene, nananenau hadnethauguhathane nananene daun nananene hanasesanaune. ⁵⁸ Nau Hejavaneauthusau hathauhuk, Gauauwuauau neyāethee, nau neaheauau hejavaa nenauhuchauethee; hau Heau henane heyahuunee nedauusevānede. ⁵⁹ Nau hanaāenehethaude jachau, Jethauguhu, hau hathāhuk, Vahadāhene, nedauau nawaunejenanau nāsaunau. ⁶⁰ Hejavaneauthusaun hanaāēdauwunāde, Nanehajenauthee gaujauaudahehehauau negaujauaudāhenethee: hau jathāu nananene nau haddauthedaude henajanede Hejavaneauthau. ⁶¹ Nau jachau jee, hathāhuk, Vahadāhene, hadnethauguhathane nananene; hau jechuwauthehe nedauau nawaunenaunenechauthaunauau, hanedauthee nayāenau naudauauwuu. ⁶² Nau Hejavaneauthusaun hanaāēdauwunāde, Hegau henane, dunauaugu thauauauwujethau, nau jaaāyangu, hehauwunaathā henajanedanene Hejavaneauthu.

10

¹ Nuū hee Vahadāde haeautheava hauthauau nesaudausauau jee, nau haeyeyethautheava hanenesenethe sayānee haunauude hedan nau vedauauwuu, haudnanādaunauusade. ² Henaheee hanaāenehethaude, Jenayaunau hethauwuwauthāe haneseuu, hau nesethāhehauau hajewauthathee: vevethahee nananena hee Vahadāde deseujenayaunau, hadejejenanaude nesethāhehau hejenayaunaa. ³ Jathāuau nananena hathāāsana; naune nananenau janenanathana neānee waude haudāsaunauau hejee hauchāhee. ⁴ Jevanewuunauwuu nesevāejethāwaunau, newaugusajaānauthau, nau wauaunau: nau jevanaunenāthedaunaa henane hauvaunenau. ⁵ Nau daun hauauwuu nananena hadaujedānā, Dādauyauha nuu hauauwuu, nedauau hadeva.

6 Nau hith heau dādaunee hanedaulyaugaune, nananena hadādaunahedaunenau hadnaadaudauyānusaa: hau jene hadjaegauusedaunāna. 7 Nau vavade hauauwuu hadanedauva, hadevetheva nau hadevanava daun hayauhuhau hauchauvadenenau: hanau nesethāhe naunaudaunade. Jevaenejedāe hauauwuu. 8 Nau daun hedan nananena hadaujedānā, nau hesedanānagu, hadevetheva daun hayauhuhau haje-nanauwunādaunenau: 9 Nau hadenayauhauva hasauwauvahehe daun hanedaude, nau hesau jeenanethāedauwunauna, Henajanede Hejavaneauthau hayāedasāna. 10 Nau daun hedan nananena hadaujedānā, nau jesedanānagu hadjajathāauva hasesana hehethee hadaugauchaudāe hauauwudan, nau hesau jeeanesenehethauna, 11 Dause nauthejahathaugu nananena hadedanaunenau, heejahadāheagu, neyeseгаunuhudee nananena: hau nananena hadethauwaenava nuu, henajanede Hejavaneauthau hayāedasāna. 12 Hau hadāedauwunathava, hadjavaānanethauayauau hena hesee heee Sodom, javaānee heee hena hedan. 13 Naunauthauau hadnauauchaudauna, Chorazin; naunauthauau hadnauauchaudauna, Bethsaida; hanau havathenayauthau heheenesedaudeneagu jedauwuu Tyre nau Sidon, nuu hasehana nananena, dajechauau neaunaunevethajauduuhewauchudaudenenau, needanaugudaunee neauchuwaudenee naujuwau nau jaetha. 14 Hau hadjavaānanethauayauau heee Tyre nau Sidon hāenaudedauwunadedaunee, javaānee nananena. 15 Nau nananena, Capernaum, hanejanana yese hejavaa, hadjaejanauhane yese hadauveeyauau. 16 Daun hajaathehādaunenau nananena hadjaathehānau; nau daun hauwauchānavādaunenau nananena haudwauchānavānau; nau daun nauwauchanavāde hadwauchanauwaude najejenanādaune. 17 Nau nesaudausauau haejaenauusanauau nau guu neethajaude, hanaāedauwunauthee, Vahadāhene, dause haujaunauau hanechauwauaunaunauau heee nananene haneseede. 18 Nau hanaāedauwunāthee, Nenauhauwauau Haujau waude jahagude hasejanesaa hehethee hejavaa. 19 Naune, Nananenau vanenathana nananena naudahede hadnauguhudaunauna seseyānauau nau hauwauhaudathee, nau nanadee vahee henaudahede haujau: nau hegau hadneaseneva. 20 Hau vahee nuu jevaneethajaudauwuu, haujaunauau dauchauwauaunauna; hau henauthauneneethajauau hanau nananena haneseedaunenau dauwauthaunauhuu hejavaa. 21 Hena hāauchaauau Hejavaneauthausau haeneethajaune hevadathuwu, nau hanaāenehede, Nananenau vaveenethedaunathane Nananene, Hau Nāchau, Vahadāhene hejavaa nau vedauauwuu, hanau Nananene dauyadaunaude nuu hayauhuhau hehethee nadaunahehehauau nau hathauwunanenauau, nau hadnauhauthehauva dāeyaunauauau: hethauwuu, Nāsaunau; waude hethadee nananena hasesānenau. 22 Vahee hayauhuhau vanenānau Nāsaunau: nau hegau henane haenauna hanaadāne Heāhene, vavade Vāsaunau; nau hanaadāne Vāsaunau, vavade Vāa, nau nananede hanaadāne Heāwaune hadnenauhauthehāde. 23 Nau hanaāejaedaugauhauwaude hethauguhādaunau, nau hanaāanadethaude hevenanee, Haunauwuthajaunauha hasesānenau dauhunauhauwuna hayauhuhau hānauhauthaunenau: 24 Hanau nananenau hāedauwunathana, waunauthathee haeyāhehauau nau nenauchuwuthee nevadaunauhauduu hena hayauhuhau hānauhauthaunenau, hau hehauwuthauunauhauwuu; nau devadaunedauwauduu hena hayauhuhau hānedauwauthaunenau, hau hehauwunedauwauwuu. 25 Nau, naune, jasaa nanavaavehe haetheaugu, nau haenaudayādauna, Hechauhauthethāhe, nauddusedane jethaujenee henaedede? hathauhuk, 26 Hanaāedauwunāde, Hayew wauthaunesaa nanavaavedaunaa? Hādusasauhaude nananene? 27 Nau hanaāedauwunaude, Nananene hadvechauthau Vahadāde nananene Hejavaneauthau nau guu vahee nananene hadahaa, nau nau guu vahee nananene hadathuvaa, nau nau guu vahee nananene hadāhedaunaa, nau nau guu vahee nananene haugaugauuthajaudenaa; nau nananene hanedaudewau waude nehayau

nananene. ²⁸ Nau hanaāēdauwunaude, Nananene hethauvāne: nanehasedaune, nau nananene hadnenaedene. ²⁹ Hau nananede, vanadauchuvanadede, hanaāenehethaude Hejavaneauthusaun, Nau hanaa nanedaudewau? hathauhuk, ³⁰ Nau Hejavaneauthusaun hanaāauchuhanēdauwunaude, Jasaa henane haejathāau hehethee Dādaunedan hese Jericho, nau haeesedanaa havedehewau, haethauwujedaunaa hedāchaunau, nau haeenesenehaa, nau haejathāaunenau, haenauthaa dauhayānaja. ³¹ Nau haejathedasaa jachau vevethahewau hehethee: nau hāenauhauvāde, haejavechauthaa gauchuhene. ³² Nau vavade Levite, hāedadauau hadaunith, haeeda sa* nau haenāuhauva, nau haejavechauthaa gauchuhene. ³³ Nau jasaa Samaritan, daujādade, haeedasa hadaunith: nau hāenauhauwaude haeauwunauna, ³⁴ Nau haeyehau, nau haedugudauna hadaunith, haeedaunauwuna javeda nau vasevenenaje, nau haedasana nehayau hedauneau, nau haenauuchauha vethehedaunauwuu, nau haeauhauna. ³⁵ Nau daunauganene hāejathāaude, haeadane hanesanene hevāejethāuau, nau haevana hadāhewau, nau hadaunaunehau, hathauhuk; nau daun hasegaujauauthedanānaune jee, hāejaenauusanaune nananenau hadaunaudaunathane nananene. ³⁶ Hayewnau nuu hanasāe, hadeanathaunau, henedaudevādaune hene neesedanāde havedehewau? ³⁷ Nau hanaāēdauwunaude hene heauwunaunādaune. Hanaāenehethaude Hejavaneauthusaun, nau jenaenesedaune nananene. ³⁸ Wauhā hethauwuu, daunausujavesathee, haenauusanaunau jasaa hajasehauauwudan: nau jasaa hesā haseagu Martha haejedana hedauauwunin. ³⁹ Nau haenahavāe Mare haseyaugaune, jea haejanaugude Hejavaneauthusaun heauthene, nau haenedauwaude hadanadedanene. ⁴⁰ Hau Martha haeedauwauchune dauwauthanee hasedaude, nau haejeedasa, nau hanaāenehethaude, Vahadāhene, gauhajeaudauvanade daujenuauthānau nahavaa daunesenesethānau? hāedauwunene hadenedahevānau. ⁴¹ Nau Hejavaneauthusaun hanaāauchuhanehethaude, Martha, Martha, nananene haunaunāhene nau dejanethajaudauwu waunauthāe hayauhuhau: ⁴² Hau hanesadee hayewhu chaunauguauau: nau Mare hayāchauhauau hene hethadene hadāde, hehauwuneejathechauhau nauthee.

11

¹ Nau hethauwuu, hene, daunausuvevethahede haedaunanene, hāejenedaude, hanesāhenith hethauguhādaune hathāhuk, Vahadāhene, jeechauhauthehāa hadnesevevethahee, waude Jaun jea neesechauhauthehaude hethauguhādaunau. ² Nau hanaāēdauwunaude, hāene nananena vanevethahenā jeenanesenehena, Hāsaunaunene Nananede hanedaude hejavaa, Vadanauha Nananene haneseede. Nananene hanajanede hanājaunauau. Nananene hathanavāane hadnaasedaunee hasauau hejavaa, nau jee nuu vedauauwuu. ³ Hejevenā hadaachusenee hayauwusenee vethewau. ⁴ Nau jeaegudanaunā hewauchudaunenedaunau hanau nechau nejaegudanaunauwunade haunauude hanesāde nethāesayānedanaunāade. Nau jevaechauhāa nedauvasehadee; hau haugaunayauhāa hehethee hadau wausauau. ⁵ Nau hanaāēdauwunaude, hanaa nananena hadnenedaehahede, nau hadneyehaude thaudajaa, nau hadethaude, Va, jeehe hanasāe jauaujaunau; ⁶ Hanau nādae daunauujādaunānau, nau nananenau haeyauhūnee nachauwaude? ⁷ Nau hehethee jedauwuu hadnauchuhanehede nau hadnenede, Jevajanethajuhu: dajanau wauwu haugauhude, nau nanesaunauau nanejauwu naudavāa;* nananenau nāhauwuneethauwauthene nau hajeneevenathane. ⁸ Nananenau hāedauwunathana, hadnehauwuthauwauthene nau hadvenāde hanau

* **10:32** Two words across a page (“haeeda” and “sa”) perhaps should have been hyphenated, giving “haeedasa” which, together with “haeedasaa”, occurs eleven times elsewhere in the text. There are no other occurrences of “sa” standing alone. * **11:7** Mid-verse punctuation could be either a colon or semicolon as the lower part of the punctuation is malformed. It was decided to use the semicolon, in line with the KJV, as the punctuation of the two texts often coincides.

dauhunedae hāwaude, auhanau daunenāhede hadthauwauthenith nau hadvenāde daun hadauchuvathehāthe. ⁹ Nau nananenau hāedauwunathana, Henedauwauau, nau hadnevenana; henaudethāe, nau hadneveedena; hewaudāhee (dajanau), nau hadnegaunedanauwunana. ¹⁰ Hanau haunauude hanesāde nethāenedauwaude neneaudauwaude; nau henee nenaudethāde neveenauau; nau henee newaudāhaude (dajanaune) hadgaunanauwunade. ¹¹ Hith hāahenau nedauwunānagu jauaujaunau jasaa nananena henesaunaune, gauhadvenaa hauunaugane? wauāthe nedauwunāhuk nauwu, gauhadvena hauchuhanee gauhadnanene nauwunenith seseyāne? ¹² Wauāthe nedauwunāhuk naunau, gauhadvena hauwauhaudanethe? ¹³ Hith nananena, hauhauganenagu, hadaenava hadnesevenauna hethadenee venadedaunau nananena hadāeyaunevenau: duthāee nananena hejavaa Hāsaunaunenau hadvenāva Vadanauwauthauwu nethāenedauwunauna? ¹⁴ Nau neausāguthaude haujaun, nau heehauwanadene. Nau hethauwu hāejathāaude haujau, hanaāejaanadede; nau henanedanede haegaugauuthajaudene. ¹⁵ Hau jasaa hahagu, Nausāguthaude haujaunau hee Beelzehub najane haujaunaa. ¹⁶ Nau hauthauau, haenaudayādaunaa, haenehethaa hadnauhauthaudenenee hehethee hejavaa. ¹⁷ Hau haeene hedenethajaudenene, haeāedauwuna, Hadauchaa najanede nanayāsenauaugu nehayau hadneyauhuu; nau hauauwu hasānavadenaugu hauauwu hadjanesaa. ¹⁸ Hith, Haujau jea hasānavadagu, hauddusetheaugune henajanede? hanau nananena denehena nananenau deausāguthaugaune haujaunauau hehethee Beelzebub. ¹⁹ Nau hith nananenau hausāguthaugaune hehethee Beelzebub haujaunauau, hanaa hāahenau hadnausāguthaude? hadedauchuwuwuna. ²⁰ Hau hith nananenau hejadenethedaunaugu Hejavaneauthau hausāguthaugaune haujaunauau, hethauwu henajanede Hejavaneauthau hedašana. ²¹ Henane danāahethe hedauchuaunau haunaunedehuk hedauauwu, hevatheyaunau nedādauyaune: ²² Hau hāejavaādāāhenethe javaāhehuk hedašana, nau veavehāhaugu, hadnedanauwunāde vahee hedauchuaunau heanadauwaundenau, nau hadjaanenee hesehauudenau. ²³ Daun najenethaunāde hasānavānau: nau daun najenethauāyāvāde naneāsauauwaude. ²⁴ Hāenauthaethe wauchāde haujau henanene, nehedesade hadaujenajenenee, denaudedede dauyānusenade; nau janeveedethe, naneenehede, nananenau hadjaesanau naudauauwu needaujenauahenau. ²⁵ Nau jaenauusathe, neveedede nesewaudeauhunee nau neyauthaunenee. ²⁶ Naeneejathāaude, nau naneedanauwaude hanesauchaunethe hauthauau haujaunau javaānauhauganenethe javaāhede; nau nanejedāthee, nau nanejanauguthee: nau waunee henee henane naenejavaānauhauganede nedauaunejeethāde. ²⁷ Nau hethauwu, hajeseanadede nuu hayauhuhau, jasaa hesā hehethee henanedaa haevasanade, nau hathauhuk, Hauwunaunade henesaunehe hājaneseuthāde Nananene, nau hethanau nedaunenane. ²⁸ Hau hahagu, Haa, nausunee, nauwunaunathee nethāejaathededuu hedanadedauene Hejavaneauthu, nau naunaunedethee. ²⁹ Nau henanedanede hāeneenanauthanedaunuu, hanaāejasesenehede, Nu nanaa wausauau henaedede: nevadaunauhauthāthee; nau hegau nauhauthaude hadvenaunauau, hau vavade nauhauthau nananede Jonas haeyāhe. ³⁰ Hanau Jonas neesenauhauthaude Ninevites, nechau jea Heau henane hadnaathāde nuu henaedede. ³¹ Nenauchuwusā janauhuu hadjaegauhāde naudedauadenesee nauguu henanenau nuu henaedede, nau hadnauthauwuvāna: hanau dejewaunejaattheaude hehethee hāauauvadenee naunaudāhenith Solomon; nau naune, hejavaāhedaune Solomon hanedaunith. ³² Henanenauau hehethee Nineveh hadjaegauhāthee naudedauadenesee nauguu nuu henaedede, nau hadnauthauwuvāna: hanau dauaugauthethajauduu hedauthedaunene Jonas; nau, naune, hejavaāhedaune Jonas hanedaunith. ³³ Hegau henane, hāesedauchauuu nauauuthayau, hehauwujenane yauthee, daudause

hehauwugaudauyauvasenaunaa, hau dasee nauauuthayauneetheaugunee, nethāejedāthee hadnenauhauduu naunauasādane. ³⁴ Hanesenee vadanayannaa nanaa nevasesānee: nanaa hāenesadee hasesānenau nananena, nananene hadnaunauudauyauau hadanayau jea hanechaunaana hese; hau hāene nananene hasesā wausuu, hadanayau jea hadnechaunaudene vaneeyauau. ³⁵ Haunauyauhaudauwauau hanau henee hesee hathāsadaude nananene jeva veeyauha. ³⁶ Hith nananene haunauudauyaugu hadanayau hanau hadnechaunaudene hese, hadnehauwugauveeyau haunauude hadnechaunaana hese, waude naunauasādāe nauauuthayau nevenāna hese. ³⁷ Nau hajesanadede, jachau Nesethajauhu haedethaa hadnethevethehewaude: nau haewaunejedā, nau haejanaugu dauvethede. ³⁸ Nau hāene Nesethajauhu nauhaudauau, haegaudauvanava daujahesehunith nedauau hajesejevethehenith. ³⁹ Nau Vahadāhenith hathāhuk, Hewaunehaa nananena Nesethajauhuhauau neyauthahenauwuna jathee vāenaunau nau saenaunau; hau nananena hethauvaa hanechaunaudena vahedayaude nau hauhauganede. ⁴⁰ Nananena janethauvahena, gaujenane Hejavaneauthau nenesedede jathee gaujee henesede jedauwuu? ⁴¹ Hau hevāe hauwuyau daun hanetheyaunenau; nau, naune, vahee hayauhuhau hadnesewaudeanauwunana? ⁴² Hau naunauthauau hadnedasāna nananena Nesethajauhuhauau, hanau nananena hadvāna vadadauchu wauhaunauau nau naneujaudevejechau nau vahee hathāejājāesuu vejechau, nau hadjavechaudauwuna vavesauchuwude nau devechauthade Hejavaneauthau; nuu hāvachunaasedauna, nau hānanejenaudauwuna hauthauau nejesehee. ⁴³ Naunauthauau hadnedasāna nananena Nesethajauhuhauau, hanau nananena devechaudauwuna najatheaugudaunau jedauwuu vevethahenauauwuu, nau dejachauthana nedauaudaunauvadee. ⁴⁴ Naunauthauau hadnedasāna nananena, wauthaunauhāhehauau nau Nesethajauhuhauau, nanadaunahena, hanau nananena waude nedaugaudauyauhudaunee dejenauhauwuu, nau henanenauau nedasejavesathee hehauwaenaunā. ⁴⁵ Hanaāauchuhananadede hanesāde nanavaavehe, nau hathauhuk, Hechauhauthethāhe, nuu dauhanadene nananene naunaunauthevāana jea. ⁴⁶ Nau hathāhuk naunauthauau hadnedasāna nananena jea, nananena nanavaavehehauau, hanau nananena henenauchuna henanenauau nauuu henenauchude hehayaudee javechauhunee, nau nananena nehayau jevavasanauwuu henenauchudaunau hee hanesadee nananena hajadenenau. ⁴⁷ Naunauthauau hadnedasāna nananena, hanau nananena denesedaunauna gaujauaudahenauauwu haeyāhehauau, nau hāsaunaunenau denauauthee. ⁴⁸ Hethauwuu nananena haeyāna henee nananena wauhaunee nanāsedauthee hāsaunaunenau: hanau denauauthee, nau nananena nenesedena hegaujauaudahenauauwunenau, ⁴⁹ Naasauau jea hahagu hedaeyaude Hejavaneauthau, Hadjenanu haeyāhehauau nau vadauhanauau, nau hauthauau hadnenaathee nau hadnenaunaunauchauthethee: ⁵⁰ Henee hevaevenau vahee haeyāhehauau, hanedaunee hehethee davadeesehee vedauauwuu, hadneenaudedauwuhuu nuu henaedede; ⁵¹ Hehethee hevaevaa Abel nauuu hevaevaa Zacharias henee nenajaa nahethāe jaanaa nau vadannauauwuu: hethauwuu nananenau nehethathana nananena, hadneenaudedauwuhuu nuu hee henaedede. ⁵² Naunauthauau hadnedasāna nananena nanavaavehehauau, hanau nananena dauhudanauwuna gaunaudauauha haeyaude: nananena hadnehauwujedāva nehayau, nau henee hathāejedāthee nananena najauaunauna. ⁵³ Nau daunenehedauau nuu hayauhuhau yese, wauthaunauhāhehau nau Nesethajauhuhauau hanaāejaseseneenaudedaunāde, nau haeneenadaunanauau hadnauthedaudauwunith hauwuhuu hayauhuhau; ⁵⁴ Haeaudenauthaa, nau hadnesedanauwunethe hayewhu hehethee hedenene, hadnāedauwauthauthee.

12

¹ Gaunauwuu, hāene hena hauāchaudenee hauānee haejedaguu hadaucha hēnenede, dauwauthaa haeaunauguhudaunadenauau, hanaāejasesāedauwunaude hethauguhādaunau nedauau vahee, Haunauyauhaudauwauau nananena gauhaujau Nesethajauhuhauau, nenadaunahethee. ² Hanau hehauwuyauthesa, hathāeyauthesaa, daudause hehauwuyauthesa, nethāejaenaunee. ³ Hanau daun nananena hasanadenā veeyaugu hadnedauwuhuu hesenee; nau henee nananena hasenehenā waunaudaunuu jedauwuu hadnauchunana dasee hauauwuu. ⁴ Nau nananena hāedauwunathana Nādaehauhauau, Jevaesaa henee nenadethee henanedayāhau, nau hee hehauwauthesedaunauau. ⁵ Hau nananena hāedauwunathana daun nananena hāchaunenau: Hesaa Naa, hee hesenaānagu naunaudāde hadgauusevāna hadaugauhauchanee; haa, Nananenau hāedauwunathana nananena, Hesaa. ⁶ Hayauthaunethee hajaseaheauau gujeaudaunaune hee hanesāenee nevaāhenee, nau hanesāde hehauwunauneethedaunā Hejavaneauthu? ⁷ Hau daudausee hadauchāe hāthaanenau haudauguhuanenau vahenayāee. Jevanāthajauau henaheee: nananena javaānauwauhana hadauchtethee hajaseaheauau. ⁸ Jea Nananenau hāedauwunathana, Daun naujaudauthehāde hesee henaneda, nananede Heāhene henanene jea hadnehauwaudauthehaa hesee hautheaunau Hejavaneauthuu. ⁹ Hau henee nauyauhāde hesee henaneda hadneyauhade hathaāhenethe hautheaunau Hejavaneauthuu. ¹⁰ Nau daun hayādaunaude Heāhene henanene, hadjaegudanauwunade: hau nananede henee hauhauganedauau Vadanauwauthauwu hadnehauwujaegudanauwunau. ¹¹ Nau hāejedanānā vevethahenauauwuu, nau hauchuwunanenauau, nau najanauau, jevagaugauanadauwuu wauāthe daunhayewhu nananena hadnesauchuhanehena, wauāthe daun nananena hadnesenehena: ¹² Hanau Vadanauwauthauwu hadnāedauwunāna nauauchaugu daun nananena hadnesenehena. ¹³ Nau hanesāde hehethēe hananeda hathauhuk, Hechauthethāhe, hanadesene nasaa, hadegaugauanauwaunauau vattheyaunau. ¹⁴ Nau hathāhuk, Henane, hanaa nanesehāde hadnauchuwuhathane nau hadjaanauwunathane nananene? ¹⁵ Nau hasenehethauhuk, Haunauyauhaudauwauau, nau naseduhuu jevavathehāe: hanau henane hēdenaedede hehauwunedahevaa wauthayāgaune hevathayaunau henethayaunau. ¹⁶ Nau haenadetha haejegausudenanadetha, Vedauauwuu jasaa nethauyāsenane haenauthauthā: ¹⁷ Nau hasethajauhuk nehayau, hewauau hauaudnesedaunaune, hanau hājenethenauwau jedauwuu hadnedauthānauwau navethenau, hahagu? ¹⁸ Nau hanaāenehede, nuu hadnaasedaunau: hadthauwunauwau nathāyānauauwuu, nau hadnesedenau hadjavaāvasauau; nau hadnaadauthānauwau vahee navethenau nau navathayaunau. ¹⁹ Nau hadnaāenehethauau navadathuwu, Vadathau, nananene nanethenauwu waunauthāe hanethayaunau janenane hadwauthāe jajene; hedanau nanethauaunenaedede, hevethēe, hevaveyā, nau haunauwunaede. ²⁰ Hau Hejavaneauthu hathāhuk, Nananene Hauhauga, nuu dauveeyauau nananene havadathuwu hadnedauwunane: hee hanaa hadnethenauau hājenayaunau? ²¹ Nananede haenathaunau heveaunauaudenau, nau hehauwuveaunauau hesee Hejavaneauthu. ²² Nau hathauhuk hethauguhādaunau, Naa nehethathana, Jevaegaugauanadauwuu hadenaededaunenau, daun hadnevethedaunenau; daudause hee hadanayaunenau, daun hadnāsaunenau. ²³ Hēnaedede javaāsaa vethēvā, nau vadanayau javaāsaa hāchaunaa. ²⁴ Gaugauanavaa huunauau: hanau dejejenayāthee nau dejegauausauhāthee; hehauwunethenauwu thāyānauauwu nau vethewau nedauthāsanenee; nau Hejavaneauthu nachauwaude: gauhajavaāneenaedeva neahēnaa? ²⁵ Nau hanaa nananena vanadaunanāde hee neejahehe? ²⁶ Hith nananena wauhā jeneenesedaunagu henee haugajuhuu, naudū hājanethajaudauwuna hauthauau? ²⁷ Gaugauanadauwuu nēnaugaānuu nejajaesaānuu

neseveseeu: hehauwunesethānaunau, hehauwunethaudayānaunau; nau nausunee nāedauwunathana, henee Solomon vahee hevasāthade heehauwunaasenu hasaunee nuu. ²⁸ Hith wauhā Hejavaneauthau heneenudehuk wauchuunau, nuu desenee nauau, nau naugaagu hadneewaudeadaunanee; hāduthāejavaāvenāva hāchaunau, Hau nananena vanehaa hethauwuthajauna? ²⁹ Nau jevanaudedee nananena daun nananena hadnevethedaunenau, wauāthe daun hadnevaveyādaunenau, jevaauwaugaugauuthajauau. ³⁰ Hanau vahee nuu neauthudan hathāauauvaa nenaudethāthee: nau nananena Hāsaunaunenau haenauau henee nananena hāvathehādaunenau nuu hayauhuhau. ³¹ Hau henaudedee nananena henajanede Hejavaneauthau; nau vahee nuu hayauhuhau hadnethedaunanauwunana nananena. ³² Jevanāthajauau, hāhauwuwauthaheva; hanau nananena Hāsaunaunenau hayethanadauwunādaunenau hadvenāna henajanede. ³³ Heaunaunaa henee hanetheyaunenau, nau hauwunaunaa hadavenuhuhauau; jasedauau nesevāejethāwaunau henee nejethauuthauauchusāe, haenathaude haneduu hejavaa henee nejethauuyauhuu, nedaujavedadenee, hehauwujuudenauau nuvanauauau. ³⁴ Hanau haduu hadaenathaunenau, hena hadahenau jea hadnaaduuu. ³⁵ Duujehee, nau haunauauuthayaunenau gauhauchanauha; ³⁶ Nau nanethathena henanenauau henee nedauyauhauwauthee hanau Hadahethedaunādaunenau, hāejejaesathe hehethee gauwuhaude; henee hājenauusathe nau hadwaudāhaude, hadgaunanauwunade nauhauhaunee. ³⁷ Hauwunaunaa henee nesethāhehauau nananenethe, Vahadāde hājenauusathe hadveenaude hadnaunauyauhauthānethē: hethauwāedauwunathana, haddujede nehayau, nau hadjanauguhaude hadvethehenethe, nau hadjeedauchaude nau hadnaunauchauwaude. ³⁸ Nau hith jenuusahek naneseauwaude haunauyauhauthāhe, wauāthe jenuusahek naneseauwaude haunauyauhauthāhe, nau hadveenaude hadnesaanunethe, hauwunaunaa henee nesethāhehauau. ³⁹ Nau nuu hāenauwuu, henee hith henane hedauauwuu haenauaugu daun hāauchaunee havedehew neenauusanith, haunauyauhauwaude, nau hanājechuwauthedaunenauhunee hedauauwuu. ⁴⁰ Nananena hadnaaesaaunana jea, hanau Heau henane hadnauusade daun hāauchaunee hājenauanaunauwunā. ⁴¹ Peda hanaānadethaude, Vahadāhene, gauhanadethāa Nananene nuu hee jegausudede wauāthe vahee? ⁴² Nau Vahadāde hahagu, Hanaa henee chuvahagu nau hesenaedehuk hadāhevāhe, nananede hadāhewaunādaune, hadnevenaude gauuu vethewau nauauchaunee? ⁴³ Hauwunaunaa henee nesethāhe, nananenith hadāhewaunādaune hāedasāthe hadveehāde hadnaasehāde. ⁴⁴ Hethauvaa hathāedauwunathana, henee hadnesehāde hadāhewaude vahee hethāenetheyaunau. ⁴⁵ Hau nau hith henee nesethāhe hesethajauhuk, Nadāhewaunāde jeguthenauusahek; nau henenese gauhahek henanenau nesethāhehau nau hesānu, nau hevethehagaunee nau hevaveyāhaugaunee, nau henaunauneseavagaunee; ⁴⁶ Hadāhevāhe henee nesethāhe hadnauusanith hajesesenenee hāejejauwuwuhauthe, nau, neejaenauau, nau hadgudanāde nau hadjenanaude jethauwaudahehau. ⁴⁷ Nau henee nesethāhe haenauaugu hadāhewaunādaune hathanavāde, nau jesaanuhuk, daudaus dejesedaude hathanavāthe hadnenenesegauhude dejauaunee. ⁴⁸ Hau henee jaenauaugu, nau hesedauhauk nesenenese guhededaunenee hanājauwaunenese guhude, hanau daun hauwauhuvenāde nananede hadnauwaunedaunauwunade; nau nananede henane hauwauhauthade, nananede hadnauwaunedaunauwunade. ⁴⁹ Hadjejenanauwau heseda dasee vedauauwuu; nau hayew navathehāde wauwu gauhauchagu? ⁵⁰ Hau nanethenauwau dusaahede hadneedusaahedaunee; nau hanahauwaudauaunānu haunaude hesedaudeyāgu. ⁵¹ Hanejaude hadjenanauau dādaunee vedauauwuu haāthanaveva? hadāedauwunathava, Hegau; hau wauāthe hanāgauanauwau: ⁵² Hanau hehethee hee yauthaunenanaunaunee hanesadee hauauwuu hadgauanee, hadnasaunauthee hanesenethe, nau hadnesaunauthee hanāenethe. ⁵³ Hensaunaun hadgauanathee

hadnasānuwaude heau, nau heau hadnasānavāde; hesā hadnasānuwaude hedaunau, nau hedaunau hadnasānavāde, hesā hesave hadnasānuwaude, nau hesave hadnasānavāde. ⁵⁴ Nau hanaānadedauau jea henanedanede, hāenauhaudauwunā henaunauade jevechauchaugu hehethē nesenaesade, chauchaunu nananena, Hadnauchuhajauwasauau; nau naenesauau. ⁵⁵ Nau hāenauhaudauwunā jenauhuu hanehedasāe, nananena, hadnasedaa; nau naenesauau. ⁵⁶ Nananena nanadaunahena, nananena naenauwuna hedauchaveau haunauau nau vedauauwuu; hau dusaudee haejaenauwuna nuu hewaunehaa? ⁵⁷ Haa, nau nau du daudause nananena haejaenauwuna hasethadee? ⁵⁸ Hāeyehauthānā hasānavādaunenau hauchuwunanenau, nausujavesanagu, nayātheneneevaa hadeenayauhāna; havaehauthāva najanauchuwunanee, nau najanauchuwunane havavena duguthāhew, nau duguthāhe havathānāva duguthānauauwuu. ⁵⁹ Hāedauwunathana havajeneenauthauva, haunaude vathaunaudahunagu havāejethāvenau.

13

¹ Hena hethaa hee jachau haeauthedaunaa Gananeans, hevaewu Pinade haewauhaunauwuaunenau nedauausyāthee. ² Nau Hejavaneauthusaun haeauchuhananadethā, Nauchāe nananena henee nuu Gananeans heauhau-gayaugaunee javaānee vahee Gananeans, hanau daujeneethajauduu hayauhuhau? ³ Nananenau nāedauwunathana, Hegau: hau, vavade nananena jaugauthethajaunagu, nananena hadnavahethahena gaujauaudahede. ⁴ Wauāthe hena nasaudauchunee, dasee hayauauwuu jedauwuu Siloam dethauwunauauau, nau haenanaā, gauguanadauwuu henee gauhujavaānauhauganenauau vahee henanedanede henee theaugude jedawuu Dādaunedan? ⁵ Nananenau nāedauwunathana, Hegau, hau vavade nananena jeneethajauhadede, nananena hadnavahethahena gaujauaudahede. ⁶ Haeheanade jea nuu dajenehede; Jasaa henane haenethena hauyauauchunauhaudene haejenana jedauwuu dadajevenevese nethauchayaunaa; nau haejenauusa nau haenaunaudede vevenaundenau hanāvenee, hau haejeveede. ⁷ Hanaānehethaude nesethāhew hedadajevenevese nethauchayaunaa, Naune, nuu hanasāa jajene nananenau hanejaunau daujenaudedenu vevenaundenau nuu hauyauauchunauhaudee, hau hajeveedenau: dauwauhune; hadevachunauthauyauau vedauauwuu? ⁸ Nau hanaāauchuhanadethāde, Vahadāhene, hauwaa nanehasene nuu hee jaje jea, nadeesenenesede, nau vehethe hadjenanauwau. ⁹ Nau hith hāvāgaune vevenaundenau nee: nauhith jene, hadnaāedauwuhade. ¹⁰ Nau haechauhauthethā jasaa vevethahenauauwuu vadanese. ¹¹ Nau, naune hena hesā haujaunehaeheaugauwu nasaudauchunee jajenee, nau haevajanā hauānee, nau haejeneechuwuwauthē nehayau. ¹² Nau hāene Hajavaneauthusaun nauhaunauwaude, Haeadetha, nau hanaāedauwunaude, Hesā, nananene haunaugunane hehethē hadaugauwudaunaa. ¹³ Nau hanaāevasanaude: nau chauchaunu hanaāechuvāde, nau haevaveenethedauna Hejavaneauthu. ¹⁴ Nau hauchuwunane vevethahenauauwuu haeauchuhananade nauguu hasenaunaude, hanau henee Hejavaneauthusaun denayauthāmith vadanese, nau haeautheda henanedaa, Hena nanadaudachāe hese henane heenesethādaunau hanānaneējauna nau hanānaneenayauhana, hau hegau vadanese. ¹⁵ Vahadāde hanaāauchuhananadethaude, nau hathauhuk, Nananene nanadaunāhene, gauhājene dajee hanesahena vadanese haugunauva hauwaugajevenau wauāthe naugauchaudaheauau hehethē hewauchuhauchauwauauwuu, nau gāyethāājethauva devanauhauna? ¹⁶ Nau gaujenaasaunee naa hesā, hedaunau Ābraham,* henee Haujau heduguthaune, naune,

* 13:16 “Ābraham” is spelt thus once in this verse and spelt “Abraham” thirteen times elsewhere in the text. It is not known whether the spelling differences have any grammatical significance.

nuu nasaudauchunee jajene, hāaugunade hehethee nuu deduguhude vadanese? ¹⁷ Nau hāenehedauau nuu hayauhuhau, vahee hejauthauwau haeaudaudāhenenau: nau vahee henanedanede haeneethaujudene heee vahee havathee hayauhuhau henee hesethaunau. ¹⁸ Hanaāenehede, dusaune henajanede Hejavaneauthau? nau hayew naudnenehethau? ¹⁹ Waude nejenanenee mausdaude, henane nedanauau, nau neneāgudede hejenayaunaa; nau neveseaudede, nau hāhe haeavadauhauudene; nau neahehauau hejavaa negauusee hedānaa. ²⁰ Nau jea hanaāenehede, Hayew naudneedajenehethau henajanede Hejavaneauthau? ²¹ Waude nesaunauchaa henee hesā nedanauau nau nejenanauau nasau dejenauhunee thauauhanau haunaude devahenesaunadāe. ²² Nau haeehedesa hauwauhauauwudane nau hajasedan, dechauhauthethāde, nau haejāda hese Dādaunedan. ²³ Hanaāanadethāde hanesāhenith, Vahadāhene, gaujewauthanauau henee henayauhathee? Nau hanaāēdauwunaude, ²⁴ Neaunedauwauau hadejedāna hadaugaugunesāde dajanau: newauthana, Nananenau dāedauwunathana, hadnenaudedena hadnedaujedāna, hau hadnehauwuneeauva. ²⁵ Hāene hechauhauthethāhe hauauwuu thauwauthehuk, nau haugauhahagu dajanaune, nau nananena hanānaāetheauguna jathee, nau hanānaāewardāhauna dajanau, hanānaāenehethauna, Vahadāhene, Vahadāhene, jegaunanauwunāa, nau hanānaāauchuhanehethāna nau hanānaasenehethāna, Hāhauwaenaunathe daun hadesane: ²⁶ Hanānaāenehethauna, Nevethehenauau nau nevaveyānauau hathaāhene, hau nananene dauthedaunānehadaugauchadee. ²⁷ Hau hadnaasenehede, Hāedauwunathane, Hāhauwaenaunathe daun hadesane; nayāsesave vahee nananena nesethāhehauau wauwauchudaude. ²⁸ Hena hadnevewauhudaunee nau hadnegaugauchaugudasenana, hāenauhauwaunā Abraham, nau Isaac, nau Jacob, nau vahee haeyāhehauau, Jedauwuu henajanede Hejavaneauthau, hau nananena nehayau nenuguthadena. ²⁹ Nau hadjenauuchaudenee hehethee nejeethevesesanith, nau hehethee nesenaesanith, nau hehethee nanavee, nau hehethee janauhuu, nau hadjanauguduu henajanedanene Hejavaneauthu. ³⁰ Nau, naune, hena hedauaude hadnedauvade, nau hena nanedauvade hadnedauchude. ³¹ Hajesesenee hena haejenauusa jasaa Nesethajauhuhauau, hasenehethāhuk, Nauahe, nau jathāau, hanau Herod hadnaāne. ³² Nau hanaāēdauwunāthee, Najesaa, nau hadāedauwunauva hena vachuhuu, Naune, nenuguthu haujaunauau, nau nenayauthānau nuu desenee nau naugaagu, nau nanaseauwauau hese hadnaāesedaunau. ³³ Hau hadnenesanau nuu desenee, nau naugaagu, nau jea hathavenaugaagu: hanau hehauwunaasau henee haeyāhe denaade Dādaunedan. ³⁴ Hau Dādaunedan, Dādaunedan, nanathee nenauauthee haeyāhehau, nau nenauchauwathathee hauunaugāe henee hejejenanauwunaudenenu; dauhudauchu naudnauāchauhaunauau nananena hadāeyaunewauau hauānee waude neauthuneahēe dauānaude henesaunau hethauvaa hethaenaa, hau hāhauwuvatthehāva. ³⁵ Naune haudauauwunenau, naunaudauwunana hadnadauyewu: nau hethauwuu nāedauwunathana, Nananena hadnehauwunauhauwuva haunaude nauauchaugu hadneenehena, Hauwunaunaa henee jaunaude heee heneseedaunene Vahadāhenith.

14

¹ Nau hethauwuu, daujedāde hedauauwunene hanesāhenith najane Nesethajauhuhau hadvethee jauaujau vadanese, henee haeaunauyauhauvaa. ² Nau, naune, hena jasaa henane hathaāhede haenenesaunenauau. ³ Nau Hejavaneauthusau haeauchuhananadetha nanavaavehehau nau Nesethajauhuhau, gaujenanavanau henayauthaude vadanese? hāthauhuk. ⁴ Nau haedādaunaugunauau. Nau hanaāedanaunith nau haeenayauha, nau haejenana; ⁵ Nau haeauchuhananadetha, Hanaa hedauneau naugauchaudahēhau wauāth waugaje janesenayaugaune hadaundaunenee, nau gauchauchauu gauhadnauuguthauva vadanese?

hathauhuk. ⁶ Nau haeeyauhuune nesenehethauthee jea nuu hayauhuhau. ⁷ Nau haedadajenehetha henee hathāadethavathē, hāenauhauwaude hasayāchauhauwunethe najatheaugudaunau; hanaāāedauwunaude, ⁸ Hāene nananena hadethaunā henanenauau gauwuhaudeneagu, jevajanauguu najatheaugudaunaa; havajavaānethā henane havajavaāheva henee hadethade; ⁹ Nau henee hadethāde nau nananede hadjaude nau hadnethāne, Venene naa henane hadehedaugu; nau nananene haddayāhene janaugunenagu hesaudavaa. ¹⁰ Hau hāene nananene hadethanenagu, haddeyehau nau hadjanaugu hesaudavaa henee hāene hadethāde hadjaude, hadethāne, Va javesa; hadnaāene nananene vechauthānaune henee hanethevethehevādaunauau. ¹¹ Hanau daun nanajathajau nehayau hadnausādauaude; nau henee nausādauauadede nehayau hadnajanede. ¹² Hanaāenehethaude jea henee hadethādaune, Hāene nananene gauusevanenagu wauāthe hethunevethehevanenagu, jevaadesene hādaehauhauau, wauāthe hāthesaunauau, daudause hādauānauau, wauāthe nethauyādahagu hanedaudewau; havaadetha jea, nau havaaunaudaunā. ¹³ Hau hāene nananene vethehevanenagu, hadadethaunauau hadavenuhuhauau, henesenehehauau, jeneejavesahehauau, nanenauguhuhauau; ¹⁴ Nau nananene hadnauwunaunane; hanau daujeneaunaudaunānaune: hanau nananene hadnaunaudaunane jaegauhadeneagu hathāethadee. ¹⁵ Hāene hanesāde henee henethevethehevādaune daunedauwaudauwunith nuu hayauhuhau, Hauwunaunade henee hadvethee jauaujau henajandedaunene Hejavaneauthu, hathāhuk. ¹⁶ Hanaāāedauwunaude, jaaa henane haeavathethunevetheheva, nau haeauwauhadethānanena; ¹⁷ Nau haejenana hewauwaune dauethunevethehedane hadnāedauwunaunith henee hadethavathe, Jenajesaa; vahee hayauhuhau wauwu hanesejenanee. ¹⁸ Nau vahee haenesadene hathaichuwuhadethee hadnudanathee. Nanedauwauaude hasenehethauhuk, Neaudaunaudauwau vedauauwuu, nau hadneyehaunau nau hadnauhaudauwau: Nehethathane hadnudanene. ¹⁹ Nau jaaa ahagu, Neaudaunauthu yauthauyauna hedahuwaugaje, nau hadneyehaunau hadnayāduuhuu: nenehethathane hadnudanene. ²⁰ Nau jaaa hahagu, hedauwunenenu, nau naajenejaunau. ²¹ Hanaāējenauusade henee wauwau, nau hanaāenauhauthehaude hadāhewauādaune nuu hayauhuhau. Wauhā hechauhauthethāhe hauauwuu hanaāasenaunade hanaāāedauwunaude hewauwaune, Yegauhu nauhauhaunee hadaugauchaudāe nau hadaugauchauchanee hedane, nau hadjāthaunauau hede hathāadavenuhunethee, nau henesenehehauau, nau jeneejavesahehauau, nau nanenauguhuhauau. ²² Nau wauwau hasenehethauhuk, Vahadāhene, naasedaunau hasenehesene nau nausunauthauyauau, hathāhuk. ²³ Nau Vahadāhede haeāedauwuna wauwaune, Yehau hathenavaunaa nau nethauchayaunaa nau hadjādasauaunaunauau hadejejedāthee, henee naudauauwuu hadechauchanaa. ²⁴ Hanau nāedauwunathane, henee hegau hena henanenauau neadethathee hadnehauwuvajaduwu nadethunevethehewau. ²⁵ Nau hena haenethaunau havathenedanede: nau hanaāējaaagude, nau hanaāāedauwunaude, ²⁶ Hith daun henane hedsānaugu, hau jasānauwauhuk henesaunaune, nau henaune, nau henene, nau dāeyaunauau, nau henethesaunau, nau hedsāwau, haa nau nehayau hedenadede jea, nāhauwuneethauguhāa. ²⁷ Nau daun janenevaa henaugauchu, nau thaughānaugu, nāhauwuneethauguhāa. ²⁸ Hanaa nananena vanadaunesedede hayauauwun gauhadjejanaugu nedauau hadnayādede hadaachuunee, wauau hanaadauchanenee hesehenee? ²⁹ Havaene hesejenanauhuk hauunauganau, nau hanājenesedede, vahee henee hathāenauhauau hadneevavavayaudenenee. ³⁰ Naa henane nenesedede, hau hajeneesedede, hanāthāde. ³¹ Wauāthe daun naja, vadauvauthauhuk jachau najane, hanājanaugude nedauau, nau hanāgaugauanadauwau wauau haneene nauguu vadadauchu vasevadadausauau hadnenuchaunaude henee hejevenahedaunau

nauguu nesauau vasevadadausauau? ³² Wauāthe, hajesenausujechaugunethe, hanāyethautheavede, nau hanānayāthenedauāwaunaude. ³³ Nau naasauau, daun nananena henee janenaunaudauau vahee henetheyaunau, nāhauwuneethauguhaa. ³⁴ Nejauauwuu hethadee: hau hith nejauauwuu jevanujaudāgu, hayew hadneenejauauwujauau? ³⁵ Daudause hehauwuuthade vedauauwuu, wauāthe heee vehethe; hau henanenauau hanāneāgudede. Daun henaudaununede heenedauvahek jaathedeha.

15

¹ Hanaāeauchaunāde vahee hauāyāhehau nau wauwauchudauhuhau heee hadjaathehāde. ² Nau Nesethajauhuhau nau Wauthaunauhāhehau haeneneedenenau, Naa henane hanesedanaude wauwauchudauhuhau, nau nanethevethewau, hathāhuk. ³ Nau haeauthaunanadetha, hasenehethauhuk, ⁴ Hanaa henane nananena hedauneede vadadausauau jauaunawaudā, hith hanauhauhuk hanesahenith, gauhadnautha theaudausauau nau theaudauchunee nauaunee, nau gauhadnaudeha henee naunethauaunith gauhaunaude hadveeha? ⁵ Nau hāeveehauthe hadthāegauhaude hejaanaunaa, hadneneethajau. ⁶ Nau hāenauajegauhuthe, hadnadethaude hauānee henedaehauhau nau henedaudevādaunau, netheneethajaudauwunee hanau daujaveehauau naudauāve nenaunethauaude, hathauhuk. ⁷ Nananenau hāedauwunathana, nuu hadnaasauau neethajauade hayāene hāene hanesāde wauwauchuduhu haunaunevethajauhuk javaānee theaudausauau nau theaudauchunee hathauwunane janenethenauau haunevethajauade. ⁸ Daudause daun hesā nethenauaugu vadadauchu gauneevāejethā, hith hanadehuk hanesadenee gaunee, gauhadjedeauchauau nauauuthayau, nau gauhadwaudeau hauauwuu, nau gauhadvavesenaudene haunaude gauhadveede. ⁹ Nau daun hāeveenuu hanadethaude henedaehauhau, nau henedaudevādaunau hauānee netheneethajauwuu, hanau daujaeveenauwau hanesadee nāanathau, hanāthaude. ¹⁰ Naasauau, Nananenau nāedauwunathana, haneduu neethajauade hathāāhethee hautheaunauau Hejavaneauthuu hanesāde wauwauchuduhu haunaunevethajauhuk. ¹¹ Nau hasenehehuk, jasaa henane neseyaugaune heauhau: ¹² Nau hajauchaugade haenehetha henesaunaune, Nāchau jevene gauuu vatheyaunau henee nāudnedadahedaunau. Nau hanaāgauuvenaude hethāenetheyaunau. ¹³ Nau haunauauhaejewauthanenau hese hajauchaugade hāesauānauau vahee hauānee, nauhanaāejathāde hese vavāaune vedauauwuu, nau hena hanaāevadauthedede hethāenetheyaunau heee hauhaugānenaedede. ¹⁴ Nau hāevathedede vahee, hena haanaāenauauchauau naunauthauau hasenaude hena vedauauwuu; nau hanaāadavenuhunede. ¹⁵ Nau hanaāeyehaude nau hanaāewauhaunesade nehayau hauwauhauauwunanenau henee vedauauwuu; nau haejenanaa hethauauwuu hadnauchauwaude neauthuwauchu. ¹⁶ Nau hanāneanadauau hanāchauchaunaudede henaude heee jeyauwaunau henee neauthuwauchu hevethedaunenenu: hau hegau henanene hevenaa. ¹⁷ Nau hāenaude hanaāenehede, Waunauthanethe hedautheaunau nāsaunau nenethenauau jauaujaunau naenedauchanenee nau nejeesesanenee, hau hadnenadaugauyānau? ¹⁸ Hadgauhānau nau hadeyehaunau nāsaunau, nau hadnaasenehethauau, Nāchau, nananenau nanethenauwau wauchudaude hese hayāene, nau yese nananene, ¹⁹ Nau nananenau hegau heee hāhauwautheāve: jeneshe waude haudautheaunau. ²⁰ Nau hanaāegauhāde, nau hanaāedauchaude henesaunaune. Hau hajesejedauchaude, henesaunaune haenauhauvaa, nau haeauwunaunaa, nau haeyeseneegau, nau haeanaethesaunaunagutha, nau haenedana. ²¹ Nau heau hathāhuk, Nāchau, nananenau nanethenauwau wauchudaude yese hayāene, nau nananene, nau nananenau hegau hāhauwautheneēve. ²² Hau henesaunaune hathauyaugaune hedautheaunene, Jādee chaunaguuthadee hu, nau hauyauunaa; nau thānauwunaa nechaunathathau hejadena, nau jedauaunenaa: ²³ Nau

hadjāthauva hede daun gauchujāde wauuu, nau hadnauauva; nau hadvethehenauau, nau hadeaunauwuthajaunauau: ²⁴ Hanau naa nāa nenajaa, nau jaenaedede; nenaunethauaude, nau jaeveenade; nau hanaāejasesaunauwuthajauthee: ²⁵ Wauhā vanachaunganith heau haenedaune nauau: nau daunausujaude nau hāayānauusade hedauauwunenau, haenedauwaude haenevaudenene nau haevadaudenene. ²⁶ Nau haedetha hanesānith haunauaheau, nau haenaudedana dusedaudene hathauhuk. ²⁷ Nau haeāedauwunaa, Nananene hahavaa nauusade; nau nananene hāsaunau nauauaude gauchujānith wauuu, hanau daujaesedanaude nanethauaunee. ²⁸ Nau haesenauna, nau haejejedā: hanaāejenuahenith henesaunaune, nau haedadadasevaa. ²⁹ Nau haeauchuhananadetha henesaunaune, Naune, nuu hawauthāe jajenee hāenesedaunathadenau, daudause hāhauwujethauwaudaunathe hanāene hanathauchuwunaune: hau haunauau nananene hāhauwuthauuvene haudāsau, henee hanānesedenau haunauwuthajaude nauguu nādaehauhauau: ³⁰ Hau chauchaunu hasenauusade naa hāa, hāgaujauauthedaunādaunau hāheenaededaunau hee henesahehau hesānau, nananene hanadaunaude gauchujānith wauuu. ³¹ Nau hanaāēdauwunaude, nā, nananene nanethenaedevene, nau vahee henee nāthāenetheyaunau nanehanāhene. ³² Dauudasadee henee haneenesee haunauwuthajaude, nau hadneethajaunee: hee naa hahavaa denajaa, nau jaenaedede; nau denaunethauaude, nau jaeveenade.

16

¹ Nau hanaāēdauwunaude jea hethauguhādaunau, hena jasaa haenethauyādā henane, haenethena hadāhevahew; nau haenanene haeauthauwuvaa henee daunethauyādauchude hevatheyaunau. ² Nau haedetha, nau hanaāenaudedanaude, Duthanee henee daunedaunathane nananene? nayāde hādāhevadenau hanau nananene hadnehauwuguthadāheva. ³ Hadāhevāhe, Hewauau hauaudnesedaunaune? hasethaujauhuk, hanau navahadāhewaunāde haedanauwunānau nadadāhewau: hajeneenauchauhānau; thaununedauwahunenau. ⁴ Haenauwau hadnesedau-nau, henee hāenudanānaune hadāhewaude hadjedanethee hedauauwunenau. ⁵ Hanaāadethaude haunauaude hadāhewaunādaune hethāesayānedanauwunādaunene, nau hanaāēdauwunaude nanedauwauaunith, Dauhudauchanau hasayānedanauwunaudenau nananene nadāhewaunāde? ⁶ Nau hāheyaugaune vadadausauau dejenauhuu javeda. Nau hanaāēdauwunaude Hedana hauhauthaunauha, nau janaugu nauhauhaunee, nau hadwauthaunau yauthauyauau. ⁷ Hanaāēdauwunaude jachau, nau dauhudauchanau hasayānedayaunau nananene? Nau hanaāēdauwunāde, Vadadausauau dejenauhunee thauauhanewachuunau. Nau hanaāēdauwunaude, Hedana hauhauthaunauha, nau hadwauthaunau nasaudausauau. ⁸ Nau vahadāde haevaveenethedauna janechuvāhenith hadāhevahew, hanau dauhaenauau hasedaude: hanau dāeyaunauauau nuu hathāauauvaa hedenaededaunenau hāenuu javaānee hesenedāeyaunauauau. ⁹ Nau nananenau hāedauwunathana nesedee nehayau henedaehāvadede hee nethauyādahede hehauwuthade; henee hāejenenadenā hadeesedanāna nedaujethauujenenaededaunee. ¹⁰ Henane henee chaunuvāde hee haugajuhuyāgu haneechuvāde jea vasee: nau henane henee janechuvāde vanehaa hehauwuuchuvā jea vanasaunee. ¹¹ Hith naaheene nananena jechuvahena hāhauwuuthaheva nethauyādahede hanaa hadvenāde nananene hadanethaude hethauwuu veaunauaude? ¹² Nau hith nananena hejechuvahenagu hee henehanahede jasaa henane hanaa hadvenāde nananena henee hanehanahede. ¹³ Hegau nesethāhe hehauwuneeesedauna hanesenethe hechauhauthethāhehau: jachau hanāasānauwaude hanesāhenith, nau hanāvechauthaude jachau; wauāthe hanādudevede hanesānith, nau hanāthauchaunauhauwaude jachau. Nananena hāhauwuneeesedaunauva Hejavaneauthau nau nethauyādahehehauau. ¹⁴ Nau Nesethajauhuhauau jea, haevenauwu vāejethā, haenedauwaudauwu vahee nuu hayauhuhau: nau haeauchaudanavanauau. ¹⁵ Nau hanaāēdauwunaude nananena

nethadee hasehadenā hathaāhethēe henanenauau; hau Hejavaneauthau naenauau hadahenau: hanau henee nechauguanavadethee henanedaa newauchanavathee hathaāhenethe Hejavaneauthu. ¹⁶ Nanavaavedaunau nau haeyāhehauau haunaude nauuu Jaun: hee hena henajane Hejavaneauthau deheauthedaunee, nau haunaude henanenauau neheeneethenadethee. ¹⁷ Nau hehauwunauthau hejavaa nau vedauauwuu heyauhuāgaune javaānee hanesadee haugajuhuu nanavaavede hadneeyauhuu. ¹⁸ Daun hausānaude henene, nau heneyaugu gauchuhunee, wauchudaudehaugauthenenede: nau daun hausāyaune nanewaude wauchudaude. ¹⁹ Hena jasaa nethauyāsenane, haeneenu haevejayaunenau nau haegaugunesaunenau, nau haeneechauna hadauchenenee: ²⁰ Nau hena jasaa nedauwuhu Lazarus haseagu, haesaese hedajanaunaa haevahaseva, ²¹ Haevadauugaudaude hee jeyauwaunau nejanesanenee hehethēe nethauyāsenanene hevethēhedaunene: jea hathave haedasaa nau haenenesaudauwu hedgesewaunau. ²² Nau hethauwuu, henee nedauwuhu haenaja, nau haenauaunechauhaa hautheaunau yese Abraham haenedauguva: nethauyāsenane jea haenaje, nau haehenanau; ²³ Nau hadauveeyaunee haejenāauguau, haeaudauwuthajau, nau haenauhauva Abraham vavāaune, nau Lazarus haenedauguvane. ²⁴ Nau haeneduva nau hathauhuk, Nāchau Abraham, jeauwunaune, nau jeautheavene Lazarus, henee hadejegunauhade naunauchuu hejadenaa najee, nau hadedauyauvanauau nāthaune; hanau nananenau hanavachuunau nuu hesedaa. ²⁵ Hau Abraham hahagu, Nā, hāenau henee nananene deenaedene neesedanauwu neethadee hayauhuhau, nau neesaunee Lazarus neewausaunee hayauhuhau, hau hewaunehaa hauwauthenaedede, hau nananene naunauchauthenaedene. ²⁶ Nau jea vahee nuu, nahethāe nananee nau nananene haneduu vanasauau vanethaunauau janenane: hadnejeneehedechedeenee hehethēe hede hese nananene hehauwunee; daudause hehauwuneejeauchenauau hadaunee, henee nevadaujauthee hehethēe hethaa. ²⁷ Hanaānehethaude, Vanevethedaunathane hena hee, Nāchau, henee nananene hadejejenanaude nāsaunau hedauauwuu: ²⁸ Hanau yaunauthaunethee nauhauwauauau henee hadeāedauwunaude, jea havajaunenau nuu haduu naunauchauthauau. ²⁹ Abraham hanaāēdauwunaude nanethenauthee Mosaseau nau haeyāhehau; jaatheaunauha. ³⁰ Nau, hegau, nāchau Abraham: hau hith hanesāde jaeyehauhuk hehethēe degaujauaudāde, haunaunaunevethajauthee, hathāhuk. ³¹ Nau hanaāēdauwunāde, Hith jenedaunauhaugaunee Mosaseau nau haeyāhehau, daudause hāhauwunenadauwaunauau, daudause hanesāhenethe jaegauhāyaugaune hehethēe degaujauaudāhenith.

17

¹ Hanaāēdauwunaude hethauguhādaunau, Hāhauwuneene hau henee dauusenadenau hadnauauchuu: hau naunauthauau hadnauauchaudaude daunjaunaude. ² Hanāneene henee thauyānauunaugane henauānauyangu, nau seāguthadagu hadaje, hauhanāheejegaudauvāhenethe henee haneedausenane the jachau nuu hajasedāeyaunauau. ³ Haunauyauhaudauwauau nehayau nananena: Hith hahavaenau havawauchuhāva, hadanadethauva; nau hith haunaunevethajauhuk, hadjaegudanauwunauva. ⁴ Nau hith wauwauchuhānagu nesaudauchu hajesesenee, nau nesaudauchu hajesesenee naujaeyethaagudaunānagu, haunaunaunevethajaunau, hethānagu: nananena hadjaegudanauwunauva. ⁵ Nau vaduhanauau, Vahadāhene, hethedaunanauwunāa hethauwaudaudenede, hathauhaugaunee. ⁶ Nau Vahadāhenith hathāhaugaunee, Hith nananena hethauwaudauwunagu hethāee hethāuu mausdaude jenayaunau, nananena hanāna nuu segaumau hunauhauedene, Hanāgauchauhana hethājee, nau hanājenanauna hadajee; nau hanāthauwaudaunāna. ⁷ Hau hanaa nananena, hanāwauwaunavede hanāthauauauwujethānith wauāthe hananajauānith, hanāthauna

waunee hāenausathe hehethee nauau, Najese nau hadjanaugu nau hadvethe?
⁸ Hau hanājenaasenehethauna, Hesetheva nayaudenee hadnevethenau, nau duujehe nehayau, nau hadjeenechaudaune haunaude hesevethenaugu nau hesaveyānaugu; nau heauhauwune jenaevethehene nau hadevaveyā? ⁹ Gauhadvaveene henee wauwau hanau dauhunaasedaude henee hanasenehethāthe? Haunauchāe hegau.
¹⁰ Naathahena, hāene nananena vahesedaunagu hena hayauhuhau hathauchuwhana, Hāhauwuneejavaājasethānau wauwaunauau; vavade nanesedaunauau hadnesedaunuu, hadeva. ¹¹ Nau hethauwuu, daunausuyehaude Dādaunedan, haechedesa nahethāe Samaria nau Gananee. ¹² Nau hāewaudasade jasaa hauauwudan, haenuchaunaa vadadauchu henanenau haenaujaune hedaugauwudaunenau, haetheaugunenau vavāaune: ¹³ Nau haeneduvanauau, nau hanaāenehethauthee, Hejavaneauthusau, Hecauhauthethāhe,* jeauwunauāa. ¹⁴ Nau hāenauhauwaude hanaāēdauwunaude, Waunenauhauthehaa hadanayaunenau vevethahevahehauau. Nau hethauwuu, henee daunausuyehauthee, haejegaudauvāhenauau. ¹⁵ Nau hanesāde, hāenauhaudauau henee dauunayauhade, haejaaagu, nau haevasenehe dauvaveenethedaunaude Hejavaneauthu, ¹⁶ Nau haeuāneseve heauthene, haevaveenethedauna: nau haenaadāde Samaritan. ¹⁷ Nau Hejavaneauthusaun haeauchuhananadethā, gaujenayauhaunauau vadadauchu? hau daude theaudauchu? ¹⁸ Hajenauhauvathee hajejaeyehauthee hadvaveenethedaunauthee Hejavaneauthu, vavade naa henewauuhu. ¹⁹ Nau haeāedauwuna, Gauhā, najesa: nananene hadethauwaudaude henayauhāne. ²⁰ Nau hāenaudedauwunaude Nesethajauhuhau, daun henajanedauwuna Hejavaneauthu hadneenauauchaunee, Haeāedauwuna, Henajaned Hejavaneauthu hadnehauwunauauchaune nausujauwuwuhadagu: ²¹ Daudause hehedauneagu, Nauhaudauwuu hede, wauāthe, nauhaudauwuu hena, hanau, naune, henajaned Hejavaneauthu thanāsadena, ²² Nau hanaāēdauwunaude hethauguhādaunau, Hese hadnauauchuu, hāene nananena vadaunauhaudauwunā jasae hese Heau henane, nau hadnehauwunauhaudava. ²³ Nau hadnanethāna, Nauhaudau hede; wauāthe nauhaudau hena; jevayehauau, wauāthe jevathauguhaa, ²⁴ Waude hasauau jahagude, henee naunauasānauuu hehethee naugauthanee naugauauwuu hejavaa neenauasādaa jasaa naugauthanee naugauauwuu hejavaa; hadnaasauau jea Heau henane hadnaasaunee hedeseve. ²⁵ Hau nedauau hadnanasenedauau wauthanee, nau hadnausāguthade nuu henaedede. ²⁶ Nau waudeneesaunee deenaedede Noe, hadnaasaunee jea hedeseve Heau henane. ²⁷ Neauwauthevethededaune, neauwauthevaveyauudenee, neauwauthenedaunee, neenenehathee, haunaude nauuu henee Noe dejedāde havathee thewaunaa, nau haenaāenanadauwauau, nau haenauauhā vahee. ²⁸ Waudenaasauau jea deenaedede Lot; neauwauthevethededaunee, neauwauthevaveyauudenee, neauwauthaunaudenee, neheaudaunaudenee hayauhuhau, neauwauthenayaudenee, neauauvadenee; ²⁹ Hau hajesesenee henee Lot haenaude Sodom haeesedanausaude nau haegauhauchanauuhauunauganauau hehethee hejavaa, nau haenauauhā vahee. ³⁰ Hadnaasauau hese hāene Heau henane hāenauhauthethāthe. ³¹ Henee hese, hānedauthe dasee hauauwuu, nau hevathayaunau jedauwuu hauauwuu, nanehajejeauwusade hadejedanauau: nau henee hanedaude nauau, nanehajejeaude. ³² Dauyuwuu Lot henene. ³³ Daun vanadaunayaudede hedenaedede hadnanadede; nau daun hadnanadede hedenaedede hadnenayaudede. ³⁴ Nananenau nāedauwunathana, henee veeyaugu hadnesethee henanenauau hanesadenee hauau; hanesāde hadnedanade, nau jasaa hadnathauaude, ³⁵ Hanesethee hesānauu hadthauayāthee wauhaunee; hanesāde hadnedanade, nau jasaa hadnathauaude. ³⁶ Hanesethee henanenauau hadnanedauthee nauau; hanesāde hadnedanade nau jasaa hadnathauaude. ³⁷ Nau

* **17:13** Missing “h” in “Hec(h)auhauthethāhe” (“Master”).

haeauhahananadethanauau, Daude, Vahadāhene? Nau haeāedauwunā haduu vadanayau, hanaadauhauāneauhuthee neahehauau hauānee.

18

¹ Nau haeanaadetha hauthaunauhānee nuu heee, hena henane hāvachudajauaunevevetha, nau hājethauujesevenauau; ² Hahagu haeanedau hedan hauchuwunane, haejesa Hejavaneauthu, daudause hathauwunanenau: ³ Nau haeanedau henevesā hena hedan; nau haejeedasa, Jeaugaunayewhu naujauthavaa, hathauhuk. ⁴ Nau haejevadaunaasedau: hau waunee hasethajauhuk, hewauāthe nejechauau Hejavaneauthau, nau hathauwunanenau; ⁵ Hau nausunee hanau naa henevesā hajanauchuhānau, hadenayauhauau havaedajauaunejau navanadauchuhaa. ⁶ Nau Vahadāde hasenehehuk, Jaathehaa hasenehede janechuvāhede hauchuwunane. ⁷ Nau gauhujavaneauthau gauhadnenayauha nehayau hanayāsanaunau, hauwauau-daunādaunau hesee nau dajāee, hau negudauchuhaude? ⁸ Nananenau nananena nāedauwunathana henee hadnauchuhanenayauhaude, Hau hāejauthe Heau henane, gauhadveede hethauwaudaude nuu hathāuauvaa. ⁹ Nau haeauthaunanadetha jachau nethauwaudaunadenethe nehayau henee dauchuvahethee, nau newauchānauwauthee hauthauau: ¹⁰ Hanesethee henanenauau haeyehaunauau vevethahenauauwuu hadvevethahethee; hanesāde Nesethajuhu, nau jasia hauāyāhe. ¹¹ Nesethajuhu haetheaugu nau haevevetha waude heee nehayau, Hejavaneauthau, nananenau vaveenethedaunathane, henee nāhauwunaathā hauthauau henanenauau hathahethee, hedanauwuyāhehauau, janechuvahethee, jatheaudauwuyāhehauau, daudause naa hathāde hauāyāhe. ¹² Nananenau nenaugauyānau nese hanesadee hauchauvadede, Nevānau vadadauchu vahee henee nāthāenetheyaunau. ¹³ Nau hauāyāhe haetheaugu vavāaune, daudause haejejenāauguau hejavaa, hau haeanaadesejāhede, Hejavaneauthau jeauwunaune wauchudaunau, hathauhuk. ¹⁴ Nananenau nāedauwunathana, naa henane haejaeyehau hedauauwuu haeauwunaunau haejavaāhe jachau: hanau dathājee hanesāde henee nevadaujavaānananethee nehayau hadnauwujenanade; nau henee nenehanethaunadede hadnejanade. ¹⁵ Nau haejādaunanauau jea hajasedāeyaunauau, hadnevasanaude; hau hāenauhaudauwunethe hethauguhādaunau, haeneneuvanauau. ¹⁶ Hau Hejavaneauthusau haeadetha, nau hahagu, Nanehaujauthee hajasedāeyaunauau, nau jevadauduvaa: naathāhenethe henehanahedaunau henajanedē Hejavaneauthau. ¹⁷ Hethauwuu nāedauwunathana, Daun hadjesedanauau henajanedauene Hejavaneauthu hasenaedenethe hajasedāeyaunauau hadne-hauwuneejedā. ¹⁸ Nau jachau hauchuwunanene haenaudedanaa, Hethāhene Hechauhauthethāhe, nauddusedau hadnedanauwau jethauujenenaedede? hathauhuk. ¹⁹ Nau Hejavaneauthsaun* haeāedauwunaa, Naudu hethāde haesene? henaneda hehauwuthā, vavade hanesāde, nananede, Hejavaneauthau. ²⁰ Nananene haenauwu nanavaavedaunau, Jevawauchudauau heee haugauthenenede, Jevanaa, Jevaaveda, Jevajayaudauwāedauwauthadee, Vechauchune nananene hāsaunau nau hānau. ²¹ Nau hanaānehede, Vahee nuu haunaunedenau heee daujeeseaunau. ²² Wauhā Hejavaneauthusau hāenedauwaudauau nuu, Hanaāedauwunaude, Hanesadee hāhauwusenethene: Vaheaudauna henee hāthāenetheyaunau, nau hadjaanauwunau-nauau hadavenuhuhauau, nau nananene hadnethenauwu haenathau hejavaa, nau hadejau hadjethaugu. ²³ Nau hāenedauwaudauau nuu, haeaudauwuthajau: hanau deethauwunethauyā dāde. ²⁴ Nau Hejavaneauthausaun hāenauhaudauwunith henee dauaudauwuthajau, Duthāenanauthaune henee nanethenuu veaunauaude hadnesejedāthee henajanedauene Hejavaneauthu, hathauhuk. ²⁵ Hanau

* **18:19** Missing letter “u” in “Hejavaneauth(u)saun”, which often appears (as does “Hejavaneauthusau”) where we would find the name “Jesus” in the KJV.

hehauwujajathaune heee camel hehedesahagaunee hajasevāhau nedaudaunaudenee, javaāneenauthaunee nethauyāsenane hadnesejedāde henajanedauunene Hejavaneauthu. ²⁶ Nau hathāenedauwauduu, Hanaa hadnenanedanede? hahagaunee. ²⁷ Nau hanaānehenith, hayauhuhau hejethauuneethaunenau henanenauau neneedede Hejavaneauthu. ²⁸ Hanaānehede Peda, Naune, naunaudauwunauau vahee, nau thaunauguhane. ²⁹ Nau haeāedauwuna, Hethauwuu nāedauwunathana, hena haunauude henane henee hehauwunaude hedauauwuu, wauāthe henehā, wauāthe henauhauwauau, wauāthe henene wauāthe henesaunau, heee henajanedauunene Hejavaneauthu hedenaededaunene, ³⁰ Nananede hadjavaānesedanauau nuu hewaunehaa, nau hathāauauvaa hadnauusanauau henaedede hadnejethauuvadauauau. ³¹ Hanaāedanaude nesenee, nau hanaāedauwunaude, Naune, hadneyehaunauau Dādaunedan, nau vahee hayauhuhau hathāewauthaunauhuu haeyāhehauau heee Heau henane hethauwunauauchauau. ³² Hanau hadvenavathe Neauthu, nau hadvavanauauchuhāde, nau hadnaunaunauchauchauchuhāde, nau hadneguthahayauthāde. ³³ Nau hadnenesegauhude, nau hadnaāde: nau nasese hadnaājeagauhāde. ³⁴ Nau haejaenauwu nuu: nau nuu hauthedau haeyaudaunaunauau, daudause haejaenauwu hathauthedaunāthee. ³⁵ Nau hethauwuu, hāyāedadauau Jericho, jasia haenanenaugu henane haetheaugu nedechaudenenee dauhunedaauwaude: ³⁶ Nau haenedauwaude henanedanede dadavechaudenenee, haenaudedauva haesedaunenenee. ³⁷ Nau haeāedauwunau, henee Jesus Nazareth hanehedesade. ³⁸ Nau hanaāevasanadede, Hejavaneauthusau, nananene Heau David, jeauwunaune, hathauhuk. ³⁹ Nau henee nandedauvathee haeneneuwanauau haddādaunaugunith: hau haevasanade haugathe, Nananene Heau David, jeauwunaune. ⁴⁰ Nau Hejavaneauthusau haedauusa, nau haeautheave hadjādaunade: nau hāyājenauusanith, haenaudedauuna, ⁴¹ Hauddusehathe henee hadenaasehathane? hathauhuk. Nau hanaāedauwunaude, Vahadāhene, nanaa hadeesedanauwau nauhaudauwaude. ⁴² Nau Hejavaneauthusau haenehetha, hanesedanauwu nananene nauhaudauwaude: hadethauwaudaude henayauhāne. ⁴³ Nau chauchaunu haeesedane henauhauwaude, nau haethauguha, haevaveenethedauna Hejavaneauthu: nau vahee henanedanede, hāenauhauuu, haevaveenethedaunanauau Hejavaneauthu.

19

¹ Nau Hejavaneauthusau haewaudasa nau haechaugusa Jericho. ² Nau, naune, haenedau henane Zacchaeus haseagu, haenajawauna hauyāhehau, nau haeveaunauau. ³ Nau haeneenavadaunauhauva Hejavaneauthusaun haedāhenethe; nau haejeneene daunauthethenedaunenene, heee daujaahede. ⁴ Nau haesayāgau, nau haenauahu sycamore hunauhaudee hadnauhauwaude: hanau hadnehedesanith. ⁵ Nau Hejavaneauthusau hājeedadauau, haejaāne, nau haenauhauva, nau hathauhuk, Zacchaeus, nauhauhuhu, nau jeauwusa, hanau nuu desenee hadnandedaunau haudauauwuu. ⁶ Nau haenauhuhu, nau haejeauwusa, nau haedasa nauguu neethajaude. ⁷ Nau hāenauhauvāhede, vahee haeneānaune, Henee hadneejādavenethe henanene henee wauwauchudauhu, hathāhuk. ⁸ Nau Zacchaeus haetheaugu, nau haeāedauwuna Vahadāhenith; Naune, Vahadāhene, vayaugauuu naudaununaunau vanenu hadavenuhuhanau; nau hith hedanavanaugu hayewhu hehethee daun henane hanājayaudauvāedauwauthauau, hanājavaāvenauau yāyaunanee. ⁹ Nau Hejavaneauthusaun haeāedauwunaa, Nuu desenee henayauthāhe hedadauau nuu hauauwuu, hanau nechau haneāvāde Abrahamvene. ¹⁰ Hanau Heau henane nauusade hadnaudethāde nau hadnenayauhaude daun naunethauaunith. ¹¹ Nau hajesenedauwauduu nuu hayauhuhau, haeethedaunane nau haeauthaunauhānanadetha, hanau dauhuauchauau wauwu Dādaunedan, nau hanau daunauanaduu henee henajanedauunene Hejavaneauthu chauchaunu

wauauhaadenauhauwu. ¹² Hanaāenehede henaheee, Jasaa naja haeehau vavāaune vedauauwuu hadnesedanauau heee nehayau najanede, nau hadjaejaude. ¹³ Nau haedetha vadadauchu hewauwaunauwau, nau haejaanauwuna vadadausauna vāejethā, nau haeāedauwuna, Hadeaudaunava haunaude jaenauusanaugu. ¹⁴ Hau hauauwunanenau haeasānavaa, nau haeyethautheavedaunene thauguu, Nāhauwuvadaunethenauva naa henane nāhauwuvadaunajawaunāva, hathāhuk. ¹⁵ Nau hethauwuu, henee hājeaenauusade, haeesedane najanede, hanaāauchuwwuhaude nuu wauwaunau hadnadethaude, hevenaunau vāejethā, henee hadnaenauau haedauchu dathājee henane haedauchujavaājasedethe heee hedaudaunaunau. ¹⁶ Hanaāejenauusade nandedauvade, Vahadāhene, havāejethāwau javaājasedede vadadausauna vāejethā, hathāhuk. ¹⁷ Nau hanaāāedauwunaude, Hethadee, nananene hethāhene wauwau; hanau nananene nethauwaudauwu heee naugajuhuhuu hadnajawaudauwu vadadausauna hedan. ¹⁸ Nau naneseauwaude haejenauusa, Vahadāhene, havāejethāwau javaājasedethee yauthauyauna vāejethā, hathāhuk. ¹⁹ Nau vavade hanaasenehethaude, Hadnehanāhene yauthauyauna hedan jea. ²⁰ Nau jasaa haejenauusa, Vahadāhene, Naune, heyewnau havāejethāwau, neaunaunedenau nejenanauwau hāheāhaunaa, hathāhuk: ²¹ Heee dauhusathane, hanau nananene daugaugaunauauwunanenene: nananene hedanau henee hājejenayaunau, nau hadegauuchu henee hājejenayaunau. ²² Nau haeāedauwuna, hehethee nehayau hadenaa hadauchuwwuhathane, nananene hauhauganene wauwau. Haenauwu henee daugaugaunauauwunanenenau, hedanauwau henee nājejenayaunau, nau hadgauuchauwau henee nājejenayaunau: ²³ Naudu gauhājevā navāejethāwau nedauhaenaeevāejethā, henee hājeaenauusanaune hadeesedanauwau nehayau javaānee? ²⁴ Nau haeāedauwuna henee daunauthetheaugunethe, Hedanauwunaa vāejethā, nau hadevenau henee vadadauchuvāejethāvade. ²⁵ (Nau hathāhuk, Vahadāhene, nanethenauau vadadauchuvāejethā.) ²⁶ Hanau hāedauwunathane, Henee dathājee hanesāde nanethenauau hadnevenade; nau henee janejasedede, daudause henee henetheyaunau hadnedanauwunade. ²⁷ Hau hena naujauthauwauau, henee najevedaunajawaunaunauau, hadjāthauva hede, nau hadnaunauauva hathaājenu. ²⁸ Nau hāesanāsenehede nuu, haenedauva, haenauauhuyehaunauau Dādaunedan. ²⁹ Nau hethauwuu, hāayānauusade Bethphage nau Bethany, haua Olives haseāgu, Haesayānautheava hanesenethe hethauguhādaunau. ³⁰ Najesaa nananena hesee hajasee hauauwudan hathaāsana, hathauhuk; nanaa waudasanagu hadveehauna dātheveehauchavesau hadduguhude, hehauwuthauune henane dachaugu: hadaugunauva, nau hadjāchaudauneva hede, hathauhuk. ³¹ Nau hith daun henane naudedanānagu, Naudu hauaugunauna hethānagu? hesau jenaasenehethauna, hanau Vahadāde haddaununaude. ³² Nau henee hautheavathee hanaāejathāauthee, nau haeveehanauau neesenehethaude. ³³ Nau daunausunaugunauthee dātheveehauchavesaune, hedaunenith, Naudu haaugunauna dātheveehauchavesau? hathāhaugaunee, ³⁴ Nau hanaāāedauwunauthee, Vahadāde haddaununaude. ³⁵ Nau haenauuchaudaunanauau Hejavaneauthusaun: nau haedadasanauwunanauau hedāchaunenau dasee dātheveehauchavesaun, nau haeaugaugunaunanauau Hejavaneauthusaun dasee. ³⁶ Nau daunausuyehaude, haesasaanauwu hedāchaunenau vaunaa. ³⁷ Nau hāayānauusade, wauwu haeauwusa hauanee Olives, haunaude hadauchude hethauguhādaunau hanaāaunauwuthajauthee nau haevaveenethedaunanauau Hejavaneauthu nauguu haevasānadedauune heee vahee hathāenauthaunee henesethaunene henee henauhauthaunenau; ³⁸ Haunauwuthajauau Naja henee jaunaude haneneseede Vahadāhenith: danādauyauau hejavaa, nau vaveenethedauwuu javaājauudaa, hāheagu. ³⁹ Nau hauthauau Nesethajauhuhau hehethee henanadaa, Hechauhauthethāhe, neuwune hāthauguhādaunauau, hathāhuk. ⁴⁰ Nau haeauchuhanāedauwuna nau hasenehethauhuk, Nananenau nāedauwunathana

henee, hith nuu dādaunaugagaunee, hauunauganauau chauchaunu hadneduhuthee. ⁴¹ Hau hāyānauusade, hāenauhaudauau hedan, nau haevewau, ⁴² Hanaāenehede, hith heenauwunagu, ha nananene, ha nuu hadeseve, hayauhuhau naathuu hadādaunahedaunaa, hau hewaunehaa yaunaudaunane hasesāe. ⁴³ Hanau hese hadnedasāna henee haujauthauwauau hadnesedethee havat hegauuha hee nananene, nau hadnechauchuaunāna nauanee, nau hadnaunaunehāna daudauna hehethee, ⁴⁴ Nau hadnanaunauvaenāna, nau hadāeyaunewauau hanedauchaunawaunauau; nau hadnehauwunaudanauwunā hanesāhenith hauunaugane hanathauginethe; hanau nananene daujaenauwu hāenauujādaunathana. ⁴⁵ Nau hanaāeyehaude vadanedaunauauwu, nau hanaāenudanaude henee neaudaunanethe jedauwu, nau henee naudaunanethe; ⁴⁶ Hanaāēdauwunaude, Wauthaunauhuu, Naudauauwu haneauauwunee hadnevevethahedaunee: hau nananena haesedena nedaunaudee heyāenau havedehauau. ⁴⁷ Nau haeautheda hayauwusenene vadanedaunauauwu. Hau najanauau vevethahevahehauau nau wauthaunauhāhehauau nau najavahehauau henanedanede haenenanaudehaa hadnaāde, ⁴⁸ Nau haeyauhuune nesenehāde hanau vahee henanedanede haenāedevenenau dauhujaathehāde.

20

¹ Nau hethauwu, henee jasaa hena hese, denausunauthedade henanedanede vadanedaunauauwu, nau haeauthedaude waunauyaunee hethadenee, najanauau vevethahevahehauau nau wauthaunauhāhehau haedasaa naugu vachaugananenau, ² Nau hanaāanadethauthee, Jeauthedaunāa, hayew hāenaudahede hāenesedaude nuu hayauhuhau? wauāthe hanaa henee havenāde nuu hāenaudahede? ³ Nau hanaāauchuhananāedauwunaude, Nechau hadnaudedauwuna hanesadee hayewhu; nau hadjeāedauwuneeva: ⁴ Heedusaayāde Jaun, gauhuhuthaune hejavaa, wauāthe hehethee henanedaa? hathauhuk. ⁵ Nau haeeegaugaugauudenauau, hith hesauhesenehethaunauaugu, hehethee hejavaa; hahagaunee, Naudu haejethauwau-daunauna? hanāthānauau. ⁶ Hau hethaunauaugu, hehethee henanedaa; Vahee henanedanede hanāedaudauauvānauau hauunaugāe, hanau hethauwaenaunauthee henee Jauneau dauhaeyānith. ⁷ Nau haeāedauwunanauau, daujeneauthedaunauthee daunathane. ⁸ Nau Hejavaneauthesau hanaāēdauwunaude, Dause gauhaudnauthedaunathava daun nāenaudahede nāenesedaude nuu hayauhuhau. ⁹ Hanaāejasesanadedauau henanedanede hee dajenehede; Jasaa henane haejenane dadajenevesenethauchayau, nau haeethauauwujethāhehau, nau haejathāau hese vavāaune vedauauwu haegudaunā. ¹⁰ Hāenauauchaunee haeyethauheava wauwaune hese thauauauwujethāhehau, henee hadjevenāde vevenaundenau hehethee dadajenevesenethauchayaunaa: hau haenenese guhuu, nau haejathethajenāhee jessaa. ¹¹ Nau jea haeyethauheava jachau wauwaune; nau haenenese guhunauau jea, haedayānauchuhanauau, nau haejathethajenāhee jessaa. ¹² Nau jea haeyethauheave nanaseauwaunee: nau haenasenehanauau jea, nau haenuguthanauau. ¹³ Hanaāenehede hadāhevāhe dadajenevesesaa, Hewauaujeesedaunaune? Hadautheawauau navechauthau nāa: Nauchāe hadeneehauthee hāenauhauwaunauthe. ¹⁴ Hau thauauauwujethāhehauau hāenauhauwauthee, haegaugaugauudenauau, Naa nananede hadvanehanāde: nahājauau hadenauaune, henee headevanehanahedaunau hadenehanahenauau. ¹⁵ Hanaāenuguthauthee dadajenevesenethauchayaunaa, nau haenaunauau. Haudneduseha hadāhevāhe dadajenevesenethauchayaunaa? ¹⁶ Hadejaude nau hadnauauhaude nuu thauauauwujethāhehau, nau hadgauchuhvāde dadajenevesenethauchayau, hathauhuk, Nau hāenedauwauduu, hadnehauwunaasau, hahagaunee. ¹⁷ Nau haenāuhauva, nau hanaāēdauwunaude, Dusau nuu henee wauthaunauhuu, Hauunauganau hauauvāhehauau hausāguthaunenau, hanānanenith hāhe hanadāde nedautheane? ¹⁸ Daun janesee dasee nuu hauunaugane

hadthauusee, hau dasejaneseagu hanānauchauwuthauathāaunaude. ¹⁹ Nau najanauau vevethahehehauau nau wauthaunauhāhehauau chauchaunu haegaugauanavanauau hadnesedanauthee; nau haedauwu henanedanede hee dauhāenuu henee dauhanadede nuu dajenehede hee. ²⁰ Nau haeauyauhauvanauau, nau haeauthavanauau haunauyauhauthāhehau, hadnanadaunethānethe hadchuvāhevathe henanenau, henee hadnesedanauwunethe hedanadedanau, henee hadenau-uchaudanauthee hejadenenau nau naunaudāhenethe hauchuwunanene. ²¹ Nau haenaunaudedanauau, Hechauhauthethāhe, haenaunee henee hasenehenaune nau nethauwuchauhauthethāne, daudause hāhauwujāvedaugauhauwaunauau henanedanauau hegau, hau hanechauhauthethāne hese Hejavaneauthu het-hauwu: ²² Gaunaasauau hee nananee hadnevenade hauāyaunau Caesar, gauwauāthe hegau? ²³ Hau haeauenauwu henaunedaunenau, nau hanaāēdauwunaude, Naudu haevadauvasehena? ²⁴ Jenauhauthehee vāejethāe. Hanaa hewauthaun-
nauaudene, nau hanaa hewauthaunauhanede? Haeauhanāedauwunanauau, Caesar. ²⁵ Nau hanaāēdauwunaude, Jauaunaudaunaa hee Caesar hayauhuhau henethayaunau Caesar, nau Hejavaneauthu hayauhuhau henethayaunau Hejavaneauthu. ²⁶ Nau haejeneesedanauwu hedanadedanene hathaājedaunene henanedanede: nau haegaugauanadauwu hedauchuhanehedaunene, nau hanaāedādaunauguthee. ²⁷ Hanaāejeedauchauthee jasae Sadducees, hayāthajauhuhau henee hadjejaegauhadenene: nau haenaudedanauau, ²⁸ Hechauhauthethāhe, Moses hathauthaunauwunānauau, Hith daun henane henauhauwauau gaujauaudāheyaugaune, heneneyaugaune, nau gaujauaudāheyaugaune jedāeyauneveyaugaune, henee henauhauwauau hanādanaude henenene, nau hanānesaunede hee henauhauwauau, hathauhaugaune. ²⁹ Hena hee haenesaudauchunauau henahavaevadehehauau: nau jasaa nedauau haenenene, nau haenaja haejedāeyauneve. ³⁰ Nau naneseauwaude haeneva, nau haenaja haejedāeyauneve. ³¹ Nau naneseauwaude haeneva; nau vavade hanaasene nanesaudauchuauwaude jea, nau haejenauthanauau dāeyaunauau, nau haegaugauaudāhenauau. ³² Waunee vahee hesā haegaugauaudā jea. ³³ Henaheee jaegauhadeneyāgu hanaane hadnevādaune? hee hanesaudauchunethe daunevāde. ³⁴ Nau Hejavaneathusau haeauhanāedauwuna, dāeyaunauauau nuu hathāauauvaa nenevadedanene, nau nenenehadene: ³⁵ Hau daun naunauguthee hadnenaededuu hena henaedede, nau jaegauhadeneyāgu hehethē gaujauaudahede, hadnehauwunevadedanene, hegau hadnenenehadanene: ³⁶ Daudause hadnehauwauthenajadene: hadnaathahedanene hautheunauau; nau hadnenaunevāthee Hejavaneauthu, naathedāeyaunenedanene jaegauhade. ³⁷ Wauhā henee gaujauaudahehehauau hadjaegauhāthee, Moses denauhauthehade jauauadee, deadethāde Vahadāhenith Hejavaneauthu Abraham, nau Hejavaneauthu Isaac, nau Hejavaneauthu Jacob. ³⁸ Hehauwuujavaneauthu heyauhauade, hau henaedede: hanau vahee haneenaededanene. ³⁹ Hanaāene jasaa wauthaunauhāhe haeauhananadetha, Hechauhauthethāhe. Nananene hethade hasenehene. ⁴⁰ Nau hee haejauthanadedanauau. ⁴¹ Nau hanaāēdauwunaude, Naudu haena hane Chris Dāvid* dauhuāwaude? ⁴² Nau Dāvid nehayau hasenehede wauthaunauhanaa Psalms,† Vahadāde hasenehethaude Navahadāhewaunādaune, Hadjejanaugudaune hejavesanee, ⁴³ Haunaude nadeesehaunauau haujauthauwauau hadnedaugāaugunene. ⁴⁴ Dāvid henaheee haehenesea Vahadāhenith, dusee heau? ⁴⁵ Nau vahee henanedanede haenedanau hanaāēdauwunaude hethauguhādanau,

* **20:41** “Dāvid” is spelt thus here and in two other places nearby, 20:42 and 20:44. The name is spelt “David” in its other ten appearances in the text. (See note for 13:16.) † **20:42** “Psalms” is capitalized here but not in 24:44, but both are almost certainly deliberate. As per the KJV, “Psalms” in 20:42 is the name of a book in the Bible, but in 24:44 the common noun “psalms” is meant.

⁴⁶ Waudauau wauthaunauhāhehauau, neneanaduu javesanee sauaunausāchaude, nau vechauduu jachauthadede nedauaudaunauvadedeunenee, nau najatheaugudaunau vevethahenauauwuu, nau najanau nedaugunethe vanethehedaunenee; ⁴⁷ Naudauvāe henevesānau hedauauwunene, nau hanau denauhauthethāthee deguthevevetha-hethee: hadnathee hanesedanuu vanasaunee gudanadede.

21

¹ Nau haejaāne, nau haenauhauvā nethauyāsenanene haejenanauwu hevaudenenu haenathaunaa. ² Nau haenauhauva jea jachau hadavenuhu henevesāne haethāgudene hanesāenee nevaāhenee vāejethāu. ³ Nau hanaānehede, hethauwuu nananenau nāedauwunathana henee naa hadavenuhunede henevesā javaājenanauau vahee; ⁴ Hanau vahee nuu nanethauyādahethee dejenanuu dejenanauwunauthee Hejavaneathu: hau hadavenuhunede hajanenauau vahee heenaededaunau hathāenethenauau. ⁵ Nau haehegaugaugauudenauau vadannauauwuu, haseneehenee nauguu hethāhenethe hauunauganau nau hausāyaunau, hanaānehede, ⁶ Nuu hayauhuhau hānauhauthaunenau, hese hadnauaichuu, hadnehauwunathauau hanesāde hauunauga hanathaugude hadvajanesee. ⁷ Nau hanaāenedaunauthee, Hechauhauthethāhe, hau hadduunaasau nuu? nau hayew hadnauhauwuu hadnesauau hāene nuu hayauhuhau hadneenauaichuu? hathauhaugaunee. ⁸ Nau hanaānehede, haunauyauhaudauwauau henee nananena hadejenanedaunehana: hanau hadnewauthathee hadjauthee Naneseedaunaa, Hanejavaneauthusaunenenu, hadnethee; nau hayānauaichauau: jevathauguhaa. ⁹ Hau hāenedauwaudauwunā vauthadede nau jajayauthadede, jeva nathajauau, hanau nuu hayauhuhau hadnedauunauaichuu; hau hadneevadauauau hadguthauau. ¹⁰ Hanaāāedauwunaude, jajaesenanedanedede hadnevauthadee jajaesenanedaa, nau najanede hadnevaudauau najanede: ¹¹ Nau hadnavathethau-thauwunauauau vedauauawuu, nau hasenaude, nau havathaugauwude, nau naunaunauchaudauhauthaude nau hadvasauau naunauhauwuu hadnauaichauau hehethee hejavaa. ¹² Hau hadnejesejenauaichuu vahee nuu, hadnedanāna, nau hadnaunaunauchauthehāna, nau hadnevaudenee nananena hauāchaude, nau duguhunauauwuu, nau hadnenauuchauhana hathaājethee nenauchuwuthee nau hauchuwunanenauau hanau Naneseede hee. ¹³ Nau hadnaasejenanauwunana hee haenathau. ¹⁴ Hāenauwuu heehena nananena hadahenauau, jevagaugauuthajauau nedauau daun hadnesenehena: ¹⁵ Hanau hadvenathana vade nau haeyaude, vahee hasānavādaunenau hadnehauwuneayādaunāva hegau hayethaagudaunādaunenau. ¹⁶ Nau nananena hadnavethevāthee nesauuu hanehānenau, nau hāthesaunenau, nau hādaūānenau, nau hādaehahenau; nau jasae nanaena hadneenaana. ¹⁷ Nau hadneeva-hasānavāhena vahee henanedaa hanau naneseede hee. ¹⁸ Hau hegau hāthaanenau haudauguhuanenauau hadnehauwugaujauaudāhenaunau. ¹⁹ Hanāedevedaunenau hadnaunaunehaudde havadathuwunau. ²⁰ Nau hāenauhaudauwunā Dādaunedan hadnechauchuaunāna vanenanenauau, nanehāaenauwuna henee nauauhadede wauwu hadneadaa, ²¹ Nanehadaugauhuthee hese hauanee hathāanedauthee Judaea; nau henee hathāanedauthee nahethāe nanehanauahethee; nau jevajejedānauha henee hathāanedauthee gauchuhunee vedauauwuu. ²² Hanau nuu hese hadneauthedaudenee henee vahee hayauhuhau hathāewauthaunauhuu hadnethauwunaasauau. ²³ Hau naunauthaunee hadnethauauvāhethee hathāenesaunethee, nau hathāeneaunauhuthee hena hese, hanau hena hadnavathasenaudenee vedauauwuu, nau hasenau-naudaunāhenauau nuu henanedanede. ²⁴ Nau hadneaunathāhethee gaugauthau, nau hadnejathechauhāthee hadwauwaunenethee vahee jajaesenanedanede: nau Dādaunedan hadnauguhethee Neauthu, haunaude Neauthu nauauchaudauhaugaunee. ²⁵ Nau hadnauhauthaunee hesesee, nau vegusesee, nau hauthuu; nau nanadee hathāauauvaa hadnaunauādaugauhudaunee jajaesenanedanede, hadnehauwaenauwu;

hadaje nau hadnaunaudānaanee; ²⁶ Henanenauau hedahenau hadnadenāthajaanee, nau hanau naunauyauhauduu hena hayauhuhau hadnauauchaanee dasee hathāauauvaa, hanau hathāenauthauau hejavaa hadnauauwunauauau. ²⁷ Nau hadnaāenauhauwauna Heau henane hadnenauusade henaunauade nauguu naunauthaanee nau hadnavathenauasāauau. ²⁸ Nau hāene nuu hayauhuhau hāenauaichuu, nauhadnaāenaunauānena; nau hadnejenāauguauna heee hadneejaenauthana hadnaāeaudaa. ²⁹ Nau hanaāedadajenehethaude; Nauhauvaa hauuyauchunauhaude, nau vahee hahaudenauau; ³⁰ Hāeguugauāhenauthe, hadnauhauwauna nau hadnaenauwuna nehayau henee veja dauhuaudaa. ³¹ Hadnaasauau nananena hāenauhaudauwunā nuu hayauhuhau hadnethauwunaasauau, hāenauwuu henee henajanede Hejavaneauthau haneaudanee. ³² Hethauwuu nāedauwunathana, nuu henaedede hadnehauwuvadauau, haunaude vahee hadnethauvāe. ³³ Hejavaa nau vedauauwuu hadneyauhuu; hau Nadanadedaunau hadnehauwuthauuyauhuunau. ³⁴ Nau haunauyauhau-dauwauau nehayau, naseduhuu daunāene hadahenau havaehayaundenau heee haudauhauganedaunenau, nau havanadenenau, nau haunaunethaunenau nuu henaedede, nau henee hesee hadgauduaunāna hau hadnehauwaenava. ³⁵ Hanau waude nauyaundenau hadnauauchauau vahee hathāetheaugude dasee hathāauauvaa. ³⁶ Haunauyauhaudauwauau henaheee, nau hevevethahee dajauaanee, henee nananena hadeheenauguauna hadegauchuhauwuna vahee nuu hayauhuhau henee hadnauaichuu, nau haddetheauguna hathaāhede Heau henane. ³⁷ Nau hesenee haechauhauthethā vadanauauwuu; nau hāeveeyaanee haenauā, nau haeadāne hauanee henee neseeyāgu hauanee Olives. ³⁸ Nau vahee henanedanede haejevanauuchaudene naugusāje daunauganenee hadaude vadannauauwuu, heee dauhujaathehāde.

22

¹ Wauhā hadneevasevenee janenesaunauchauanauhuu jauaujaunau haeayānauauchau, Hadavechaude neseāgu. ² Nau najanau vevethahevahehau nau wauthaunauhāhehauau haegaugauanadauwunenau hadnesenaāde; hau haedauwu henanedanede. ³ Hanaāejedāde Haujau Judas hejaveede Iscariot, haenethanedau vadadauchunesenee. ⁴ Nau hanaāejathāaude, nau haeanaadetha najanau vevethahevahehau nau haunauyauhauthāhehau, hadneseavedaudaunauwaude. ⁵ Nau haeneethajaunauau, nau dechachuwhadethee hadvenāde vāejethā. ⁶ Nau haesayānehetha, nau haeanauyauhaudauwu hadneeneavedaudaunauwaude henanedanede. ⁷ Hanaāenauauchauau hesee janenesaunauchauanauhuu jauaujaunau nanaa hadavechauthau hadnāede. ⁸ Nau hanaāautheawaude Pedaheau nau Jauneau, Najesaa hadesaanudeva hadavechauthadede, hadevethenauau, hathāhaugaanee. ⁹ Nau hanaāēdauwunauthee, Daudu hadauvathehāne hadnedauusaanuu? ¹⁰ Nau hanaāēdauwunaude, Naune, hāejedānā hedan, hena henane hadnuchaunāna, hadnewauunauau hauānau hadjaāsanenee naje; hadethauguhauva hauauwuu hadnedaujedāde. ¹¹ Nau hadethauva henane hedauauwunede, Hechauhauthethāhe nejeethāne, daudu jādanauauwuu hadnedauvethenauau hadavechauthadede nauguu nāthauguhādaunauau? ¹² Nau hadnauhauthehāna vanasaanee dachauauwuu hadnesewaudeanee: hadnesaanuhuu. ¹³ Nau hanaāeyehauthee, nau haevedenauau neethāedauwunaude: nau hanaāesaanudethee hadavechauthadede. ¹⁴ Nau hāenauauchaanee, hanaāejanaugude nauguu vadadauchunesenee hevadauhanau. ¹⁵ Nau hanaāēdauwunaude, hethauwuvadavethenau nuu hadavechauthadede naugu nananena hajesejasauwauwuthānau: ¹⁶ Hanau nāedauwunathana, Nadnehauwauthethee nuu, haunaude hadnauauchauau henajanede Hejavaneauthau. ¹⁷ Nau hanaāedanauau vāenau, nau hanaāevāde vaveenede, nau hanaāenehede, Hedanauwuu nuu, nau

hadjaanauwauva nehayau: ¹⁸ Hanau nāedauwunathana, Naudnehauwuvanethede dadajevenenaje, hanaude henajanede Hejavaneauthau nauauchauyāgu. ¹⁹ Nau hanaāedanauau jauaujau, nau hanaāevade vaveenede, nau haejeane, nau haevena, Nuu nanaa nadanayau havenadenenau: nuu hadneejenauneethedaunena, hathauhuk. ²⁰ Naasauau jea vāenau hāesethunevethedeaunee, Nuu vāenau waunauyauau hesānaavede Navaevaa, hanedaunauwunana, hathauhuk. ²¹ Hau nauhauvaa, hejadena henee haneavedaundaunade nananenauau nanedauguvānauau vethedeaunaa. ²² Nau hethauwuu Heau henane hadjathāaude, neesedaunade: hau naunauthaunee henee henane haneavedaundaunadenenee. ²³ Nau hanaāenaunaudedaunadethee nehayau, hanaadee hadnesedaude nuu. ²⁴ Nau hena jea haeneenayaundenauau, hanaadee hadjavaāvasāthaa. ²⁵ Nau hanaāedauwunaude, Nenauchuwuthee Neauthuu haevahadahethedauwu; nau henee nanethenuu naudahede nanadee hesenaedehehauau neseadagaunee. ²⁶ Hau jevanaathāhee: hau henee havasāthawaunādaunenau, hadenahavaewauva; nau henee naja waude henee henechauthāhehau. ²⁷ Hanaa vanasāthaa, henee vanethede, wauāthe henee henechauthāhe? gaujenane henee vanethede? hau hanedaundaunathana waude henee henechauthāhe. ²⁸ Nananena daudajauaunenethaunena denaunaunauchauthehanau. ²⁹ Nau janenanauwunathana najanede, waude Nāsaunau nejeesejenanauwunānau; ³⁰ Hadevethena nau hadevaveyāna navethedeaunaa Nanajandedaunaa, nau hadetheaugudauwuna najatheaugudaunau hadnauchuwuhauna vadadauchunesenee jajaesenanedanede Israel. ³¹ Nau Vahadāde hanaāenehede, Simon, Simon, nauhauwune, Haujau nevadaunethenāne, hadvachuuguthāne waude thauauhanewauchuunau: ³² Hau nevevethasathane, henee hadethauwuthajaude hadejenadegaundenauau: nau hāejauaugauthethajaunaune hadedāewaunauau hahauwauauau. ³³ Nau haenehetha, Vahadāhene, Nananenau hanesaanunau hadnenenethaunathane, nesauna duguhunauauwuu, nau gaujauaudahedaunaa. ³⁴ Nau haeāedauwuna, hāedauwunathane, Peda, neauthuneāhe hadnehauwunedu nuu desenenee, hajesejenehenaune nasau hadnethedauwaune henee nananene daujaenaunene. ³⁵ Nau hanaāedāuwunaude, Deathavejenanathana hāehauwunewauunava nesevāejethāwau, nau newaugusajaānauchu, nau wauaunau, gauhājevathehāva hayewhu? Hegau, hathauhaugaunee. ³⁶ Hanaāedauwunaude, hau hewaunehaa henee nanethenauau nesevāejethāwau nanehaedanaunau, nau jea henevāejethāwau; nau henee janenethenauau gaugauchu, nanehaeaudaunade heddu, nau jeaudaunaude gaugauchu. ³⁷ Hanau nāedauwunathana, henee nuu wauthaunauhuu hethauwunaauthaunauhunau, Nau haewauhaunau wauwauhudaunau: hanau nethauthedauthanau hethauvaa. ³⁸ Nau hathauhaugaunee, Vahadāhene, nauhaudau, heyewnau hanesāe gaugauthau. Nau haeāedauwuna, Naadauchāe. ³⁹ Nau haejenaua, nau haejathāau, nesedaude, haa nee Olives; nau hethauguhādaunau jea haethauguhaa. ⁴⁰ Nau hāanauusade, haeāedauwuna hevevethahee henee hadejejedāna vasehadede. ⁴¹ Nau haejāvesa hehejese nejechauthaunenee, nau haechagujanaugu, nau haevevetha, ⁴² Nāchau, hith Nananene vadausedaunenagu, jegudanauwune nuu vāenau hehethee Nananenau: hau nāhauwuvathehaa, hau Nananene, hadnaasauau, hathauhuk. ⁴³ Nau haenauhauva hautheaune hehethee hejavaa, haedadāevaa. ⁴⁴ Nau haeneenajeneethajau haeneenavevetha: nau heguwauaude waude davathejajaneauthee vaewauau dejanese vedauauwuu. ⁴⁵ Nau hāegauhāde hehethee devevethahede, nau haejeedasa hethauguhādaunau, Haeveena haeseenaugahunenau hee haudaunwuthajaude, ⁴⁶ Nau haeāedauwuna, Naudu haenaugauhuna? gauhāe nau vevethahee, hadejejedāna vasehadede. ⁴⁷ Nau hajesanadede, haenauhauwu havathenedanede, nau henee Judas neseade, jasaa vadadauchunesenee, haenedauva, nau haeayāedasa Hejavaneauthusaun hadnedanaude. ⁴⁸ Hau Hejavaneauthusaun hathāhuk, Judas,

gauhāavedaudauna Heau henane gauhadneenedanau? ⁴⁹ Hāene henethauguvādaunau daunauhaudauwunethe hadneshade, Vahadāhene, gauhadjedauauwaunauau hee gaugauchu? hathauhaugaunee. ⁵⁰ Nau hanesāde haedauauva hewauwaunavene vasnajane vevethahevahew, nau haegauadathāhe hejavesē. ⁵¹ Nau Hejavaneauthusau haeauchuhananadetha, Hauwaa nanasedau nuu. Nau haevasane henaudaununene, nau haenayauha. ⁵² Hejavaneauthusau hanaāenehethaude najavevethahevahehau, nau haunauyauhauthāhehau vadannauauwuu, nau vachaugananenau, hejew-aunedasādaunau, Gauhāejauva, waude hee havedehe, nauguu gaugauthau nau vachau? ⁵³ Denethenaedevathana hayauwusenee vadannauauwuu, nananena hāehauwudaneva: hau nuu nauauchaudauna, nau naunauthauau vaneeyauau. ⁵⁴ Hanaāedanauthee, nau haejathechauhauau, nau haejedananauau Vasenajane vevethahevahew hedauauwunene. Nau Peda haejesedauchu. ⁵⁵ Nau hāesewauvedaunathee nahethāe hadauvasenejesauau, nau haeauājanaugunauau, Peda haejanaugudauna. ⁵⁶ Hau jasae hesāhedāeyaune haenauhauvaa daujanaugudaunaude hejava hesedaa, nau haenaunauchaudauhauvaa, nau hathāhuk, Naa henane jea nanethenaedewaude. ⁵⁷ Nau haeethedauwautha, Hesā, nahauwaenaunau, hathauhuk. ⁵⁸ Nau naunade jachau haenauhauvaa, nau hathāhuk, Nananene jea hanehedāhene. Nau Peda hahagu, Henane, nananenau hegau. ⁵⁹ Nau hee jasaye denauachauau waunee jachau haeethauwunehene, hathāhuk, hethauwuu naa jea nanethenaedewaude; hanau nananede Gananaean. ⁶⁰ Nau Peda hahagu, Henane, Nāhauwaene daun nesenehene. Nau chauchaunu, daunausunanadede, neauthuneāhe haenedu. ⁶¹ Nau Vahadāde haejaaagu, nau haenāauhauva Pedaheau. Nau Peda haethauchuthajaude hedanadedauunene Vahadāhenith, neesenehethāde, Hajesejeneduhude neauthuneāhe, nananene hadnethedauwauchune nasauna. ⁶² Nau Peda haenaua, nau haeneenavewau. ⁶³ Nau henanenauau henee daununauthee Hejavaneauthusaun haevavavanauchuhanauau, nau haedaudauauvaa. ⁶⁴ Nau hāesajeājethauthee, haenadeāhenauau, nau haenaunaudedauananauau, Haeyāhe, hanaa henee haudauauvāde? nethāhuk, ⁶⁵ Nau wauthanee haeewauwauchuvaa nanāsanadethāde. ⁶⁶ Nau chauchaunu hasenaugusājenee, vachaugananenauau henanedanede nau najanauau vevethahehehauau nau wauthaunauhāhehauau haeauāchaudaunanauau, nau haejedananauau hadauhanadethee, ⁶⁷ Gauhanane Chris? jeāedauwunāa, hathauhaugaunee. Nau haeāedauwuna, Hith Nananenau hāedauwunathanagu, nananena hanājethauwaudaunena: ⁶⁸ Nau hith nananenau jea naudedauathanagu, nananena hanājachuhananadesena, wauāthe hanājejenanena. ⁶⁹ Hewaunehaa hee Heau henane hadtheaugude hejavesē naunaudāhenith Hejavaneauthu. ⁷⁰ Hanaāenehethee vahee, Gauhanane Heau Hejavaneauthu? Nau haeāedauwuna, Hasenehena Nananenau. ⁷¹ Nau hahagaunee, Hehauwauthevathēhānanauau naudedauyaunauau? hanau nehayau nanedaunaunauau Nehayau hedenaa.

23

¹ Nau haunauude henanedanede haegauhādene, nau haeyehaudaunanauau Pinade. ² Nau hanaāevavasevāde, Vaneenaunauau naa gauchuhuchadede jajaesenanedanede, nau nedauduwaude hadjevenauthee hauāyaunau Caesar, daunahagu Chris Nenauchuwude, nethadede, hathauhaugaunee. ³ Nau Pinade haenaudedaua, Gauhanane Dauhunauchuwuhunene Jews? hathauhuk, Nau haeauchuhanāedauwunaa, Hethauvāne. ⁴ Hanaāedauwunaude Pinade najanau vevethahehehau nau henanedanede, Nāhauwuveedenaune wausaunee naa Henane. ⁵ Nau haenaunauchauthedauhadene, wauwayauchudedē henanedanede, hanechauhauthethāde hehethee vahee Jewsevedauauwuu, jajesēee hehethee Gananane nauuu nuu vedauauwuu, hathauhaugaunee. ⁶ Hāene

Pinade nedauwauthaude Ganane, haenaudedauva wauau hagananenane.
⁷ Nau chauchaunu hāesaenauau henee daunaadāde Herod hadaunajavanethe, haeathavenane Herod, jea haenedau Dādaunedan hena hese. ⁸ Nau hāene Herod nauhauwaude Hejavaneauthusaun haevaseneethajau: hee devadaunauhauwaude dajauaunee hanau dauhuwauthanedauwauthaude; nau haevadaunauhauwaude jasaa venauneguthau hadnesedaunith. ⁹ Haenaunaudedauva hauwauhuu hanadedauva; hau haejauchuhananadethaa. ¹⁰ Nau najanau vevethahehehau nau wauthaunauhāhehau haetheaugunenau nau haenaunauchauthevaa. ¹¹ Nau Herod nauuu vauānanenau haejenananauaugaugauyaune, nau haevavavanauchuhanauau, nau haeneenuhanauau neudahenenee hu, nau haevenanauau jea Pinade. ¹² Nau hajesesenee Pinade nau Herod haenedaehāvadenauau nesauuu: hanau nedauuu haeasānavadenauau nehayau. ¹³ Nau Pinade, hāesauānadethaude najanau vevethahehehau nau hauchuwunanenau nau henanedanede, ¹⁴ Haeāedauwuna, Nananena nauchaudaunena naa Henane, nanahagu henee gauchuhuchauwuna henanedanede: nau, naune, nananenu, haunauchuwuhauau hathaāhena, nāhauwuveedenaune wausaunee naa henane hee henee hayauhuhau nanāsevasewauna: ¹⁵ Hegau, hehauwune Herod: hanau neathavejenanauwunathane; nau naune, hehauwunenauau hehauwugaudauwudau. ¹⁶ Hadnesesegauhaa, nau hadjenanauau. ¹⁷ (Hanau hadnaugauhusenaasedaude hadjenanaude hanesāhenethe vasevethedeauneagu.) ¹⁸ Nau haunauude haevasānadenuauu jasānee, Hausāguthaa naa, nau jejenanauwunāaa Barabbas, hahagaune: ¹⁹ (Nananede hanau jasaa nejaevauāde hedan, nau hanau nenaade, nethānade duguhunauauwuu.) ²⁰ Pinade henaheee, haevadaujenana Hejavaneauthusaun, haenanadetha jea. ²¹ Hau haeneānaune, Saethechuhuu, Saethechuhuu, hahagaunee. ²² Nau haeāedauwuna nanaseauwaunee, Dusee, dusewauchudau? Nāhauwuveedenaune hadneegaujauauthaude: Hadnaasedaunau hadnesesegauhaa, nau hadnaājejenanauau. ²³ Nau haeneenasānadenuau, haeneenasadausaethechuhunauau. Nau haeneānadenuau nau najanau vevethahehehauau haechauwauauwaunauau. ²⁴ Nau Pinade haechuwardā henee hadnaasaunee hasevathehāthee. ²⁵ Nau haejenanauwuna nananede henee hanau nejaevauāde nau nenaade haethānuu duguhunauauwuu; nananede heenedauwaundenenu; hau haevā Hejavaneauthusaun hathanauwauthee. ²⁶ Nau hāejathechauhauthee, haedananaunau hanesāhenith Simoneau, hehethee Cyrenene, hananeedesade vedauauwuu, nau hananene haenehanauwunanauau nauhauchuu, henee hadnanewauunauwunith thauguu Hejavaneauthusaun. ²⁷ Nau hena haethauguhaa havathenedanede, nau hesānuu, haevadauwuthajauha nau haevewauhunauau hee. ²⁸ Hau Hejavaneauthusaun haejaaāne haeāedauwuna, Dādaunedan hedaunauhau, jevahevewauhau hee Nananenu, hau heevewauhau nehayau, nau hee hadāeyaunenau. ²⁹ Hanau, naune, hese janādaunuu, hadneenedeaunee, Haunauwuthajauau jenesaunehauau, nau henaudaunenau henee nejethaujanēsāthee, nau hethanenau hehauwunethuaunenau. ³⁰ Hee hadnaāejaseseneduu hauane, Gaudaunānuu; naa jauaudane, gaudauyauhunauau. ³¹ Hanau hith heenedauhaugaunee nuu hayauhuhau janadanegauaheyaugaune hauhaudene, haudneedusedaune wautheyaugu? ³² Nau hena haenesenauau gauchunee jea, wauwauchudauhuhau, haenethaunaa hadnaugunaade. ³³ Nau hāene hāedaduu, Calvary hanaaseenee, hena haesaethechuhunauau, nau wauwauchudauhuhau, hanesāhenith hejavese, nau jachau nauwauthee. ³⁴ Haenaānehede Hejavaneauthusaun, Nāchau jaegudanaunene; hanau daujāenuu hasedauthee. Nau haejaanauwaunenau, hedāchaunene, nau haeehedaudausadaunenau. ³⁵ Nau henanedanede haetheaugudaune dauhasauhauvade. Nau hauchuwunanenau jea nauuu haeauchaudanavaa, haseneheyaugaune, Nenayauhaude hauthauau;

Nanehanenanayauhadede hethauwuu Chrisdeyaugu, Neayāsanāde Hejavaneauthu. ³⁶ Nau vanenanenau jea haenaunaugauthedaunaa, haedasaa, nau haevenaa naneujaudenee dadajevenenaje, ³⁷ Nau hathāhuk, Hethauwunajawaunaudagaunee Jews, henayauhade nehayau. ³⁸ Nau haewauthaunau jea haewauthaunauhune hejavaa hedanadede Greek, nau Latin, nau Hebrew, Naa Nanajawaunaude Jews. ³⁹ Nau jachau wauwauchudahu chaunaunauaunith haewauwauchuvaa, Hethauwuu Chrisdenagu, henayauhade Nehayau nau nananee, hathāhuk. ⁴⁰ Hau jachau haeauchuhananadene haedauduva, Gauhajeadaunau Hejavaneauthau, hanau nananene nanesadee hathaichuwuhane? hathauhuk, ⁴¹ Nau neehanauau; hanau hanesedanauwunauau nanāsedaunauau: hau Naa hehauwuwauchudau. ⁴² Nau hanaānehethaude Hejaneauthusaun,* Vahadāhene, dauyewuwuthedaune hāanausanaune Hanajanede. ⁴³ Nau Hejavaneauthusaun hathāhuk. Hethauwuu hāedaunwunathane, Nuu desenee hadnethenaedevene Paradise. ⁴⁴ Nau hāethauthaunesade, nau hanaāveeyauau nanadee vahee hathāauauvaa haunaude nanasuusee hāenauauchauau. ⁴⁵ Nau hesese haeveenenauau, nau hauguthau Vadannauauwuu haethauwunauau nahethāe. ⁴⁶ Nau Hejavaneauthusaun hāevasānadede, Nāchau, hajadanaa hadaunaunehau Navadathuwu, hahagu: nau hāesenehede nuu, haevadawauthauwu. ⁴⁷ Wauhā vanenenaja hāenauhaudauau hasedaunenenee, Haeauwauauna Hejavaneauthu, Hethauwuu naa chaunuvāde Henane, hahagu. ⁴⁸ Nau vahee henanedanede henee hathājeauānuusathee hadnauhauwauthee, haenauhaudauwu hanasedaudenenee, haenadesejāhedenaunau, nau haejaajegauhadaune. ⁴⁹ Nau vahee henedaehauhau, nau hesānau hethāethauguhādaunau hehethee Gananee, haetheaugunenau vavāaune, haenauhaudauwu nuu. ⁵⁰ Nau, naune, henane Joseph haese, najananadehe; nau haethā, nau haechuvā: ⁵¹ (Naa haejechuwardā hasenedaunenene nau hasedaunethe;) haenaadāde Arimathaea, hedan Jews: nananede jea nehayau haejauwuwude henajanedaunene Hejavaneauthu. ⁵² Naa haeyehau Pinade, nau haenedauwaude hedanayaunene Hejavaneauthusaun. ⁵³ Nau haejanana, nau haeuyauuna naunaujānaunee, nau haejenana nedauthānavathe gaujauaudahehehau hauunaugāe, haunauau henane haejethauujenana. ⁵⁴ Nau hena hesee haesaanudaune, nau vadanese dayānauauchauau. ⁵⁵ Nau hesānau jea, hejenauunethaunādaunau hehethee Gananee, haethauguhā, nau haenauhaudauwu hadausaesenanethe, nau hedanayaunene hathaudanee. ⁵⁶ Nau haejaenauthau, nau haesaanudenauau hathāeneevaudenee nau chauayaunau; nau haedaunānusenauau vadanesee hasauau nanavaavede.

24

¹ Wauhā nanedauwaudaa hesese hauchauvadede, hajesejevesesanith haejeedadauwu hadausaesenanith, haenauuchaudenauau hathāeneevaudenee heesaanuthaunenau, nau jasae hauthauau nauguu. ² Nau haenauhauvanauau hauunaugane haeausānene hehethee hadausaesee. ³ Nau haejedānauau, nau haejevedenauau hedanayaunene Vahadāhenith Hejavaneauthusaun. ⁴ Nau hethauwuu daugaudauwuthajauthee hee, naune, hanesenethe henanenau haetheaugudaunā haenauasāaunenau hedāchaunene: ⁵ Nau daunāthajauthee, nau haenaunauagunauau vedauauwuu, haeāedaunwunā, Naudu nananena haenaudehauna hanenaededaunaude nethee gaujauaudahehehau? ⁶ Hehauwanedau hede, hau jaegauhāde: dauyewuwuu neethāedaunwunā denausunanedaude Gananee, ⁷ Neesenehede, Heau henane hadvenavathe hejadenene wauwauchudaunanenau, nau hadsaethechauhude, nau nasese hadjaegauhāde. ⁸ Nau haedaunānusenauau hedanadedeunene, ⁹ Nau haenauhaudauwu hehethee needausaesenanith, nau

* 23:42 “Hejaneauthusaun” possibly should be “Hejavaneauthusaun”. (See note for 18:19.)

haeauthedaunanauau vahee nuu hayauhuhau jasānee, nau vahee hauthauau. ¹⁰Haenane Mare Magdalene, nau Joanna, nau Mare henaune James, nau hauthauauau hesānauau henee henethaunādaunenau, neauthedaunauthee nuu hayauhuhau vadauhanau. ¹¹Nau hedanadedaunenau hathanadauwuyaugaune gaugauyaune, nau haejethauwaudaunaunauau. ¹²Hanaāegauhāde Peda, nau haeyeseneegau hadausaesenanith, nau haewauguau, haenauhaude naunaujānaunee haeānaudanenu jessaa, nau haenaude, haegauguanade hasaunee. ¹³Nau, naune, hanesenethe haeyehaunenau henee hajesesenee hajasee hauauwudan Emmaus haseagu, hehethee Dādaunedan wauau nesaudauchu nau gauuu daugauha. ¹⁴Nau haeenanadenuau wauhaunee vahee nuu hayauhuhau hasaunee. ¹⁵Nau hethauwuu, henee, dauanadethee wauhaunee nau haenaunaudedadenuau, Hejavaneauthusau Nehayau haeeauhauna, nau haenethauna. ¹⁶Hau hesesānenau haedunenenuau henee hadjaenaunauthee. ¹⁷Nau haeāedauwuna, Hayewnau hadanadedaunenau nuu henee nananena hānegudaunenenuau, daujajāwauaunadena, nau daudaneāauna? ¹⁸Nau jasaa hanaaseede Cleopas, haeauchuhananadethaa, Gauhanane vavade dauhadavesane nuu Dādaunedan, nau gauhajaene hayauhuhau hasedaunenee hena nuu hese? ¹⁹Nau haeāedauwuna, Hayewnau? Nau haeāedauwunaa, Hee Hejavaneauthusau Nazareth, nananede Haeyāhe naunaudāde hanasedaude nau hedanadede hathaāhenith Hejavaneauthu nau vahee henanedanede: ²⁰Nau najanauau vevethahevahehauau nau hadauchuwananevene neesevānethe gaujauaudahede hadneauchuwuhade, nau nesaethechauhude. ²¹Hau nejauwuwuhaunauau Nananede hadnenayaude Israel: nau nauguu vahee nuu, desenee nanasāe hese hāsesenedaudenee. ²²Haa, nau jasae hesānauau jea hadahenauau nenāvānauau, naugusāge neanedauthee hadausaesenanith; ²³Nau dejevvedethee hedanayaunene, nejenuusathee, neauthedathee, henee jea haenauhauvanauau hautheaunau neethāhaugaunee henee daujaenaedeyaugaune. ²⁴Nau hauthauauau hānethaunādaunene deyehaunauau hadausaesee, nau haeevedenuau vavade hesānauau neesenehenethe: hau haejenauhauvanauau. ²⁵Hanaāāedauwunaude, Hau hāhauwaenava nau gaunuanuu hadahenau hethauwaudanee vahee henee haeyāhehauau nethauthedathee: ²⁶Naasauau Chris hadnasenede nuu, nau hadjedāde hadnedauvasāthaa. ²⁷Nau jeejasesee Mosese nau vahee haeyāhehauau, neevavesāedauwunaude hee vahee hanathauthaunauhunee hayauhuhau hadnesenaedede Nehayau. ²⁸Nau haeeauhauwu hajasee hauauwudan hasesathee: nau nehayau haenanedauneha hadjavesade. ²⁹Hau haeneenadaunanauau, hathauhaugaunee, Hanedaundaunā: hayānaesade, nau hese hayāenauwusanauau. Nau haejedā hadnanedaundaunade. ³⁰Nau hethauwuu, daujanaugude haenethevetheheva, Haedane jauaujau, nau haevaveene, nau haejeane, nau haevena. ³¹Nau hesesānenau haegaunanenenuau, nau hanaāaenaunauthee; nau haeyauhaudenauau. ³²Nau hadāhene gauhauchāe hethauvaa, hanathadagaunee jae, deanadethānauau jāthee, nau hāegaunanauwunānauau wauthaunauhanau? ³³Nau haegauhānauau chauchaunu nau haejaeyehaunauau Dādaunedan, nau haeevehanauau jasānee haeauaunudaunāhenenuau, nau hauthauau henee hanedaundaunādaunenau, ³⁴Vahadāde gauhāde hethauwuu, nau haenauhautheha Simon, hathahaugaunee.* ³⁵Nau haeauthedanauau hayauhuhau hanasedaunith hadesathee, nau hasaenaunāde daujeanauau jauaujau. ³⁶Nau daunausunadethee, Hejavaneauthusau Nehayau haetheaugu nahethāe hadauthee, nau hathāhaugaunee, Danādayauau vanenathana. ³⁷Hau haenānauaunauau nau haenāthajauanauau, nau hasethajauhaugaunee henee haenauhauvanauau vadathu. ³⁸Nau hathauhuk,

* **24:34** The last word of the verse is unclear and could be “hathahaugaunee” or “hathahaugauhee”. The former was chosen as being closer to what is used in other instances of direct speech.

Naudu nananena haenāthajauna, nau naudu haegaugauuthajauna gauhānauha hadahenau? ³⁹ Nauhaudauwuu Najadenau nau Nauaudau, henee Nananenau nehayau: Vasanee, nau nauhauwuu; hanau vadathau hehauwudausānune nau hehauwudechaunave, hathauhauwuna. ⁴⁰ Nau dauhanadede, haenauhautheha hejadenau nau heaudau. ⁴¹ Nau haejethauwuthajaunauau heee haunauwuthajaude, nau haegaugauuthajaunauau, Haeāedauwuna, Gauhajevevene hede? ⁴² Nau haevenanauau hanesāhenith nauwu haeaujaunene, nau gauhauaugunaugauye. ⁴³ Nau haedane, nau haevethe hathaājenethe. ⁴⁴ Nau haeāedauwuna, Nuu nanāe hanadedau nau hāauthedaunathadenenau, denausunethenaedevathana, henee vahee hayauhuhau hadnethauwunauauchuu, hanathauthaunauhuu henanavaavede Mosese, nau haeyāhehauau, nau psalms heee Nananenau. ⁴⁵ Hanaāegaunanauwunaude hadnaenauwunethe, henee hadnaenauwunethe wauthaunauhanau, ⁴⁶ Nau haeāedauwuna, Hathauthaunauhuu, nau naasauau Chris hadnasenede, nau hadjaegauhāde hehethee gaujauaudahede nasese: ⁴⁷ Nau henee haugauthegaugauuthajaude nau hadjaegudanee wauchudaudenau hadnautheduhunee heee Heneseede nanadee jajaesenanedane, hehethee Dādaunedan. ⁴⁸ Nau nananena haenauwuna nuu hayauhuhau. ⁴⁹ Nau, naune, Nananenau vanenathana sayānee Nāsaunau hau theauguu hedan Dādaunedan, haunaude nananena hāchauwunagu nauuu naudahede hehethee hejavaa. ⁵⁰ Nau haejasesenedauwauna hajechaudanee Bethany, nau haegauha, nau haeevethasa. ⁵¹ Nau hethauwuu, daunauvevethauchaude, Haenautha, nau haeejechauhau jethee hejavaa. ⁵² Nau haeevethedaunanauau, nau haejaeyehaunauau Dādaunedan nauuu vaseneethajaude: ⁵³ Nau dajauaunee haeannedaunauau jedauwuu Vadannauauwuu, hauwaunede nau haeevethedaunanauau Hejavaneauthu. Hethauvaa.